


NKONKO NÈ MANDAMUNA

PA EBÈLÙ CITÙPÀ III

 ...bwà kwikala cyàkàbìdì kaaba aka dilòòlò edi mu tabernacle, bwà kwikala ne myoyi kuulukuulu mu bwobùmwe bulenga ebu ne dikuukwila dyà banyùngùlùkile Dìyì dyà Nzambì dìdì ditùpèèbwe cyanàànà edi. Nènku tudi . . . banangè kwikala baabanyanganyi bàà dibènesha edi.

⁵⁵⁴ Nènku ndi mèmè ànu mutwìshìibwe ne Nzambì neatùbènèshè dilòòlò edi mùvwàYe mwenzè mu dindà emu amu, ku diyiisha dyà mu dindà adi. Nènku mvwà ànu nyiikilangana ne mwena mutumba naanyi, Màmàmù Wood, katancì aka, ne tuvwa tuyiikilangana pa bwalu abu, ne Mukalenge Wood ne bakwàbò. Nènku ndi ngiitabuuja ne cìvwa ndiyiisha dyà Mwanèètù Neville dyà ditàmbe bwimpè ku a mimpè àkaadiye muyiishèyìishe, adi ndìvwà bwànyì mèmè dimpè kutàmbe dyònsò dikaadiyèkù muyiishè too ne leelù. Ncyà bushùwà ne mvwa mukème ne mwanyishe diyiisha dilenga dilayà adi. Kàbìdì ndinkolèshèkù ku mwoyi, ne ndinsònze. Pa nàнку mèmè—mèmè ntu munangè kwitaba bulelèlà, nudi bamanyè's. Nènku, pa bìdì bitàngilà bukitù, nudi bamanyè's, bwà kwikala ne bukitù, ne mùshindù wà. . . Davidì ùvwa mwab'awu, ne mùshindù wùvwàye. . . Pàvwàye mu diteeta dikolè adi, pamutù pàà kwamba ne: “Èè, nènye kenza cikampànda, Mukalenge, Wèwè ùkwàcishèkù,” yèyè wàkindila, wàkaya kakonka Mukalenge cyà dyenya. Wàkatwàla efòdà, nudi bamanyè's, ne wàkamba ne: “Mpindyewu tùjuukilàayi kuulu tùkonkè Nzambì ne: ‘Citùdì ne cyà kwenza ncinyi mu cikondo cyà lutàtu eci?’” Kaa, aci's cìvwa cibanjike ànu cyà bushùwà's. Aci cìvwa ne maavitàminè àbùngì kutàmbe ne bisùmbishidì byà manga byònsò bitùdì naabì mu ditùnga edi abi. Èyowà's, mukalenge, aci's cìdì cikwenza bimpè byà menemene.

⁵⁵⁵ Mpindyewu, dilòòlò edi, katwèna—katwèna ne kiipàcìlà kàà kushàala ntàntà mule kupìcisha mundankùlù to, twètù ne mùshindù, pa nkonko eyi. Pa nàнку netù—netùbwelemu buludì, dyàkàmwè. Ndijikija dyà nkonko eyi, kàdì musangu wònsò wùndì ànu nkàadi nyijikija. . . Mpindyewu, Mwanèètù wa bakàjì Hattie, ncìvwa ne meeji a kwenza nàнку to, udi mumanyè aci. Mvwa—mvwa ngamba ànu bwà kwamba cyanàànà, wamònu's; nènku, èyo. Kàdì ndi ne ndambù wa yà mikolè kaaba aka yà kùdì mwambi kampànda, ne mmikolè mipangè ne mwà kukola bwà kuyàndamuna. Nudi bamanyè's, bayiishi abu, bòbò bàtu bàcìkònyangaja mu Bible mwònsò ne bàteeta bwà kupeta dyandamuna dyàbò bòbò kumpàlà kwà kukwelabò lukonko,

nudi numòna's. Nènku díbà adi. . . ne ebi bìdi munkaci mwà kukwàciibwa pa mikàbà yà mèyi, neyiikalè mwà kuya mu Géorgie kùdi mulundà wanyì mwambi udi ne nkonko minène mwandamukùlù yà mu Bible kaaba aka miikàle mikolè yà menemene.

⁵⁵⁶ Nènku mpindyewu, lumingu lùlwalwà elu, kanùpu mwoyi to ne nwatùsambidilaayikù.

⁵⁵⁷ Ne mukàjàànyì ùkaadi muumvwè bímpè menemene; ùkaadi mujuukile kuulu patùdi twakulangana apa, ne mmwambùlwishe ne ku diipika, leelù ewu. Balundà bèètù bananga bàà ku Canada, Mwanèètù wa balùme, Mwanèètù wa bakàjì Sothmann, bàdi kaaba aka balwè kutwèndela, ne ncyà bushùwà ne tudi twanyisha ditùmwènekela dyàbò. Nènku mukàjàànyì, bu mùvwaye mumanyè ne bàvwa bàlwa, mòna's, ùvwa muswè kujuuka bwà wàmònakù mwà kupeta ndambù wa dicyònkomoka ne bwobùmwe bwà kùdi beena Kilistò bananga aba. Tudi ne disànkà dyà kwikalakù ne Mwanèètù Freddie pàmwè neetù dilòòlò edi, kàdi mwena kwèndè yèyè mmushààle ne. . . Ùvwa kaaba aka mu dindà emu, kàdi ndi ngeela meeji ne mmushààle ne. . . to, ncyà bushùwà, bàdi ne Meda, bwà ikalèku pàmwè nendè patùdi balwè kùneeku apa; bwalu ndi mumanyè ne díbà nediiikalè dipìte ndambù dilòòlò edi, kùdi mèèsà a Mukalenge ne dyoweshangana dyà màyi ku makàsà. Pa nàнку tudi ne disànkà dyà kwikalakù naabò ne beenyi bàdi neetù aba.

⁵⁵⁸ Mpindyewu, kumpàlà kwà twètù kubanga bwà kuteeta kuditwa mu dyandamuna dyà nkonko. . . Ne vùlukààyi ànu ne mèmè ndi—ndi mwà kutùpakana, nudi numòna's, ncyèna—ncyèna ndàka mukana ngamba mùndi mubingè mu byònsò bìndi ngenza nànsa. Ndi—ndi nteeta bwà kwikala mu bulelèlè, kàdi pàmwàpa ndi—ndi mu ntùpàkànyì. Nènku—nènku mèmè mu ntùpàkànyì, díbà adi nùmfwilaayikù ànu luse; ne ndi ndòmba bwà Nzambì wàmfwilakù Pèndè luse, bwalu ncyèna ne meeji a kwikala mu ntùpàkànyì to. Ncyèna nteeta bwà kuyàndamuna ànu bwal-. . . anyì mu mùshindù wùndi ànu. . . bwà kapangishà to, ndi nyàndamuna ku dyànyì pàànyì dimanya, nwamònu's. Ne byòbì bikèngela bwà mèmè kushintulula mmwènenù yànyì pa lukonko kampàndà lwà Bible, ngeela meeji ne ànu aci ki cintu cyà dyanza. Bivwa bikèngela bwà twètù kwikala tushintulula, díbà kanà dyònsò, pàdi Dìyì dyà Nzambì dyàkula; bwàlu n'Dìyì dyà Nzambì.

⁵⁵⁹ Nènku mpindyewu, ngeela meeji ne netwikalè mwà kusambidila cyàkàbìdì babèèdi dilòòlò edi, bu pa ciibidilu. Ne mîngà misangu udi ànu udikonka; udi wangata bu mùdi kasumbù kakesè kàà bwena aka, ne búngì bushààdile kù, kaa, kaatabernacle aka, ne mîngà misangu kùyi umòna bipeta byúvwà ujinga kumòna abi to. Kàdi cidìku, cyùdi wenza, udi ànu ukòka kuumukila ku bantu batwè ku nkàmà yibìdì cyanàànà. Kàdi dimwè dyà ku masangisha a manène, pàmwàpa udi ukòka

kuumukila ku binunu bisàtù too ne ku dikùmi, nudi numòna's, ne—ne pàmwàpa bapite apu. Pa nàнку ki mùshindù ngwòwò awu, wùdi ufika ku dimòna bàà batàmbe kwikala bààbùngì abu. Kàdi dilòòlò edi, ndi ànu ngandamuna . . . Mu bushùwà bwà bwalu téléfònè wetù ùdi ànu wènza kudila pàdi ànu tusunsa tukesè tùpita ditùkù dijimà ne citùpà cyà bufùku.

⁵⁶⁰ Ewu m'Màndàmù Reisert udi musòmbè apa, ùndi mutàngile ewu anyi? Bible webè, mwanèètù wa bakàji, Mwanèètù wa bakàji Wood ùdi nendè paanyimà pààpa. Ndi mukutwàdìleyè mu dindà emu, kàdi nci—ncivwa mufikè ku dikupèèshayè to. Ne nci—ncivwa mukumòne mu dindà emu to, nènku Màndàmù Wood ùdi nendè.

⁵⁶¹ Pa nàнку bwà kwandamuna ku téléfònè ne kumanya bi—bintu binènè bìdi byenzèke. Inàbànzà kampànda ùvwa mumbiikile, wàmba ne: “Mwanèètù Branham, mvwa mu disangisha *kampànda* ne mvwa nsaama *cikampànda* kùkaavwa ntàntà bule *kampànda*. Kàdi, udi mumanyè's, wèwè udi mwenzè ànu wakula cyanàànà kuntwaku, nènku ànu . . .” Kwambayè ne: “Nkààvwa mwambè kuuminyina's pààkapàtulà Ci ànu maalu a mu nsòmbelu wanyì wa kale awu.” Ki yèyè ne: “Ncitukù musaamè kàbidi to kubangila ànu piinè apu.”

⁵⁶² Kàdi inàbànzà kampànda kubwelayè e kwambayè . . . Ngeela meeji ne yèyè awu ùdi kaaba aka dilòòlò edi, anyi ùvwa ne cyà kwendesha màshinyì ùmukila ku Bedford, ngeela meeji, anyi mwaba kampànda muntwamu. Mwanààbò mulela wa balùme ùvwa kaaba aka, ngeela meeji, uvwa ne disaamà dyà mwoyi awu, mu mùshindù mubi be. Nènku ùvwa musòmbè kaaba aka mu disangisha, ki—ki Mukalenge kubwela mu cyalu ne kulenga . . . kwambila nsongàalùme awu disaamà dyèndè, ne yèyè ùvwa mwà kajuula dibòkò ànu ne lutàtù, ciinè aci disaamà dyà mwoyi, ne dibòkò dyèndè dyònsò dikwàte tukulàkàji, ne mwoyi wèndè mùshindù ewu. Ki dyàkàmwè kubwelayè buludì mu kàshinyì kèndè ne nyèyè udi walukila kumbèlù wàwa, kàciyikù mwà kutàcishiibwa naaci kabidi to kubangila ànu apu. Inàbànzà wa ku Bedford awu mmufikè apa anyi? Udipù anyi, inàbànzà? Nyèyè wàwa, paanyimà pààpa. Eyowà, mmufùme ku dimbiikila ku téléfònè, kwènji katanci.

⁵⁶³ Pashiishe kùdi inàbànzà uvwa mumbiikidile mu Evansville. Ne yèyè kàvwa ne mùshindù wà kufika apa to bwalu ùdi ùsanganyiibwa kule be, kàyi mumanyè ne tuvwa mwà kwenza disangisha dyà dyondopa dilòòlò edi to. Ki yèyè ne: “Mwanèètù Branham, mvwa musòmbè mu disangisha dyà mu Evansville,” ki yèyè ne, “wèwè kutùma mèsù paanyimà pa musumbà awu ne kwamba . . . kungambila ne mvwa kampànda, ne bìmvwà mwenzè, ne ciine cìmvwà musaamè aci, ne bikwàbò mùshindù awu.” Ki kwambayè ne: “Mvwa ne disaamà dyà nkòlolo wa mfwènke adi, ne bìvwa bìnkèngela kwikala kwosha bwanga bwà Asthmador ne bikwàbò mu cibambalu kubangila ànu pàncivwà

mwânà mutekète.” Yéyè ne: “Aci kùkaadi bidimu bibìdi, kàdi ncitukù mupetè kantu kàà mfwènke nànsha kakesè to kubangila ànu piinè apu.” Nwamònu anyi?

564 Nènku ànu bwà aba bàdipu mu dilòòlò emu abu, bàvwà kabàyi kaaba aka mu dindà emu bwà kusànkilakù bujaadiki abu to; mvwa muyè ku màkàjiinyi a bintu byà mishinga mipuutula, mukasùmbe ciipòpî, makèlèlè awu. Mpindyewu, kacivwa bwànyì mèmè mwinè to, nwamònu’s. Cìvwa mbwà mwanànyì mukesè wa bakàji, Rebekah, wàwa nàka. Kàdi—kàdi Sarah ùvwa yéyè ne cyà kuya ku mwaba kampànda, leelù ewu. Umwè wa ku balongò bààbò batekète ùvwa wènza kaacisangilu kakesè, kàà mufikilu wà dilediibwa anyi cintu kampànda, nènku ùvwa mumwambwile kaamàtâpishi kakesè; nènku mvwa nsùmbe kaaciipòpî kakesè, kiiipacila bule *ebu*. Nènku kulwakù tàmakàtàmakà inàbànzà kampànda mwab’awu, kwambayè ne: “Udi mumvùlukè anyi?”

565 Ki mèmè ne: “Ncyèna ngeela meeji ne ndi mukuvùlukè to.”

566 Ki kulwabì kumanyika ne, ùvwa cilongo cyà Mwanèètù Neville ewu, uvwa bu. . .pâmvwà mu njila mutàngile ku Suède, bôbò. . . Yéyè wàkabwela mwab’ewu, mwikàle ne mwânà mukesè wa balùme mu kàkalù kàà balèmà, ànu mùdì Edith mukesè wàwa, ne mwânà mukesè awu ùvwa ne kànsèrè, cyùjà cyà kànsèrè kàà lufù, mu bwongò. Nènku katù kèndè kakesè aku kanyekamija, nènku yéyè. . .ne bangàngàbukà bàvwà bamupèèshe ànu mbingu yisàtù cyanàànà yà kwikalayè ne mwoyi. Bàvwa bakàngàte ne bajandùle disaamà, ne bamòne ne cìvwa. . .cìvwàci aci, ne kumupèèshabò mbingu yisàtù cyanàànà yà kwikalayè ne mwoyi. Nènku bivwa bikèngela bwà kwikalabò bàmwendeshila mu dikalù dyà balèmà, ne kumutèèka mu kalààlù kàà dyambwila babèèdi pàvwàye ùya ku cibambalu aci bwà kumwenzabò mateeta, ne pashiishe kumwalujabò. Mèmè kuya kasambidila mwânà mukesè wa balùme awu, ne kulòmbe Mukalenge bwà àmwondòpè. Ki ditùkù mene dyà pàakacyàbu adi, pàakayàbo nendè muntwamu, yéyè kwamba ne: “Ncyèna muswè kàkalù kàà balèmà aku to.”

567 Kubwelayè mu kàshinyi e kuyayè kuntwaku, ne ngàngàbukà kuvùngululayè kalààlù kàà dyambwila babèèdi aku, kwambayè ne: “Ncyèna muswè kalààlù kàà dyambwila babèèdi aku to.”

568 Kuyayè kwàka lubilu e kusòmbyayè, ngàngàbukà kumwenzayè mateeta, kwambayè ne: “Èè,” yéyè ne, “pamutù pàà mbingu yisàtù, nènkupèèshè bidimu lukàmà ne mwandamukùlù byà diikala ne mwoyi.”

569 Nènku, makèlèlèlè awu, mamwèndè mmutwilàngàne naanyi. Ne yéyè mwine ùdi mwà kwikala kaaba aka, bwà ku dyànyì dimanya dyònsò, dilòòlò edi. Ne kànà kàà balùme aku kàvwa pambèlu apu kànàya ndundu, nsongàalùmè wa citende patùdi

twakulangana apa. Cyùjà cyà kànsèrè kàà lufù, kànsèrè mu bwongò, nènku bìdì ànu bìleeja . . .

570 Kaa, binunu byà maalu's, nwamònu's. Nzambì kèna mwà kupangilakù to. Kê—Kèna ànu mwà kupangila to.

571 Mwanèètù John, dísù dyèbè dyũmvùku bímpè anyì, mwanèètù wa balùme? Ùvwa mupetàkàne ne njiwù, ùvwa ùpoopela musonso kàdi kumutuutawù mu dísù. Nènku tuvwa bònsò munkacì mwà kusambidila Mwanèètù John O'Bannon, mwanèètù wa ku Louisville uvwa mupetàkane ne njiwù yà musonso wùvwà mumutuutè mu dísù.

572 Mpindyewu, nkonko eyi yìdi nndòndò wa—wa mwoyi wa muntu kampànda; yà pàdìbo bàbala mu Mifundu ne bàpeta bintu ebi, kàdi kabàyi. . . pàmwàpa kabàyi mwà kudyumvwa bòbò biinè basànkishìibwe to, nènku bàdi bàyifila kaaba aka bwà twètù kuteeta bwà kwandamuna. Nènku's nudi numòna ne mmu lutàtù lukolè kaayi mùdici citùtèeka; bwalu, ciwamba aci, nebashààlè bakwàtekù. Pa nànu wèwè udi ne cyà kwikala mutwìshìibwe ne udi mu bulelèlè, nènku mèmè. . . mutwìshìibwe ne mwèbè mwònsò. Nènku díbà adi, cintu cyà kwikala batwìshìibwe ne tudi mu bulelèlè, tulombàayi ànu bwà Nyuma Mwímpè mpindyewu àtũmvwìjilèku cyòci eci, patùdi twinyika mitù apa.

573 Mpindyewu, Taatù wa mu Dyulu, kaa, ndyèsè kaayi dyà kwambakù ne "Taatù" twambila Mufùki munène wa maulu ne buloba. Ne tudi tulòmba ànu bwà Wàngatèku nkonko eyi mu bukùbì Bwèbè Wèwè mwinè mpindyewu. Mmifidìbwe kaaba aka ne meeji matòokè matàmbe kwikala a ndòndò. Nzambì, enzàku bwà aci cìfuminè mu myoyi yètù, meeji matòokè matàmbe kwikala a ndòndò, bwà kuyàndamuna bilondèshile dyètù pètù dimanya; enzàku nànu.

574 Ne swàku bwà luse Lwèbè lwìkalè pambidi pàà muntu ne muntu. Ne swàku bwà cintu kampànda cyàmbiibwè mwab'ewu dilòòlò edi cìikalà ànu mwà kukwàcisha muntu ne muntu udi kaaba aka. Ne patùumukà, paanyimà pàà disambila dyà babèèdi ne didyà dyà méesà a Mukalenge ne bikwàbò apu, swàku bwà twàmbèku bu bàvwà bàfùminà ku Èmawùsè abu ne: "Myoyi yètù kayìvwakù yilàkuka kapyà munda mwètù pàvwàYe wàkula neetù mu njila apu anyì?" Bwalu tudi tulòmba nùku mu Dìna dyà Yesù. Amen.

575 Mpindyewu, múnkaadi mwambàmbe misangu ne misangu ne, ebi—ebi kaaba aka bìdi—bìdi nku wanyì pàanyi mmwèneni mutàmbe bwímpè pa byòbì, ne pashìishe míngà misangu bìtu bìjuula ndambù wa dikòkangana. Lwà kumpàla elu, ndi mmòna ne ncintu kampànda cínkaavwà mudyànjlile kwamba, mbacifilùlùle. Ncyàkwikala . . . ndi muswè kucibala mpindyewu, bu nwènù mwà kuswà.

65. Pàvwà Adàmà ne Evà bapetè bânà bààbò balela mu Edènà apu, kùvwakù bantu bakwàbò pa buloba musangu awu anyi? Mu Genèsè nshapità mwi5 ku mvensà wa 16, Kaayinà wàkasòmbela mu buloba bwà Nodà ne wàkamanyangana ne mukàjèndè.

⁵⁷⁶ Mpindyewu, alu's ndu—ndukonko lulenga lwà dikèma's. Mpindyewu, tutu bayiile mu Bible... Ne misangu yàbùngì ebi... mîngà misangu tutu twenza lulèngù... Mvwa ne ciibidilu cyà kufùnda pa kapese kakesè kàà dibèji, ngamba ne: "Konkà. Andàmùnà lukonko kanà lwònsò lwà Bible."

⁵⁷⁷ Ki muntu kampànda kwambayè ne: "Èè, mukàji wa Kaayinà ùvwa nganyi?"

⁵⁷⁸ Kaa, mvwa ngeelamù ndambù wa bilèlè anyi cintu kampànda, ngamba ne: "Kaa, ùvwa mmwànà wa bakàji wa màmwènèndè," anyi cintu bu nànkù, nudi bamanyè's, anyi—anyi ne "Ùvwa m'Màndàmù Kaayinà." Kàdi aci kacyèna cyàndamuna ku lukonko to. Kùdi... .

⁵⁷⁹ Mwômò amu Kaayinà ùvwa ne mukàji, bwalu Bible mmwambè ne ùvwa nendè. Ne piikalàbi ne Kaayinà ùvwa ne mukàji, s'bvwa bikèngela ikalè mumupetè mwaba kampànda. Ne eci ncifwànyine kubwela buludì mwômò emu ne:

Kùvwakù bantu bakwàbò pa buloba pàvwà Adàmà ne Evà bapetè bânà bààbò balela abu mu budimi bwà Edènà apu anyi?

⁵⁸⁰ Mpindyewu, bu nwènù mwà kumòna, mu Bible mmu mpùùpùùkà menemene mùdibokù batèèle dilediibwa dyà muntu mukàji. Misangu yònsò ànu mwànà wa balùme ngudibò batèèla mu Bible, kí mmuntu mukàji to. Mmu mpùùkàpùùkà menemene mùkaadibò bambèku bwà dilediibwa dyà mwànà wa bakàji, mu Bible. Anyi, bwà kwamba menemene, ncyèna mumanyè ne ndikù mwà kuvùluka dyàkàmwè mpindyewu to, bwà mu meeji, mwàba wùdibò batèèle dilediibwa dyà mwànà; mbambè ne: "Bààkalèla bânà bàà balùme ne bàà bakàji."

⁵⁸¹ Mpindyewu, Bible ùdi ùtèèla ànu bwà bânà bàsàtù bààkalediibwà kùdi Adàmà ne Evà, ne bàvwa n'Kaayinà, Abèlè, ne Setè. Mpindyewu, piikalàbi ne bònsò bàsàtù abu bàvwa balùme, piikalàbi ne kakwàkalediibwa bakàji to, ne pashiishe pàakafwà mukàji umwèpelè awu (Evà), nùnkù bukwàbantu's mbulekèle kwikalakù ànu mwaba awu, bwalu kakùvwa kufwànyine kwikala mùshindù wà—wà kupetabò... . bwà bukwàbantu kwikalabù butùngùnùke to, bwalu kakùvwa kufwànyine kwikala kushàale bantu bakàji to. Evà nguvwa mufwànyine kwikala umwèpelè awu. Kàdi, nudi numòna's, kabèèna batèèla bwà di—dilediibwa dyà bânà bàà bakàji to, mu Bible, ki bwà cinyi bàvwa ànu ne cyà kwikala bapetè bânà bàà bakàji byà mwomùmwe ne bàà balùme.

582 Mpindyewu, mufùndi wa kale, umwe wa ku bafùndi bàà kalekale batùdi naabò, Josèphe, ùdi wàmba ne bààkalela bânà makùmì mwandamutekète, Adàmà ne Evà; umwe wa ku bafùndi bàà kale menemene, “bânà makùmì mwandamutekète, ne bônso bàvwa bânà bàà balùme ne bàà bakàjì.”

583 Mpindyewu, piikalàbi ne . . . Nènku dìbà adi piikalàbi ne Kaayinà wàkayà ku buloba bwà Nodà . . . Mpindyewu, nwènu baswè kumòna, mufùndi awu ùvwa mufùndi wa meeji matwè bikolè, bikolè mwab’ewu. Nukààvwakù bamòne mwàkàcitéèlaye anyi?

Mu Edènà, pààkapetàbo bânà bààbò balela abu mu Edènà . . . Mpindyewu, kî mmu budimi bwà Edènà to, mufùndi awu ùvwa mumanyè aci. Yônso udi mufunde kabèji aka awu kaaba aka, mmwambè ne: **Pàvwa Adàmà ne Evà bapetè bânà bààbò balela abu mu Edènà . . .**

584 Kamùvwa mu budimi bwà Edènà to, bwalu bàkaavwa bamanè kubìipata mu budimi bwà Edènà amu. Kàdi bàcìvwa ànu mu Edènà, ne budimi bwà Edènà bùvwa bùsanganyibwa ku esètè mu Edènà. Kàdi Edènà ùvwa mwenzè bu ditùnga anyi—anyi cidi . . . anyi province, nènku Nodà mwikàle province anyi ditùnga ditwàngàne naadi.

585 Mpindyewu, muntu umwèpelè uvwakù Kaayinà mufwànyine kwikala nendè, anyi musèle, ùvwa mufwànyine kwikala ànu mwanààbò wa bakàjì. Nànsha bìshi. Bwalu kùvwa ànu mulùme umwe ne mukàjì umwe kùvwabò mwà kwikala bapàtùkile, nwamònu’s, nènku bìvwa bìkèngela kusèlayè mwanààbò wa bakàjì sungasunga. Mpindyewu, aci cìvwa cìkùmbanangana ne mikenji mu miinè matùkù awu.

586 Ne Izàkà wàkasèla mwànà sungasunga wa buludi wa mànsèbendè, Rebekah, mulongolola kùdi Nzambi. Sarah ùvwa mwanààbò wa bakàjì ne Abraham, mwanààbò wa bakàjì mukwàtatwèndè; kàyì mukwàmamwèndè to, mukwàtatwèndè. Nwamònu’s, mwanààbò wa bakàjì wa mashi àmwè uvwa—uvwa Abraham musèle awu; bashiilàngàne ku baamaamù, kàdi taatù umwe.

587 Pa nàнку, nudi numòna’s, bwà kusèlangana mu bilongo musangu awu, kumpàlà kwà musùlù wà—wà mashi kulwawù mutekète mu bukwàbantu, bìvwa bìkùmbanangana ne mikenji ne bìmpè. Mpindyewu kabyèna nàнку to. Bu wèwè mwà kusèla mwanèènu wa bakàjì leelù ewu, ne kulela bânà, pàmwàpa mbafwànyine kwikala . . . èè, mbafwànyine ànu kwikala bakònyàngàle ne bikwàbò byônso. Nànsha mene too ne cilongo cyà lukòngò lwibìdi kabìvwa ànu bìkèngela kusèlanganabò to, nwamònu’s, mbwà musùlù wà mashi wùdi wènda wùlwa mutekète ne mashi ènda àteketa.

588 Kàdi cintu cimwèpelè cìvwa Kaayinà mwà kwikala mwenzè, cìvwa cyà ne, kusèla mwanààbò wa bakàjì sungasunga.

Nènku aku nkùvwà bânà . . . Wakangata mukàjèndè, wàkaya ku buloba bwà Nodà ne wàkamanyangana nendè, nènku kwòkù nkùwàkafùmà bâ—bânà abu. Nwamònu's, kùdì . . .

⁵⁸⁹ Nènku bu nwênù mwà kumòna, mu ndelàngànyì yà Kaayinà amu mmwàkapàtukà bantu bàà meeji matwè. Mu ndelàngànyì yà Setè mmwàkapàtukà batèndeleeedi, ndi muswè kwamba, mwonji wà—wà mvinyò wà bwakàne. Ànu kwòkù aku, babidì abu, ki kwàkalediibwà ndelàngànyì yittùdì twètù biikàlemu ne mwoyi leelù ewu aku.

⁵⁹⁰ Bu nwênù mwà kumòna leelù ewu mpindyewu (ànu bwà kujikija lukonko elu): ndelàngànyì yà Kaayinà ayi yìcìcìdikù, ne ndelàngànyì yà Setè yìcìcìdikù. Yònsò yìbìdì mmitùngùnùke ànu mùshindù wà mwomùmwe. Bânà bàà Kaayinà bàdì mu Jeffersonville emu dilòòlò edi, ne bânà bàà Setè bàdì mu Jeffersonville emu dilòòlò edi. Pàdì musulù wà mashi wùteketa ne wùshèèpeketa apu, kàdì ndelàngànyì ayi yìcìdì ànu mitùngùnùke.

⁵⁹¹ Mpindyewu, tàngilàayi. Bânà bàà Kaayinà bàvwa misangu yònsò ànu . . . ne kumpàlà kwà kabùtù kàà mvùla wa Noà, bòbò mbàvwà bantu bàà meeji matwè: beena maalu a mamanya, balongeshanganyì; ne batèndeleeedi bàà dikèma, kàdì bàvwa musumbà wùvwà mupiishìibwe. Nwamònu anyi? Tàngilaayaàku mpindyewu, bàvwa ànu mùvwà tatwàbò Kaayinà amu. Kaayinà, ùvwa mutèndeleeedi. Wàkaasa cyoshelu cilenga, ne kwenza èkèleeziyà mulenga, ne wàkateeta bwà kucivwija cyà cìmwènèka citàmbe kaacitanda kàvwà naakù Setè kuntwaku ku bulenga. Nuvwakù bamanyè nànkù anyi? Cyà bushùwà ne yèyè . . . Wàkalengeja cyoshelu aci ne bilòngò, ne kucilongolola bilenga, ne kucivwija cilenga; ne kwenzayè èkèleeziyà munène, wa katankù, mwalàbàle, bwalu ùvwa ùdyàmbidila ne ùvwa mwà kulengeleela Nzambì mu kwenza kwà nànkù.

⁵⁹² Kàdì Abèlè wàkaya kangata mwànà mukèsè wa mukòòkò, ne kubangayè kukòkangana nendè too ne ku cyoshelu, ne kumulààdikayè pa lubwebwe ne kumushebeyayè.

⁵⁹³ Nènku mpindyewu, Nzambì mwikàle mwakàne, bu ne cyònsò civwàYe ùlòmba civwa ànu dikuukwila, Kaayinà's wàkakuukwila Nzambì ne meeji matòoke àbùngì ànu bu mwàkenzà Abèlè. Bònsò bàbìdì bàvwa ne meeji matòoke. Bònsò bàbìdì bàvwa bàteeta bwà kulengeleela Nzambì. Kabàvwa beena dyabùlù to nànsha umwe wa kùdìbo. Bùbìdì bwàbò, kakùyì mpatà to, bàvwa beena kwitabuuja mu Yèhowàh. Mpindyewu, mwaba awu, aci's cìdì cìtùpèèsha cintu kampàndà cyà dyelanganapù meeji.

⁵⁹⁴ Bàmwe bantu, mwab'ewu dilòòlò edi, kacya ncitukù mwanji kubàmòna to; kacya ncitukù mwanji kunùmòna kwònsò eku to. Kàdì nudi ne cyà kumanya eci, ne kulama cyòcì eci mu meeji ènù. Nwamònu anyi? Nànsha wèwè mwikàle mutèndeleeedi

wa bìshi, aci kacyèna ne dipetangana nànsha dikesè ne cyôci aci to. Udi mufwànyine kwikala musòmbèle mu èkèleeziyà, udi mufwànyine kwikala ne meeji matòòke a menemene, kàdi ucìdi ànu mujimine! Nwamònu anyi?

⁵⁹⁵ Kàdi wêwè udi wamba ne: “Èè,” mùdi wamba, “bèètù bampaasàtàs mbàdi batàmbe kwikala bàà meeji matwè, mbapicile mu maasèminère bwà kupeta dilonga dyà ditàmbe bwimpè. Mbeena tèlòlìjì, mbamanyè tèlòlìjì yònsò—yònsò ne bikwàbò. Ne mbàà meeji matwè, balongèshìibwe, bàà menemene...basungula bàà batàmbe bwimpè batùdiku bamanyè.” Kàdi’s mbafwànyine ànu kwikala bajimine! Nwamònu anyi?

⁵⁹⁶ Mpindyewu Kaayinà, mu yèndè ndelàngànyì: bàvwa, muntu ne muntu, batèndeledi bàà dikèma; cisàmbà cyà cyèndè luumù cyà dikèma; ne bàvwa beena maalu a mamanya, ne bangàngàbukà, ne biibaki, ne benji bàà mudimu, ne bantu bàà meeji matwè. Kàdi bònsò bà ndelàngànyì ayi bààkabèngiibwa, kuumukila ànu ku Kaayinà too ne ku ndekeelu.

⁵⁹⁷ Kàdi ku luseke lwà Abèlè: bóbò kabàvwa biibaki anyi balongeshi bàà tulaasa anyi bantu bàà meeji matwè to; bóbò bàvwa, mu mùshindù kampànda, bàà mùshindù wà bamunyi bàà mìkòòkò, badìpwèkèshi, ne baabidimè, bàvwa bènda ànu mu Nyumà.

⁵⁹⁸ Mpindyewu, Bible mmwambè ne: “Kakwèna dipiilà nànsha dikesè to bwà aba bàdi mu Kilistò Yesù, bàdi kabàyi bènda bilondèshile mubidi to kàdi bilondèshile Nyumà.” Muntu wà nyumà awu ùdi ne musùukà wa nyumà wùdi kawùyìkù mwà kufwà nànsha. Kàdi muntu wa musunya ùdi ne cyuyüyà cyà butèndeledi cimunyungùlùkile (ne mmuswè kukuukwila ne bikwàbò) kadi ngwa musunya; kàyi mwena bupidyà to, kàdi mwena kwitabuuja wa musunya; nènku ki mùshindù wùvwà mubèngiibwe ngwòwò awu.

⁵⁹⁹ Mpindyewu, kuumukila apu, Kaayinà kuya kasèla mukàjèndè mu buloba bwà Nodà. Mpindyewu, kî mbambè ne Setè wàkasèla nganyi, anyi bakwàbò bààkasèla banganyi to. Kàdi cintu ciinè cilenga mu bwalu abu ncyà kumanya ne—ne, bwà kusèlangana kwà Kaayinà, twàmanyi kupeta dyandamuna ku bwalu abu. Bwalu bìvwa bikèngela bwà kusèlayè mwanààbò wa bakàjì, cyanàànà yéyè...cyanàànà kùvwa kufwànyine kwikala...

⁶⁰⁰ Kakùvwakù bakàjì bakwàbò pa buloba to, kàdi ànu bàvwa ne cyà kufùmina kùdi Evà. Yéyè nguvwa mamwèndè wa bònsò bàvwa ne mwoyi. Mbwena kwamba ne, bantu bònsò bàvwa ne mwoyi abu, yéyè nguvwa mamwàbò. Ki bwà cinyì yéyè ùvwa... Mwakù *Eva* wùdi wùmvwiya ne “mamwèndè wa bàdi ne mwoyi.” Ki kulwayè kulela mwànà ewu. Ki Kaayinà kusèlayè mwanààbò sungasunga wa bakàjì, civwà cifwànyine kwikala mùshindù

wùmwèpelè wùndiku mèmè mwà kumòna mwômù amu. Nènku kùvwà bantu ne mwoyi mu ditùkù adi, bulelèlè. Nwamònu anyi? Èè, ne . . .

Pàvwà Adàmà ne Evà bapetè bânà bààbò balela mu Edènà apu . . .Mpindyewu tângilàayi, ki lukonko ndwòlù alù: **Pàvwàbò bapetè bânà bààbò balela mu Edènà apu, kùvwakù bakwàbò bantu pa buloba mu ciine cikondo aci anyi? To! Pashiishe mu Genèsè 5.16, wamònu's, Kaayinà wàkasòmbela mu buloba bwà Nodà ne wàkamanyangana ne mukàjèndè.** Bushùwà. Nwamònu anyi?

⁶⁰¹ Awu n'Genèsè 1, mwàkafùkàYe muntu mu cimfwànyì Cyèndè Sungasunga, uvwà mu tèòfàní awu. Nènku mu Genèsè 2, kwenzela Yè muntu ku lupwishi lwà buloba, uvwa muntu wetù utùdì nendè mpindyewu ewu. Ki pahiishe, mu 3 mmwàkalwà cibùlà, ki kwipaciibwayè mu budimi bwà Edènà; ki pashiishe bânà kulelabò bânà. Kì Kaayinà kwangatayè mukàjèndè ne kusòmbayè nendè mu buloba bwà Nodà, pambèlu, bwalu Nzambì wàkamukòsolola ku bwobùmwè ne mwanààbò wa balùme (bwà bwalu bwà lufù lwà—lwà Abèlè). Nènku ki yèyè awu uvwayè nendè, mwanààbò sungasunga wa bakàji, ne kumusèlayè; ki mùshindù wùmwèpelè wùndiku, mèmè mwinè, mwà kumòna mwà—mwàkasèlanganàye.

⁶⁰² Mpindyewu, mbambè . . .Kàdi ndi ntèkemena ne balundà bàànyì bàà bafiike bàdi kaaba aka nebàmfwilàkù luse bwà dīyì edì, bwalu kakūyì mpatà to kì mbulelèlè to. Musàngu wà nzànzànzà wùngààkatwilàngànàku ne muntu kampànda kacya bàndela, paanyimà pàà mèmè mumanè kukùdimuna mucìma . . .Mvwa . . .mutwilàngàne ne Mwanèètù George DeArk ne bakwàbò abu. Nènku mvwa ngenda ngenda, ki Mukalenge kundombola ku kaaba kampànda kàà kakesè. Nènku bàvwà bàkokangana bwà kùvwà muntu mufiike mufùmìne. Ne bàvwà bàteeta bwà kwamba ne muntu mufiike . . .Ne Kaayinà wàkaselè nyama kampànda mufwànàngàne ne nsòkòmuntù, ne kwòkù aku ki kwàkafùminà cisà cyà bafiike. Mpindyewu, aci ncyà mafi! Kakūyì mpatà to, aci ncyà mafi! Nènku kanùtukù cyòcì aci nyama ku mikòlò to. Bwalu kakùvwà ní mmufiike ní mmutòoke, anyì ní mmukwàbò mushiilàngàne to, cìwà cisà ànu cimwèpelè cyà bantu too ne ku mvùla wa Noà. Pashiishe paanyimà pàà mvùla wa Noà ne kaleyì kàà Baabèlè, pàakabangàbo kutangalaka, ki pàakabangàbo kupeta meekala àbò awu ne bikwàbò. Bònsò mbafùmìne ku mucì wùmwèpelè wà mwomùmwè. Ncyà bushùwà menemene. Adàmà ne Evà mbàvwà taatù ne maamù, bàà pa buloba, bàà cifùkiibwà cyònsò cidì ne mwoyi cyà bantu bàkaadiku pa buloba. Ncyà bushùwà. Bafiike, batòoke, batòokòlòke, bafiikùlùke, bàà kàlaabi, diikala dyònsò dyùdì mufwànyìne kwikala naadì adi, aci kakūyì mpatà to mmwàba wùdì musòmbèle, ne mùshindì wùdì—wùdì . . .Ànu mùdì . . .

⁶⁰³ Ndi ngeela meeji ne ndi mufwànyine kwamba patòoke eci pàncìdipu apa. Bantu bàdi muneemu emu mpindyewu mu masungulujiangana ne mikenji ne bikwàbò bidìbo bàfila ebi aba, mémè ndi ngeela meeji ne mbyà macimbu. Ncyà bushùwà ne ki mùndi ngeela meeji. Tèelejàayi, lekèlaayi ànu bantu abu cyanààna, mbamanyè cìdìbo bàkèba. Nzambi wàkenza muntu mwikàle muntu mufiike, ne yèyè ùdi ne disànkà bwà cyòci aci. Kakùyì mpatà to! Bu Nzambi mungenzè muntu mufiike, mvwa mufwànyine kwikala ne disànkà bwà cyòci aci; bu Yèyè mungenzè muntu mufikùlùke, mvwa mufwànyine kwikala ne disànkà; pìikalà Ye mungenzè muntu mutòoke, ndi ne disànkà; bu Yèyè mungenzè muntu wa kàlaabi, mvwa mufwànyine kwikala ne disànkà. Nzambi mmutwènzè mu meekala ètù, ne Yèyè mmutwènzè mùvwàYe muswè bwètù twètù, ne tudi bònsò bânà Bèndè. Kakùyì mpatà to! Ne kabìvwa bikèngela kukòkanganabò ne kwenzabò maalu a lukutukutu mùshindù awu nànsha. Mbibi bwà kwenza nàнку. Kabìvwa bikèngela kucyènzabò to. Nzambi mmutwènzè . . . mùshindù wutùdi twètù baciswe.

⁶⁰⁴ Nèнку muntu mufiike, kì mmuswè kupàtuka kwàka bwà kunyangakaja lukòngò lwèndè—lwèndè anyì diikala dyèndè, bwà kudìsopakaja ne dyà batòoke ne byònsò byà mùshindù awu to. Mémè ncyèna mmudyula to. To. Muntu mufiike ùdi ne bintu bidì mutòoke kàyi nànsha naabi to. Kakùyì mpatà to! Ncyà bushùwà menemene. Ne Nzambi kàvwakù ne meeji a kwikalabò mùshindù awu to.

⁶⁰⁵ Èè, tàngilàayi. Muntu mufiike ùdi . . . ùdi—ùdi . . . ùdi ne—ùdi ne cilunji cyèndè yèyè cìdi mutòoke kacya kàyikù naaci to. Yèyè nkàcyùki myandà, “wèyemena Nzambi, ne ùlekela bikwàbò byònsò mwàyàbi mwinè amu”; ikalè naaci anyì kùkadi naaci, nànsha nàнку yèyè ùdi ne disànkà. Mémè ndi muswè kwikala ne byà nàнку búngì cyanààna, dilòòlò edi, cyà bushùwà nàнку. Èè, yèyè ùdi naabi, ne abi mbyèndè; kì mmuswè kucisopakaja ne cisà kampànda cikwàbò bwà kucinyangakaja to. Ncyà bushùwà menemene.

⁶⁰⁶ Ngeela meeji ne inàbànzà udi ku Shreveport kwàka awu wàkamba àmwè a ku mèyì matàmbè—matàmbè bwìmpè a dyela dyà nsèke ànkaadìku muumvwè mu nsòmbelu wanyì. Kwambayè dýì dyà dyela nsèke, ne ùledifundabò mu cibèjibeji. Kuseemenayè mwab'awu, kwambayè ne: “Mùshindù wùdi maalu aa ènda àya muneemu emu, mu disungulujiangana edi, mémè ncyèna muswè bwà bàànyì bânà kuyabò mu cilongelu cyà batòoke aci to.” Yèyè ne: “Kabààkubàcyùkakù mùvwàbi bifwànyine kwikala bòbò ne mulongeshi wa bafìike to.” Mukàjì awu mmukàjì wa meeji matwè. Ûvwa mumanyè cìvwàye wàmba aci, bàdi ne dilonga dyà kàlaasà ditàmbe bwìmpè. Ncyà bushùwà menemene. Pa nàнку ndi ngeela meeji ne bantu bàdi bènza bibi pa kwenza nàнку.

⁶⁰⁷ Nèнку dìbà adi bàdi bàmba ne: “Kaayinà ne Abèlè . . .” ne

bikwàbò byà mùshindù awu. To, mukalenge! Dikòbà kadivwa ne dipetangana ne abi to. Nyumà udi munda amu ngudi ne bwalu. Ncyà bushùwà menemene.

608 Pa nàнку Kaayinà wàkamanyangana ne mukàjèndè, ne yéyè awu úvwa mmwanààbò wa bakàji. Nèнку bòbò . . . wàkaya nendè ku buloba bwà Nodà, nèнку ki kwàkapàtùkilà bisàmbà binènè byà pa buloba: balongi bàà maalu a ntèndeleelu ne bakuukwidi.

609 Kàdi anji elàbi meeji leelù ewu, wéwè mulundà wanyì, anji imànà wèlanganèku ànu meeji bwà katancì. Bwà ne kùdi binunu makùmi misangu binunu makùmi ne binunu byà binunu byà binunu, byà bayi bàà mu maèkèleeziyà bàà kabàyi dyela mpatà to, biikàle ànu ne meeji matòoke ne badilàmbùle kùdi èkèleeziyà awu ne mwàbò mwònsò, biikàle bajimine kule ànu mùvwà Kaayinà amu. Nwamònu anyi? Nzambì Yéyè ngudi usungula! Nzambì Yéyè ngudi usungula! Nwamònu anyi? Nzambì ngUdi ufla luse! Diima kadyèna ne cyà dyambila mufwìmbi to, mmufwìmbi udi kumutù kwà diima. Ncyà bushùwà.

610 Mpindyewu lwà lulenga ndwòlù elu, lùdi lùlondà elu:

Mu Peetèlò Mwibìdi 2.4—2.4 . . .

611 Muntu udi ne Bible, yéyè muswè àbuululèku mu mifundu eyi lùkàsàlùkàsà pàncìdi nyibala apa, pawikalà muswè. Ne ànkwàcishèku ndambù kaaba aka, patùdi twangata lukonko elu apa.

612 Mpindyewu, pa Kaayinà ewu ne—ne bikwàbò, cyòci kaciyi cìsànkisha mpindyewu to, nwatùmanyishaayi. Netwikalè ne disànka . . .

613 Mpindyewu Peetèlò Mwibìdi 2.4. Èyo, mukalenge, mpòpò apa:

66. Peetèlò Mwibìdi 2.4: “Bwalu pùikalàbi ne Nzambì kí . . . Bwalu pùikalàbi ne Nzambì kàakalaminyina banjèlò bààkenzà mpèkaatù abu, kàdi wàkabàkùpa panshì mu ifernò,” dìbà adi bwà cinyi Kilistò wàkayiisha nyumà yà mu bùlokò ayi, mu Peetèlò wa Kumpàlà 3.19?

614 Mpindyewu, twàpecì Peetèlò 2.4, dyàmbedi. Èyo:

Bwalu pùikalàbi ne Nzambì kàakalaminyina banjèlò bààkenzà mpèkaatù abu, kàdi wàkabàkùpa panshì—panshì mu ifernò, ne—ne wàkabèèla mu nkànù yà midimà, bwà kulamiibwabò bwà cilumbulwidi;

615 Mpindyewu, mpindyewu tùjandulàayi mu Peetèlò wa Kumpàlà (awu m’Peetèlò Mwibìdi), Peetèlò wa Kumpàlà 3.19, tèelejàayi eci. Mpòpò apa, mwab’ewu mene. Eyi mmifume ku dimvwila, kabingilà kàdi kenzè ne ncùikadi muyifunde.

. . .kàbìdi . . . muyè kayiisha kùdi nyumà yà mu bùlokò ayi;

616 Kaa, èyowà's, s'ki bwalu mbwòbù ebu. Tùbangilààyikù ndambù kumpàlà kwà cyòci aci, mvensà wa 18:

*Bwalu Kilistò kàbidì. . . wàkakènga musangu wùmwe
bwà mpèkaatù, mwakàne bwà babì, bwà wàmòna mwà
kutùfikisha kùdì Nzambì, mushipùbwe mu mubidì, kàdì
muvwijùbwe ne mwoyi ku Nyumà:*

KwàkayàYe kàbidì kayiisha nyumà yà mu bùlokò;

Yìwà mu cikondo kampànda ne cishikù, . . .

617 Mulundà wanyì munanga, bu wèwè ànu mubalè mvensà udi ulonda awu, mwòmù amu mmùdìCi cicyùmwiye. Nwamònu anyi?

*Yìwà mu cikondo kampànda ne cishikù, yìwà
musangu kampànda wìwà lutùlù lwà Nzambì
lwìndilè mu matùkù a Noà, pàvwà bwàtù munkaci mwà
kulongolodiibwa, mùvwà bakesè menemene, mbwena
kwamba ne, misùùkà mwandamukùlu misùngidùbwe
ku màyi. (Nwamònu anyi?)*

618 Mpindyewu, bu nwènù mwà kumòna mwòmò emu, ngeela meeji ne muyiishi ewu ùdi ne lukwàbò pa. . .cintu kampànda mu meeji àmwèàmwe awu, lwìkalà mwà kwandamunyiibwa pashiishe ndambù.

619 Peetèlò wa Kumpàla 4. . .anyì 2.4, bu nwènù mwà kumòna, “bwalu piikalàbi ne Nzambì kàakalaminyina banjèlò,” *mwanjèlò* awu ùdi wàmbiibwa ku dileetà ku dileetà munyi? Dileetà dyà “m” dikesè. Nwamònu anyi? Mpindyewu, apa nùku, “nyumà yìwà mu bùlokò yìwà kayiyi minyingàlale mu lutùlù lwà mu matùkù a Noà ayi,” banjèlò bàmwèbàmwè abu's. Bàvwà mbantu: baamisànjeelà, bayiishi; “kàakalaminyina banjèlò to.” Nuvwakù bamanyè ne. . .mwakù *mwanjèlò* wùdi wùfuma ku mwakù “mùsànjeelà” anyi? Mbanganyi bàdì bamanyè ne *mwanjèlò* m“mùsànjeelà”? Kakùyì mpatà to, *mwanjèlò* mmùsànjeelà, “ne Yèyè kàakalaminyina banjèlò to.” Nwamònu anyi?

620 Ne mu Ebèlù emu, nudi bavùlùke ne tudi bacikenkète kùkaadi ndambù wa mbingu ne, “banjèlò” anyi?

621 Ne mu E- . . .mu Bwàkabuulwibwà amu ne: “Fùndilà *mwanjèlò* wa èkèleeziyà wa Saadi bintu ebi. Fùndilà *mwanjèlò* wa èkèleeziyà wa Efèsò bintu ebi. Fùndilà *mwanjèlò* wa èkèleeziyà. . .” Nudi bavùlùke aci anyi? Ki twètù kutàngila mwakù awu *mwanjèlò*, ne mu nkòngamyakù, ne kusangana ne wùdi wùmvwija “mùsànjeelà.” Ncifwànyine kwikala “mùsànjeelà pa buloba, mùsànjeelà mutàmbe mfùkilu,” mwakù awu *mwanjèlò*.

622 Nènku mu mùshindù awu, bu twètù mwà kwangata nkòngamyakù ne kuwùtàngila, nenùsanganè ne mmujuukile ku “baamisànjeelà, baamisànjeelà bàà kumpàla.” Nwamònu's: “Piikalàbi ne. . .Piikalàbi ne kàakalaminyina. . .Bwalu

pìikalàbi ne Nzambì kàakalaminyina banjèlò bààkenzà mpèkaatù,” (Nwamònu anyi?) “ne baakampànda bàà batàmbe-mfùkilu,” (Nwamònu anyi?) “paanyimà pàà dindila . . .”

Mpindyewu tàngilàayi, mmwambè ne:

. . . pìikalàbi ne . . . kàakalaminyina banjèlò bààkenzà mpèkaatù abu, kàdi wàkabàkùpa panshì mu ìfernò, ne mubèlè mu nkànù yà mîdimà, bwà kulamiibwabò bwà cilumbulwidì;

⁶²³ Pashiishe tàngilàayi kàbìdì mu Peetèlò wa Kumpàla emu, 3.19, tàngilàayi mpindyewu mùdì cyòci eci cibadiibwa:

Bwalu mwàkayàye kàbìdì kayiisha kùdì nyumà yà mu bùlokò ayi;

Yìwà mu cikondo kampànda ne cishìkù, yìwà musangu kampànda wùwà lutùulù lwà Nzambì lwindìle mu matùkù a Noà, (nwamònu's, bàwà mbaamisànjeelà bàà mu dìtùkù adi, bàwamisànjeelà) . . . pàvwà bwàtù munkaci mwà kulongolodiibwa, mùvwà . . . mbwena kwamba ne, misùukà mwandamukùlu misùngidìibwe ku màyi.

⁶²⁴ Mpindyewu bu nwènù mwà kumòna pàvwà bakampànda abu mu Dyulu. Mpindyewu, mu Bwàkabuulwibwà 11 . . . anyi nshapità wa 7, ngeela meeji . . . anyi to, to, nshapità wa 12. Ùdi ùfla cimfwànyì cyà mukàjì mwimàne; ngondo kumutù kwèndè ne dîbà . . . anyi, dîbà kumutù kwèndè ne ngondo mwinshì mwà makàsà èndè. Ki dragon mukùnze awu kwimanayè bwà kudyàye Mwànà awu pàvwàYè anu ne wàlediibù apu, ne kwangatayè mukilà wèndè e kukòkayè cyàbisàtù cimwè cyà mìtootò yà mu Dyulu ne kuyikùpayè pa buloba. Nuvwakù bamòne aci anyi? Mpindyewu, aci kî mbwena kwamba ne Sàtaanà ùdi ne—ne mukilà mule wùvwàye mukònye mujìngìle bantu to, kàdi “mmuyiiki wàkalondelanganàye,” e kukòka cyàbisàtù cimwè cyà mìtootò ayi. Mìtootò ayi yìvwà ndimiinu dyà Abraham.

⁶²⁵ Abraham wàkamba ne: “Kaa . . .”

⁶²⁶ Nzambì wàkambila Abraham ne: “Tàngilà mu maulu, ne balàbi bùngì bwà mìtootò ní udi mwà kuyìbala.”

⁶²⁷ Yèyè ne: “Ncyèna mwà kuyìbala to.”

⁶²⁸ KwambaYè ne: “Nànsha dimiinu dyèbè kwakwikalakù mwà kudibala to,” mìtootò ayi.

⁶²⁹ Mùtootò Wùdì wùkenkà wà mu Dìndà awu Nganyì? Yesù wa ku Nazàlètà, mutàmbe kubàlakana ukààvwakù musòmbèle mu mubidi wà buntu. Yèyè ki Mùtootò Wùdì wùkenkà ne wà mu Dìndà awu. Ne Yèyè ki Dimiinu dyà Abraham, dipàtùkile mu Izàkà. Nènku twètù, biikàle bafwè mu Kilistò, tudì tuvwàla Dimiinu dyà Abraham ne tudì bapyànyì bilondèshile mulayi.

630 Pa nàнку mìtootò yà mu dyulu yìwwa yìleeja nyumà yà bantu pànwapa. Nènku dragon mukùnze (Loomò, mu cikondo cyà dikèngeshangana dyèndè) pàkeelàye kàpa byàbisàtù bibìdì byà . . . anyi cyàbisàtù cimwè cyà mìtootò, ne kuyìkùpayè panshì apu, pàwwa mpà dipoopediibwa dyà pa nkùrusè dya Mukalenge wetù Yesù pààkaMubèngàbo ne Yèyè mwikàle. . . ne baMwelè pambèlu ne kabàyi Nendè bwalu nànsha bùmwè to; ki cyàbisàtù cimwè cyà mìtootò yà banjèlo, banjèlo abu ncyòci aci.

631 Nwamònu's, mu mubidi wèbè, munda mwèbè amu. . . (tudi ne lukonko lukwàbò pa bwalu abu, buludì, bwà kulwàndamuna byà bitàmbe bwìmpè). Pa nàнку pàwà. . . Munda mwèbè amu mùdi nyumà, muntu mukwàbò. Pambèlu pèèbè udi muntu umwèpelè, munda mwèbè mùdi muntu mukwàbò. Pa nàнку munda mwèbè ncyà citàmbe-mfùkìlu, pambèlu pèèbè ncyà mubidi. Nwamònu anyi? Nènku muntu ewu, wèwè mulombola kùdi Nyuma, kùdi Nzambì, wàkalwa mùsànjeelà wà Nzambì, anyi mwanjèlo. *Mùsànjeelà* wa Nzambì, *mwanjèlo* wa Nzambì, mmwakù wùmwèwùmwe awu; kwèna mwà kuwùtápulula to: mùsànjeelà wa Nzambì, anyi, mwanjèlo wa Nzambì.

632 Nènku udi ne bukòokeshi butàmbe bunène nganyi? Mmwanjèlo wa mu Dyulu anyi mmwanjèlo wa ku cyambilu? Ngwèpì udi naabù? S'mmwanjèlo wa ku cyambilu! Pòlò wàkamba ne: "Mwànjèlo wa mu Dyulu yèyè mulwè munùyiishè èvànjeeliyò mukwàbò nànsha wa bishi mushiilàngàne ne ùnkaadi mèmè muyiishè, mulawu wùmulandàle." Pa nàнку mwanjèlo mulaaba kùdi Nyumà Mwìmpè ne kùdi Dìyi ùdi wìmana ku luseke lwà Nzambì. Ncyà bushwà. Mu Dyulu, bukòokeshi bwèndè. . .

633 "Makolè ónsò mu Dyulu ne pa buloba mmafidiibwe mu cyanza Cyànyi. Ndàayi, ne Mèmè nénye neenù. Cyònsò cinùdi nwènù nuswika pa buloba aci, Mèmè nènciswikè mu Dyulu. Cinùdi nwènù nusùlula pa buloba aci, Mèmè nèncisùlulè mu Dyulu."

634 Kaa, Èkèleeziyà munène wa cijila wìkalapù mujingùlùle bukòokeshi bwèndè bwà kwenza bintu ebi's wè. Kàdi kùdi mpatà ne bwòwà ne dizakala bùngì cyanààna, bàdikonka ní byènzeka: "Mbifwànyine kwenzeka anyi?" Pàdìbi ànu ne aci cidikù, Èkèleeziyà kèna mwà kwimanakù kuulu to. Ne pàdi muyiiki wònsò wà bwòwà wùjìmina ne Nyumà Mwìmpè wàngata bukòntononyi bwònsò nkòong pa Èkèleeziyà, dìbà adi bwòwà bwònsò bwàyi, ne Èkèleeziyà awu ùdi ne bukolè. Nwamònu anyi? Mòna's, bàdi paanyimà pààbò ne byònsò bìdì naabi Dyulu abi. Bàdi mìlòpò yà ku Nkwasa wa butùmbi. Kakùyì mpatà to! Mùlòpò wà Kilistò ùdi ne bukòokeshi, ne byònsò bìdì naabi Kilistò mbyà mùlòpò awu. Ne Yèyè wàkamba ne: "Ndàayi pa buloba bujimà, nudi bantèmù Bàanyi paanyimà pàà Nyuma Mwìmpè mumanè kulwa pambidi pèenù." Ne ntèmù nganyi? Mmùlòpò; bùdiye naabù mbwà kulwa ne kufila bujaadiki bwà

cintu kampànda. Makòlè ònsò a mu Dyulu àdi ànu mu byanza byèbè mene amu! Kaa, citùdi tushàadila kacya twasòmba ncinyi? Ne èkèleeziyà ùkaadi mwatùke, ne twètù basòmbè katùyi ne citùdi twenza to. Mbwalu katwèna tujungulula bintu ebi to.

⁶³⁵ Mpindyewu, misùukà yìvwà mu bùlokò (yìvwà kayiyi minyingàlale ayi), kayìvwa Banjèlo bàvwà—bàvwà beediibwe panshi mu mmwènekèlu wa Banjèlo to, kàdi yìvwa nnyumà yà banjèlo bàvwà badishinde kumpàlà kwà difùkà dyà dyulu ne buloba ayi, kale wàwa pàvwà mvità minunkè mu Dyulu apu. Nènku Sàtaanà ne—ne dragon bààkalwangana mvità, ki pashiishe. . . anyi Mikàèlè ne—ne—ne dragon bààkalwangana mvità (ne Lusiferè). Nènku Lusiferè wàkiipaciibwa pàmwè ne bânà bèndè bònsò (banjèlò bònsò bàvwaye museeswishe abu), ne banjèlo abu kulwabò pa buloba ne kulwabò díbà adi ne bukòokeshi bwà kulwabò bantu. Nènku pààkenzàbo nànkù, apu ki “pààkamònà bânà bàà balùmè bàà Nzambi ne bânà bàà bakàjì bàà bantu bàvwa balenga, ne kubàngatabò bu bakàjì bàà nzùbu.”

⁶³⁶ Mbânà bàà balùmè bàà Nzambi. Mulùmè yònsò udi mulediibwe pa buloba apa mmwànà wa balùmè wa Nzambi. Nànsha yéyè ngènzàmpèkààtù anyi cidiye aci, yéyè mmwànà wa balùmè wa Nzambi. Mufùkiibwe mu cimfwànyì cyà Nzambi bwà butùmbi bwà Nzambi, mmufùkiibwe mùshindù awu. Kàdi Nzambi ku cibangidilu ùvwa mumanyè ne nganyì uvwa mwà kuMwakidila ne nganyì uvwa kàyi mwà kuMwakidila. Ki bwà cinyì Úvwa mwà kudyànjila kulongolola, anyi, kakùyi kudyànjila kulongolola to, kàdi ku didyànjila-kumanya Yéyè ùvwa mwà kwamba ne nganyì uvwa usùngidiibwa ne nganyì uvwa kàyi usùngidiibwa, bwalu Úvwa mumanyè ne mmuntu kaayi uvwa mwà kwangata nyumà kaayi.

⁶³⁷ Kàdi nyumà yàkafùmà ku Nkwasa wa butùmbi wa Nzambi, ne yìdi miimàne ku Nkwasa wa butùmbi wa Nzambi ayi, ne misòmbèlè. . . miliyaalà ne miliyaalà ne mikùngulù mileemile yà cikondo kumpàlà mene kwà dyulu ne buloba kubangabi, mu Bwikadi bwà Nzambi, nudi nwela meeji ne kî mmimanyè cintu nànsha cìmwè pa bìdi bitàngilà dikuukwila anyi? Nènku yìdi yilwa pa buloba ne yibwela buludì munda mwà bantu, ne yìkuukwila Nzambi! Kakùyi mpatà to, yìdi yìkuukwila Nzambi; ne yìdi ne dimanya dyà Nzambi, ne yìdi ne meeji matwè, ne budimù, ne dilonga dyà tulaasà, misangu yònsò. Kàdi Nzambi wàkayibenga kacya ànu ku cibangidilu!

⁶³⁸ Ki bwà cinyì, mulundà wanyì, buumambàlà bwà èkèleeziyà, anyi—anyì dimanya dyà tèòlòjì kampànda anyi cintu kampànda, kabyèna ne dipetangana naaCì to. Bikèngela cìikalè Mashì a Yesù Kilistò ne dileediibwa dipyadìpyà didì dikuswikakaja Nendè bu muntu umwèpèlè. Ki bwalu mbwòbù abu's.

⁶³⁹ Nzambi, ku cibangidilu pàvwàYe mumanyè ne. . . Balùmè

ne bakàjì bààkenjiibwa umwe, kabàyi bàbidì to, bààkenjiibwa umwe. Bààkatàpuludiibwa, ewu mutèeka mu mubidi ne ewu mu tèòfàní. Ùvwa mumanyè nàнку. Pa nàнку bwà kunùjaadikila cyôci aci: pààkenzà Nzambì mukàjì, Yèyè kààkangatakù lupwishi kampànda ne kumwenza mwàkenzàYe mulùme amu to; Yèyè wakapàtula lubadi mu luseke lwà Adàmà, ne mukàjì wàkalwa cintu cyangata ku mulùme (bwalu yèyè udi citùpà cyà mulùme). NwaCyũmvù mpindyewu anyì? Nwamònu anyì? Ki bwalu mbwòbù abu's.

⁶⁴⁰ Ki banjèlò mbòbò abu. Ne Nzambì ne nyumà udi muswikàkàne ne Nzambì bàdi Nyumà umwe. Ncyà bushùwà. Mpindyewu, Nyumà wa Nzambì udi musòmbèle mu Èkèleeziyà awu, n'Nyumà udi mufùmìne mu Dyulu, uvwa Nzambì mumanyè kumpàlà kwà difùkà dyà dyulu ne buloba, wàkabènga mashimi a dyabùlù awu. Ne kukèngelabì bwà nyumà awu kwangatayè mubidi wà musunya bwà kwikala...bwà kwangatayè mateeciibwa èndè. Bivwa bikèngela bwà kulwayè mubidi mùvwa mikwàbò eyi milwè amu, ne yònsò ayi yàkatèekiibwa pa cikòkedi cyà mwomùmwe. Nènku Nzambì, ku cibangidilu, ùvwa mumanyè nyumà yìvwà mwà, ne yìvwà kayìyi mwà. Ki bwalu mbwabù's. Démon awu ùdi ne lungènyi lwàbùngì mu mùshindù wà ne ùvwa ànu mufwànyìne kuseeswisha ne basungula mene, bu ne bìvwa mwà kwenzeka.

⁶⁴¹ Pa nàнку nyumà eyi, banjèlò bààkayiishà, bàvwà mu bùlokò; *banjèlo*, bu nwènu mwà kucimòna kaaba aka, cidi dileetà dyà “b” mukesè udi umvwija ne m’“muntu”; banjèlo, baamisanjèlèlè pa buloba apa. Bààkenza mpèkaatù, ne mùshindù wùmwepelè wùvwàbò bafwànyìne kwenza mpèkaatù wùvwa ngwà kubènga kwitabuujà! Ne mùshindù...Bàvwà ne yàbò ntèndeleeleu yà sungasunga, ne kabààkiitabuujà mukenji wà Noà to. Kabààkiitabuujà mukenji wà Henòkà to. Nènku bààkabènga Mukenji wàbò awu, “ne bààkapiishiibwa,” Bible mmwambè ne bààkapiishiibwa.

⁶⁴² Henòkà wàkabàmbila cipròfeta, wàmba ne: “Mukalenge ùlwalwa ne binunu dikùmì byà bansantu Bèndè.”

⁶⁴³ Nènku bààkamba bipròfeta. Nènku Noà wàkiibaka bwàtù, kàdi bòbò bààkamba ne: “Yèyè's mmunsantu mubùnguluki wa mu malaba! Mmukoleshi wa maalù! Cintu pààci ne mmvùla kacyèna cilwa to.” Ki bidimu lukàmà ne makùmì àbìdi kupitàbì, ne yèyè nguvwa ne ntèndeleeleu uvwa ne lupàndù mu yèyè, kùvwa njila wa dipàndukila mwenjìbwe, kadi bòbò bàvwà basànkìshìibwe mu ngiikàdìlù wabò awu.

⁶⁴⁴ Ki mùshindù wùdibi leelù ewu ne, bantu mbasànkìshìibwe mu ngiikàdìlù wabò. Kàdi kùdi njila wa dipàndukila, ne njila awu mmu Yesù Kilistò. Amen. Ki bwalu mbwòbù abu's: cisàmbà cimwècimwè aci, nyumà yimwèyimwè ayi.

645 Ne kakùyi mpatà to bàvwa batèndeledi, batèndeledi bàà dikèma, kàdi bààkapangila mucipù wà cipungidi.

646 Ki mùdibi kàbìdi leelù ewu. Bantu bàyaaya mu èkèleeziyà, ne bàkashàala bàà mu èkèleeziyà minène, ne bàteeta kwikalà muntu mutàmbe kumanyika mu cimenga. Bòbò baswè kukashàala bàà mu èkèleeziyà, bàdi bàsungula udi mutàmbe bunène mu cimenga amu, udi mutàmbe bwimpè ne udibò bèelela meeji bìmpè mu cimenga awu. Mùshindù mwinè wùdìbo bàpangila dibìikila kule ne kule's wè! Mùshindù mwinè wùdìbo bàCipangila's wè!

647 Mùshindù wùmwèpelè wuwikalàku mwà kumanya Yesù Kilistò nku dibuulula dyà nyumà, kakùyi ku tèlòlòjì anyi ku bungi bwà dilonga dyà Bible dyùdi wenza to. Nànsha wèwè mwikalè mwena Science Chrétienne, Méthodiste, Ntèmù wa Yèhowàh, anyi cyònsò cyùdi aci; nànsha wèwè mwikalè cinyi, kwàdyàkuCimanyinakù ku Dìyì to, Nyumà wa Nzambì ngudi ukubuulwilaYè. Ndibuulula dyà nyumà!

648 Pàvwà Adàmà, mu budimi bwà Edènà, ne Evà, pààkiipaciibwà bânà abu, ki Kaayinà ulwàlwa ne tèlòlòjì mwimpè ewu. Kwambayè ne: "S'bivwa bikèngela bwà Nzambì àmanyè ne tudi twenza eci nku—nku wànyì pàanyì mwoyi wònsò. Nèngiibakè cyoshelu cilenga, nèntèekèpu bilòngò, nèntèekèpu bimuma, nèncivwijè cilenga. Mbushùwà ne ndikù mwà kutuuyisha cilunji cyà Nzambì ku cyòci eci ne kuMuleeja ne ndi ne meeji matòoke mu mwoyi wànyì." Yèyè ùvwa mubingè pa bìdi bitàngila mùvwà Dìyì dyàmba amu; Nzambì ùvwa muswè dikuukudiibwa, ki kuyayè bwà kakuukwila. Kwenzayè mwaba mulenga wà dikuukwila, munène, kàtèdralè kalenga (mùdìbo bàkàbìikila leelù ewu amu). Ki yèyè kucyènza cimpè, kuciibakayè cimpè ne kutèekayèmu cyoshelu; yèyè kàvwa mwena dyabùlù to.

649 Kàdi Abèlè, pa Dìyì dyà Nzambì. . . Kakùvwa Bible mufùnda piinè apu to, kàdi Nzambì wàkamubuulwila ne kacivwa ncimuma cyàkatùpàtulà mu budimi bwà Edènà to, kacivwa mbimuma byà pommes bìvwà Adàmà ne Evà badyè to, kakùyi mpatà to civwa mbintu byà bulùme ne bukàjì bìvwà bibàtàpùlùle ne bibàkòsòlòle. Nèku mumanyè ne bààkalwa bàà cifwàkà, ne ku mashi a Adàmà, ne ku mashi a nyòka nkawàkabangà cyòci eci, Abèlè, ku dibuulula dyà kùdi Nzambì, wàkaya kangata mwànà wa mùkòòkò ne wàkamulàmbula. Ki Nzambì kwambaYè ne: "Ki Cyòci aci!" Bushùwà's.

650 Pààkatùulukàbo ku Mukùnà wà Dikùdimuka dyà mpàla, Yesu wàkambà ne: "Bantu bàdi bàmba ne Mémè Mwànà wa muntu Ndi Nganyi?"

651 "Bàmwè bàdi bàmba ne Wèwè udi 'Mòsà,' ne bàmwè bàdi bàmbà ne Wèwè udi 'Eliyà,' ne bàmwè bàdi bàmba ne Wèwè

udi ‘Yelèmiyà,’ ne bàmwè bàdi bàmba ne Wèwè udi ‘Mupròfeta awu.’”

652 Yèyè ne: “Kàdi nwènù nudi nwamba ne Ndi Nganyi?”

653 Peetèlò kwambayè ne: “Wèwè udi Kilstò, Mwànà wa Nzambì udi ne mwoyi.”

654 Yèyè kwamba ne: “Udi mubènèshìibwe, Simonà Bààyona, bwalu kí munyìinyi ne mashi bìdì bikubuulwile eci to.” (Tàngilààyi!) “Kí nnànsha ku dileetà, kí nnànsha ku kàlaasà kalonga to; kùtu mucìlongè mu sèminèrè kampànda, anyì muntu kampànda mukwambileci to. Kí mmunyìinyi ne mashi bìdì bikubuulwile eci to, kàdi Taatù Wanyi udi mu Dyulu ngudi mukubuulwileci. Nènku pa lubwebwe elu mpâNgìibakilà Èkèleeziyà Wanyi, ne biibi bya ifernò kabyèna mwà kuMutàmba bukolè to.” Kí bwalu mbwòbù abu’s. Kí Èkèleeziyà wa Nzambì udi ne mwoyi nyawù. Kí cyòci aci. Pa èkèleeziyà awu... Pa *dibuulula* adi, mpàdi Èkèleeziyà ewu mwibakila. Ndibuulula dyà kùdi Nzambì didi Nzambì mubuulùle, dyà ne Yesù Kilstò ùdi Mwànà wa Nzambì, ne wèwè wâMwitabi bu Musùngidi webè sungasunga, wumùkù ku lufù wâyi ku Mwoyi.

655 Ne Nyumà Mwîmpè ùdi munkaci mwà kutwà eku ne eku ne ùkwàta mudimu mu bidimba byà Mubidi ewu. Kí Èkèleeziyà nyawu! Nànsha mwikàle mupèlè, ne mu kaacitanda, ne nwènù biimànyine pambèlu mwinshì mwà mucì wà pin mu mwaba kampànda, nànsha piikàle penyi, nànsha cyòci ciikàle mu nzùbu wa muntu kampànda mu disangisha dyà mu musokoko, nànsha difwànyine kwikala penyi. Bulenga ne bikwàbò abi kí mbìdì bikwàta lungènyì lwà Nzambì nànsha. Mmeeji matòoke a mu mwoyi ku dibuulula dyà ne Yesù Kilstò mmuleejiibwe bu Mwànà wa Nzambì, Musùngidi wetù sungasunga. Amen!

656 Èkèlekèlè, tudi...kwenàku ulenga mikwàbo eyi to, bwà mutùyaaya emu, kí mmwòmò anyi?

657 Kí bôbò abu bàdi...bàakayiilàYe abu; banjèlo abu: baamisànjeelà, bayiishi abu, beena mamanya a mu mitù abu, baamisànjeelà bàvwà kabàyi biitàbùùje pàakayà Noà kabàyiisha ne kubàmbila ne: “Mona’s, bwelààyi mu bwàtù ebu.”

658 Kwambabò ne: “Anji tèelejààyi ànu munsantu mubùnguluki wa mu malaba ewu. Anji tèelejààyi ànu mukoleshu wa maalu wàwa. Mòna’s, kakwènà mvula to. Nganyi ukààdikù muumvwè cintu bu nànkù? Mòna’s, èkèlekèlè, twètù aba katùtukù ne maèkèleeziyà anyi? Katwènakù batèndeledi anyi?” Mòna’s, bôbò’s bàvwà batèndeledi’s!

659 Yesù wàkamba ne civwa ne cyà kwikala lukòngò lwàkapità ànu díbà adi alu, lùvwa ne cyà kwikala lwólò lukòngò alu lùvwa ne cyà kumwènèka cyàkàbìdì pabwìpì menemene ne Dilwa Dyèndè: “Ànu mwàkadìbi mu matùkù a Noà, kí mwikalàbi kàbìdì ku dilwa dyà Mwànà wa muntu. Bwalu bàvwà bàdya, bànwà, bàsèlangana, bàsèleshangana.” Bàvwà ne Reno, Nevada

kampànda musangu awu, mu mwaba kampànda. Bàvwa ne maalu a lukutukutu a mishindù yònsò àdibo naawù leelù ewu aa; bàndalala, bànyà mu masànka, bèelulwilangana, baseki ne bikwàbò; biikàle ne cimwènekeli cyà difwàna dyà Nzambi, kàdi bàvila Bulelèlè bwètù bwà cyà bushùwà ebu: cipungidi, Mukenji wà ngàsà. Nzambi munkaci mwà kusebela njila Wendè, ne ùpèèsha bantu cipungidi Cyèndè—Cyèndè, mùvwàbo mwà kupànduka; Cìvwa ne lupàndù munda mwàci, lupàndù ki lùvwa mwaba wà kupàndukila.

660 “Cìtùdì tukèbela lupàndù ciinè ncinyi?” Leelù ewu bantu bàdi bàmba ne: “Twètù katwènakù ne mwoyi mu mùshindù mwímpè wà bukalenge bwà mungàlààtà anyi? Cidi cìtùkèngelà ki cinyi?”

661 Nànsha twètù ne mwoyi mu bukalenge bwà mungàlààtà bwà mùshindù kaayi, tudi dijinga ne Mashì a Yesù Kilistò. Cyà bushùwà! Tudi dijinga ne Kilistò. Mèmè ndi ngaanyisha mùshindù wà bukalenge bwà mungàlààtà; aci kacýèna ne bwalu nànsha bùmwe, bwà dýenza ne lupàndù lwà musùukà to. Kakùyì mpatà to! Makalenge miinè awu’s neàpitè, ne ditùnga dyònsò nedipitè. Ne mèmè nkààdikù mwimanè ku luseke lwà . . . mwaba wàkiimanà baaPàlò, kàdi bikaadi bikèngela bwà kuumbula mu ntàntà wa mètres àsambòmbò mwinshì mwà buloba bwà kupeta nkwasà yàbò yà bukalenge mwaba wùvwàyi yìsanganyibwa. Baapàlò bònsò ne makalenge àbò a pa buloba ebu awu, ne bintu byàwù byònsò byà kabìyi nshindameenu abi nebipangilè ne nebiye mwamwamwa, kàdi Yèhowàh neàkookeshè kashidi, bwalu Yèyè ki Nzambi udi kàyi ufwà awu. Twètù tudi biimàne bashindàme pa Kilistò Yesù Lubwebwe, bwalu myaba mikwàbò yònsò nduntekà.

662 Nànsha byòbi ne . . . makalenge neàjuukè ne neàpangilè, kàdi kaa, kakwèna cintu nànsha cimwè . . . nànsha byòbi ne . . . ncintu kaayi; kakwèna cintu nànsha cimwè cìdiku mpindyewu, cintu nànsha cimwè cìcilwalwà, cintu nànsha cimwè (nzala anyi njìwù mikolè anyi nì ncinyi) cidi mwà kutùtápululakù ne dinanga dyà Nzambi didi mu Kilistò to. Pàdi muntu mulediibwe kùdì Nyumà wa Nzambi, kacýèna kàbìdì cifùkiibwà cyà cikondo to, kàdi yèyè ncifùkiibwà cyà Cyèndèlèlè. Amen. Ukaadi muumùke ku lufù muyè ku Mwoyi. Ukaadi muumùke ku . . . Ukaadi mupicile mu cintu pààci ne ncikondo, mubwelè mu Cyèndèlèlè. Kèna mwà kubùtukakù to! Ne Nzambi wàkadìcipa ne Yèyè neàmubiishe ku lufù mu matùkù a ndekeelu.

663 Pa nànkù bóbò bàdi mwà kwikala ne èkèleeziyà yènu minèna yònsò ayi, ne bikondo byènu byònsò byà dicyònkómoka abi, ne byònsò binùdì nujinga kwenza abi, ne kwenza minèkù yènu yà bundù ne manàyi ènu a Mubèlè awu, ne byàkudyà byà nsupù ne bikwàbò byònsò binùdì baswè kwenza abi; ne kwimanyika muyiishe kampànda wa mulongè tùlaasà mwaba awu. Pàmwàpa yèyè ùdi mwà kwenza mudimu mutàmbe bwímpè

mu cintu aci kutamba tunsongààlùmè kukesè twà kale tùdi katùyi nànsha tumanyè ABC etu. Kàdi mèmè ndi nkwàmbila bulelèlè ne, mbipicìibwe ne mèmè mwikàle ne nsongààlùmè udi kàyì mumanyè ABC ùnyiisha (mwikàle mumanyè Kilistò) pamutù pàà beena tèlòjì banène bónsò bàdi ne malonga ènù ónsò àdìbo mwà kudyèlela meeji awu. Kakùyì mpatà to!

⁶⁶⁴ Mu Kentucky emu, ànu àbìdì àdì pànshì aa, nsongààlùmè kampànda mukesè wa kale uvwa kàyì nànsha mumanyè kubala dìnà dyèndè sungasunga, kwambayè ne Mukalenge mmumubiikile bwà kuyiisha nènku mwikàle ùkèba nzùbu wa tùlaasà. Mòna's, bakòkeshi bàà cimenga kabààkaswàku bwà àmwàngatè to. Muiyishi munène kampànda kupicilayè mwaba awu ne dìnà bu njila wa ku màyi *mòna* bule, docteur kampànda munène mu tèlòjì, mòna's, kumushìilabò yèyè bwà àngatè cilongelu aci. Bushùwà's. Kwenzayè ditàbuluja dyà mbingu yìbìdì, musùukà nànsha wùmwe. Kàdi tatwèndè kwalukilayè, kwambayè ne: "Mpindyewu mushìilaayi àcyàngatè, mèmè ntu mfuta bitàdì, ndi ne bukenji bwà mwanàanyi kucyàngatayè. Nènku bivwa bikèngela bwà mwanàanyi wa balùme àcyàngatè pèndè."

⁶⁶⁵ Pa nàнку kwalukilayè bwà kusangana, ne kubàlòmba, bóbò kwamba ne: "Èè, netùmushìilè àcyàngatè bwà malòlò ówò makesè ngàbìdì." Kwenzabò nàнку ne kumushìilabò ùcyàngata bwà malòlò àbìdì.

⁶⁶⁶ Ki dilòlò adi nsongààlùmè wa kale mukesè awu kujuuka mwaba awu ne wa bwalu kàyì nànsha mumanyè kubala Bible to, kwambilayè muntu kampànda bwà àmubadilè mifundu. Kàdi dyà ùseemena pa cibumbà cyà ku cyambilu, kulaabiibwayè ne Nyumà Mwimpè. Nènku pàakayiishayè, bantu batwè ku makùmi àbìdì kulwabò ku cyoshelu; ne muiyishi muditu wa mènà awu kuyayè too ne ku Kàlvariyò wènda ùdila mwadi, ku cyoshelu.

⁶⁶⁷ Bushùwà's, mwanèètù, cìdì ne mushinga kì—kì mbyùdì mumanyè to, ng'Ewu ùdì mumanyè. Ki mmwènenù nyèyè awu, ki cìdì cikèngediibwà, bìdì bikèngela kumanya Kilistò. KuMumanya Yèyè, ki Mwoyi; kuMubènga, ndufù.

⁶⁶⁸ Tùyaayi lùkàsà ku nkonko yètù mikwàbò ayi, ku nkonko mpindyewu yiaayà ku Géorgie ayi:

67. Mabwe adi mu...àleeja cinyi mu Bwàkabuulwibwà 21.19 ne 20?

⁶⁶⁹ Panwikalà baswè kwangata dìbà bwà kubuulula Bibles yènù, byà bwalu katwèna ne dìbà dyàbùngì mpindyewu to, kàdi nènてete bwà kuyàndamuna lùkàsàlùkàsà. Bwàkabuulwibwà makùmi àbìdì ne...Ngeela meeji ne m'21.19 ne 20. Èyowà.

⁶⁷⁰ Èyo, mwòmò amu nenùjandulè ne yèyè ùvwa wàkula bwà mabwe àvwa miibakila mu nzùbu awu. Ne mabwe awu àvwa mbishìmikidi. Bu nwènù mwà kumòna...Ndi ngiitabuuja cyà bushùwà ne udi naaci mwaba awu, Mwanèètù Neville. Ne

dibwe dyônsò òwva cishimikidi. Kaciyi dibwe òmwè diikàle cishimikidi, ne makwàbò. . . Kàdi dibwe ne dibwe dyônsò òwva cishimikidi. Dibwe ne dibwe dyônsò òwva cishimikidi cyà dibà dyônsò. Ne kùwva mabwe dikùmi ne àbìdi. Ne bu nwènu mwà kumòna mabwe dikùmi ne àbìdi awu, kupèesha dibwe ne dibwe. . . Dyàmbedi kubanga ne yaspà, ne sardoine, ne bikwàbò mùshindù awu, bìleeja dibwe ne dibwe.

⁶⁷¹ Mu Bible amu nenùsanganè ne àwva àbìikidibwa ne mmabwe kampànda. Àmwè a ku ôwò ne dishiilangana ndambù, kacya kanùyikù banji kudyùmvwa to. Nwènu baalùje mèsù mu nkòngamyakù nenùsanganè ne ndibwè òmwè òmwè adi, cibì ànu ne òdìna dishiilàngàne; dishintùlùke.

⁶⁷² Kàdi bìdi bìbanga ne—ne yaspà. Yaspà òwva ndibwe dyà—dyà Benyàmìnà, anyì, dibwe dyà. . . kaa, mwànà a balùmè wa kumpàla awu, Luubènà. Dibwe dyà kumpàla òwva n’Luubènà, òwva diikàle yaspà. Dibwe dyà ndekeelu òwva m’Benyàmìnà, dibwe dyà ndekeelu kumutù.

⁶⁷³ Mpindyewu, mabwe dikùmi ne àbìdi pàwvwa paashila bishimikidi awu, mabwe awu—awu dikùmi ne àbìdi àwva malembeleja pa cibwikilu cyà pa cyàdi cyà Aalònà. Ne àwva—àwva àleeja ne, yèyè nguvwa mwakwidi munène wa—wa bisàmbà ebi. Dyônsò dyà ku mabwe àbò a cileledi awu mwòmò emu, mu citaata eci—eci. Ne pàwvwa bantu bà mòna citaata eci, bàwva bàjingulula ne Aalònà òwva mwakwidi munène wa cisàmbà cijimà aci, pàwvwa mòna dibwe dyà cileledi adi mu citaata eci.

⁶⁷⁴ Mpindyewu, patwàbwedi mu dinda emu mu diyiiisha dyà Mwanèètù Neville. Ne misangu yàbùngi bàwva bàlwa ne Ulimà-Tuumimà. Nudi nucimòna cifundibwe mu Bible bu mùshindù wà bàmanya ne mukenji wàbò wùwva Bulelèlè anyì to. Mabwe awu, pàwvwa mòna kwamba cìwva muntu awu mwambè, mupròfetà òwva wàmba cipròfetà, ne mabwe awu àwva àfila bukènkè ònsò pàmwè. Àwva ènza cisumbù cyà makènkè àwva àngacila ku dibwe dyà saafilà, ne dyà yaspà, ne dyà escarboucle, ne mabwe makwàbò ònsò awu àfila bukènkè bwàwù, cìwva cyènza diikala ònsò dilenga dyà mwanzankòngòlò òwva disambakajà cintu cyònsò aci pàmwè.

⁶⁷⁵ Mpindyewu, mpindyewu, leelù ewu, pààkumushiiwà Ulimà-Tuumimà awu pàmwè ne bwakwidi abu, mpindyewu Bible ewu ngudi Ulimà-Tuumimà wa Nzambì leelù. Ne pàdi muiishi ùyiisha, kaciyèna ne cyà kwikala ànu kaaba kakesè kàmwèpelè apa, ne ki pòpò apu pàdiye ùtèekela dyèndè ditèkemena nànsha; cidi ne cyà kwikala Bible mujimà mwikàle ùleeja mukenji wùdi muntu awu ùyiisha. Ki cintu ncyòci aci. Kaciyi ànu kaaba kàmwèpelè to, wàmba ne: “Èè, Bible ùdi wàmba cikampànda.” Kaa, bushùwà, ùdi wàmba bintu byàbùngi. Kàdi wèwè udi ne cyà kwenza bwà biteekiibwè byònsò

pàmwè. Nènku pàdi Nyumà wa Nzambi ùlwa ùbwela mu—mu Diyì, Ùdi ùbitèèka byònsò pàmwè ne ùfila Bukênkè bunène menemene bùmwpèlè, ne Bukênkè abu bùdi Yesù Kilistò. Amen.

⁶⁷⁶ Mpindiewu, mabwe dikùmi ne àbìdì aa àvwa mbishimikidi dikùmi ne bìbìdì byàkabangà ne Luubènà, ne Gaadà, ànu nàнку too ne ku Benyàminà; bisàmbà dikùmi ne bìbìdì, mabwe dikùmi ne àbìdì. Ne mabwe a mu Ntempèlù awu, mu Yèlusàlèmà mupyamùpyà wa mu Dyulu, cishimikidi cyònsò neciteekiibwe pa umwe wa ku bankambwà.

⁶⁷⁷ Mpindyewu tàngilàayi, nudi bamòne mabwe awu, mpindyewu nenùtangilè bankambwà abu baleejìibwe mu cintu kampàndà cikwàbò, ànu mu lukwàbò lukonko's.

68. Umvwijàku—Umvwijàku mwinàyi. . . nyama yinaayi ya mu Bwàkabuulwibwà 5 ayi.

⁶⁷⁸ Mwanèètù Neville, wèwè ne cyòci aci pabwìpì, anyi umwe wa ku nwènù aku, cyà Bwàkabuulwibwà 5, netùcìbalè bwà katanci kakesè cyanàànà. Nci—ncimfwànyì cilenga mwaba ewu cyà. . . Ncyòci eci, ndi naaci mèmè mwinè, Bwàkabuulwibwà nshapità mwi5:

Ne nàkamòna mu cyanza cyà dyàbalùmè cyà yèyè uvwa musòmbe pa—pa nkwasà wa butùmbi awu mukànda mufunda munda ne pambèlu ne—ne—ne paanyimà, mutwà bitampì mwandamutekète.

Nènku ndi. . .

⁶⁷⁹ Mpindyewu, awu kí mmwaba mwinè to. Ndi njinga kuya ànu kumpàla ndambù, nyama yinaayi ayi. Tùmonèbi, mvensà wa 14. Èyo, mukalenge. Mpindyewu mpòpò apa, ncyà bushùwà. Mpindyewu tubangilàayi ku—ku mvensà wa 12 eku, to, ngeela meeji. . . “Ne nyama yinaayi ayi yàkamba ne: ‘Amen.’” To, kùdì kaaba kakesè paanyimà pàà cyòci aci, Mwanèètù Neville. “Mònaayi, ngàkumvwa diyì. . .”

⁶⁸⁰ Twànjìbi kumòna, katanci kakesè cyanàànà, s'mvwa mpàbala ànu katanci aka's. Kaa, mpòpò apa, tubangilàayi ku mvensà mwi6. Mvensà mwi5:

Ne umwe wa ku bakùlù abu wàkangambila ne: Kùdidi to: mòna, Ntambwe wa cisàmbà cyà Yudà, Muji wà Davidi, wàcimunu bwà kubuulula mukànda, ne bwà kutùùla. . . bitampì byàwù.

Ne ngàkatàngila, nènku, . . . munkaci mwà nkwasà wa butùmbi ne. . . nyama yinaayi ayi, ne, munkaci mwà bakùlù, mùvwa mwimàne Mwànà wa mùkòòkò, bu uvwa mushebeya, mwikàle ne mitù mwandamutekète ne mèsù mwandamutekète, àdì Nyumà mwandamutekète. . . mitùma kùdì. . . pa buloba.

681 Ndi muswè nùlamè lukonko alu, ne mèmè nciyi mulùmvwijè kwinshì eku mu katanci kakesè emu to, Ndi muswè bwà nwalùmvlwìjakù, ndi muswè kwakulapù, “Nyumà mwandamutekètè yà mèsù mwandamutekètè àvwà pa Mwànà wa mùkòkò awu” awu. Kaa, aci’s ncintu cilenga cyà dikèma’s. (Ee, tudi baswè mpindyewu kwangata lukonko lwà mwanèètu wa balumè ewu elu.) Èyo, mpindyewu kanùpu aci mwoyi to.

Nènku yéyè wàkalwa ne wàkangata mukàndà mu cyanza cyà dyàbalùmè cyà yéyè uvwa musòmbe pa nkwasà wa butumbi awu.

Ne pàakamanàye kuwàngata, nyama yìnaayi ayi ne bakùlù makùmi àbìdì ne bànaayi abu bààkapòna panshì kumpàlà kwà mwànà wa mùkòòkò, . . . yònsò wa kùdìbo mwikàle ne nkòmbè, . . .

682 Mpindyewu, ayi ki—nyama yìnaayi—yìnaayi ayi kaaba aka, bu nwènù mwà kumòna. Mpindyewu tùtungunukàayi ne tùbalèku ànu too ne kwinshì ndambù:

. . .nkòmbè yà ngòlò, . . .myùle tètè ne mpànza ne mapembu . . .ne masambila a bansantu.

Ne bàvwa bìmba musambu mupyamùpyà, . . . Wèwè udi mwakànyine . . .(ne kutungunukabò ne kwenzabò . . .dikuukwila dyàbò dyònsò kùdì Mukalenge)

683 Mpindyewu, nyama yìnaayi ya mu Bwàkabuulwibwà eyi, bu nwènù mwà kuyimòna, mwaba wònsò . . .(Nwènù babadi bàà Bible, ne muntu wìkala mwà kutèèleja mukàbà wà mèyi ewu awu). Nyama yìnaayi ayi, yìvwa ne mpàla yìnaayi: umwe uvwa ne kwìsù bu kwà muntu, mukwàbò uvwa ne kwìsù bu kwà ngombe, ne mukwàbò ne kwìsù bu kwà nyuunyi wa mukankù, ne mukwàbò ne kwìsù bu kwà nyama wa ntambwe. Ne kayìvwakù yìya mitàngile paanyimà to, kayìvwakù mwà kuya mitàngile paanyimà to.

684 Mbanganyi bàdiku bavùlùke mukàndà wà kale wà Bwàkabuulwibwà awu pàakacìlongeshàbo kùkaadi bidimu, pàngàakangatà bidimu bitwè ku bìbìdì kaaba aka pa Mukàndà wà Bwàkabuulwibà awu? Bààbùngì bàà bikondo byà kale mbavùlùke.

685 Tàngilàayi, kayìvwakù mwà kuya cyànyimanyìma to, bwalu mùshindù wònsò wùvwàyi yìya awu yìvwa yìya kumpàla. Yòyi yìya mu *nùнку*, yìvwa yìya bu muntu; yòyi yìya mu *nùнку*, yìvwa yìya bu nyama wa ntambwe; yòyi yìya mu *nùнку*, yìvwa yìya bu nyuunyi wa mukankù; yòyi yìya mu *nùнку*, yìvwa yìya bu ngombe. Nwamònu’s, kayìvwakù mwà kuya cyànyimanyìma to, yìvwa yìya mitàngile kumpàla dìbà dyònsò.

686 Mpindyewu nyama yìnaayi ayi. Mpindyewu bwà kwangata cyòcì eci lùkàsàlùkàsà, bwalu ncyèna muswè kushàala ntàntà

mupitèpite bule pa cyôci eci to. Kàdi nyama yinaayi ayi. . . *Nyama*, mu Bible, ùdi ùleeja “bukole.” Nènku nudi numòna ne nyama eyi kuntwaku kayìwwa yìpàtukila mu dijiba anyi mu mbú mwaba kampànda yìpàtukamù to, kadi yìwwa ku Nkwasa wa butùmbi wa Nzambi, ne yìwwa yìkuukwila Nzambi. Nyama yinaayi ayi yìdi yùmvwija makolè ànaayi àdi àpàtuka mu buloba, ne makolè ànaayi awu àwwa ng’Èvànjeeliyò yinaayi: Maatàayi, Maakò, Luukà, ne Yone; umwe kèna wàmba bibèngangana ne mukwabò to.

⁶⁸⁷ Ne umwe wa ku yòyi, wa . . . Pàdi Èvànjeeliyò ùpàtuka bu nyama wa ntambwe, mmumishe mu dísù, ùdi ne bukitù; Èvànjeeliyò ùtu ne dikima bu dyà nyama wa ntambwe, ne ùdi mfùmù bu mùdi nyama wa ntambwe. Yèyè ùya ne mpàlà wa muntu, mmudimùke ne ne budimù mùdi muntu. Yèyè ùya bu nyuunyi wa mukankù, ùdi ne mapwàpà a lubilu ne mu maulu matùmbùke. Ùdi. . . Nudi bamòne cindì muswè kwamba aci anyi? Yèyè ùya bu ngombe, nkabalù kàà mudimu kàdi mwà kùkòka, ngombe wa mudimu udi ukòka bu—bu—bujitu bwà Èvànjeeliyò. Nyama yinaayi ayi yìwwa mmakolè ànaayi, àwà: Maatàayi, Maakò, Luukà, ne Yone; Èvànjeeliyò yinaayi yìdi yìkòbola mu Bwikadi bwà Nzambi. Cìwva. . .

⁶⁸⁸ Nwènù bamòne, yìwwa ne mèsù kumpàla ne paanyimà. Yìwwa—yìwva. . . Kwònsò kùvwàci cìya, cìwva cìleeja. Yìwva yimòna kwònsò kùwàyì yìya. Ne aci ki bukolè bwà Èvànjeeliyò pàdìbu bupàtuka, bùdi mwà. . . Ùdi ne budimù bwà muntu; ùdi ne lubilu lwà nyuunyi wa mukankù; ùdi ne—ne—ne—ne bukolè, bukolè bwà dikòka, bwambudi bwà bujitu mùdi ngombe; ùdi ne—ne dísù dyumisha ne bukitù bwà nyama wa ntambwe. Nwamònu’s, ng’Èvànjeeliyò yinaayi ayi, yìdi makolè ànaayi a Bwàkabuulwibwà, nshapità mwi4.

Èyo, mpindyewu lùdi lùlondà:

69. Bakùlù makùmi àbìdì ne bànaayi abu mbanganyi? Èyo, ngeela meeji ne alu ndufwànyine kwikala pa—pa. . . Bakùlù makùmi àbìdì ne bànaayi abu mbanganyi?

⁶⁸⁹ Mpindyewu alu lùdi ànu lupeepèle, tudi bafwànyine kuyakù. Bakùlù makùmi àbìdì ne bànaayi abu bàwva basòmbe kumpàlà kwà Nkwasa wa butùmbi. Aci mmu. . . Ngeela meeji ne mmu mvensà mwi4, mmùdìci cisanganyiibwa. “Ne kwàkapàtuka mukwabò. . .” Ndi muyè ku. . . Twànjìbi kumòna, ndi ne. . . 4.10.

⁶⁹⁰ Èyo, Bwàkabuulwibwà, nshapità mwi4, ku mvensà wa 10. Ncyà bushùwà. Netùfikèku.

Ne bakùlù makùmi àbìdì ne bànaayi abu bàakapòna panshì kumpàlà kwà yèyè uwu musòmbe pa nkwasa wa butùmbi awu, ne bàakakuukwila yèyè uwu ne mwoyi kashidi ne kashidi awu, ne bàakeela bifulu byàbò byà butùmbi kumpàlà kwà nkwasa wa butùmbi aku bàmba ne,

Wèwè udi mwakànyine, Éyì Mukalenge, bwà kupeta butùmbi ne luumù ne bukolè; bwalu wèwè ngudi mufiuke bintu byònsò, ne bwà disànkà dyèbè byòbì bidikù ne byàkafùkiibwa.

⁶⁹¹ Mpindyewu bakùlù makùmi àbìdì ne bànaayi. Mukùlù mmutàngidi. Mpindyewu mònaayi, bàvwa mbankambwà dikùmi ne bàbìdì ne bàpostòlò dikùmi ne bàbìdì. Ne bòbò bàvwa basòmbe, dikùmi ne bàbìdì ku luseke lùmwè ne dikùmi ne bàbìdì ku luseke lukwàbò. Ki bakùlù makùmi àbìdì ne bànaayi bàvwa mwaba awu abu, bàvwa biikàle bankambwà dikùmi ne bàbìdì ku luseke lùmwè, Dipungila Dikùlukulu; bàpostòlò dikùmi ne bàbìdì luseke lukwàbò, bàà Dipungila Dipyadìpyà. Yesù kàakambakù ne: “Nwènù nenwikalè basòmbe pa nkwas ya butùmbi dikùmi ne yìbìdì, nulumbulwisha bisàmbà dikùmi ne bibìdì bya Izàlèlèlà” anyì?

⁶⁹² Mpindyewu, bishimikidi abi. Tàngilàayi, mùdi mene ne mucì muntwamu. Ne mucì ku luseke ne ku luseke wùdi wùkwàma bimuma mìshindù dikùmi ne yìbìdì. Ne yìdi yìkwàma bimuma byàyi musangu wùmwè ku ngondo, cidì ciikàle ngondo dikùmi ne yìbìdì ku cidimu. Yìdi yìfila bimuma mìshindù dikùmi ne yìbìdì ku cidimu cyònsò pàdici cìpita apu. *Dikùmi ne ibìdì*, mu nombà wa “dikuukwila,” nudi numòna’s. Ne kùdi makùmi àbìdì ne kùdi bànaayi, bafwànyine kwikala makùmi àbìdì ne bànaayi, bàpostòlò dikùmi ne bàbìdì ne bankambwà dikùmi ne bàbìdì. Mbasòmbe ku Nkwasa wa butùmbi.

⁶⁹³ Èyo, mpindyewu mvensà mwi4, anyì, lukonko lwinàyi:

70. Mwonjì mukùnze wùvwa wùleeja cinyi mu Genèsè 38?

⁶⁹⁴ Mwonjì mukùnze awu, bu nwènù mwà kumòna, wùvwa n’Yudà. Ne yèyè ùvwa ne bàna bàà balùme, ne umwe wa ku bàna bèndè bàà balùme abu wàkasèla mukàji wa beena Kaanààna. Ne mukàji wa beena Kaanààna ewu kàvwakù ne bàna to, kàdi mwanèndè wa balùme awu kufwà. Musangu awu, mikenji musangu awu bivwa bikèngela kwangata. . . bikèngela bwà mwànà wa balùme uvwa ulonda kwangatayè mukàji wa mwanààbò awu, bwà kujuudilayè mufwè awu dimiinu. Kàdi muntu mukwàbò awu kàakatwà ku ciinè aci bwà kwenza cìvwa cikèngelà kwenzayè to, ki Mukalenge kumushebeya. Pashiishe ùvwa ne mwànà wa balùme mutekète; ki Yudà kwambayè ne: “Indilà too ne pààfikà mwànà wa balùme ewu. . . mukolè mu mùshindù wà usèdiibwa kùdiye.”

⁶⁹⁵ Kàdi pàakakolàye mu mùshindù wà ne ùvwa ne cyà kusèla mukàji uvwa wa bakùlù bèndè bàbìdì awu, èè, bivwa bimanya ne yèyè nguvwa wàngata mukàji awu díbà adi, bwà kujuudilayè bàna bààbò bàà balùme bàbìdì bàvwa. . . bàvwa bafwè kumpàlà kwèndè abu dimiinu. Yudà kàakapèèsha mukàji awu (mukàji wa beena Kaanààna awu) mwanèndè wa balùme to, mwànà wa balùme awu, kàdi wàkamulekela wèndela yèndè. Ki mùkàji awu

kumònayè ne ùvwa wènza bibi, ki kupàtuka e kudibwikilayè cibwikilu kwìsù, ne kusòmbayè mu mwaba wà bantu bònso mùdi ndumbà mufwànyine kusòmba amu.

⁶⁹⁶ Yudà wàkalwa mwaba awu e kwangatayè mukàji awu bu mukàjèndè, ne yèyè ùvwa ndumbà, ne wàkalààla nendè. Ne kwambayè, mukàji awu kwambayè ne: “Èè, ncinyi ciwàngeeeyekà bu cyeyà?” Ki yèyè. . . mukàji awu ne. . .

⁶⁹⁷ Yèyè ne: “Ndi mmupèèsha kâ—kànà kàà mbùji.” Yèyè ne: “Èè, mpèèshè cimanyinu cyà ne neucyènzè.” Ki mukàji awu kwangatayè mulangala wèndè awu ne citampì cyèndè ne bikwàbò, ne kubilamayè.

⁶⁹⁸ Nènku pàakatwàlâbo kànà kàà mbùji aku, kabàcivwa mwà kupeta ndumbà awu to, bwalu yèyè kàvwa ndumbà to.

⁶⁹⁹ Paanyimà pàà cikondo, yèyè kumwènèka ne ùvwa ne difù. Ne pàakalwàye kumwènèka ne ùvwa ne difù, kulwàbò kwambila Yudà ne: “Mukàj’ a mwanèbèè awu mmwendè bundumbà.” Bòbò ne: “Bwalu yèyè ùdi—ùdi ne difù, ne bânà bèèbè bàà balùme bònso babidi mbafwè.”

⁷⁰⁰ Yèyè ne: “Èè, nebàmubiikilè àpatukè, ne bàmwoshè.”

⁷⁰¹ Ki kutùmàyè mukenji kùdi Yudà, kwambayè ne: “Muntu udi mwenzè bwalu ebu awu, ki mwena mulangala ewu ne citampì eci.” Èyo, s’ùvwa ntatwèndè—mwenu.

⁷⁰² Ki kwambayè ne: “Mukàji awu mmwakàne kuntàmba mèmè.”

⁷⁰³ Mpindyewu, pàakamanyà mukàji awu ne bìvwa bikèngela bwà bânà bèndè kulediibwabò, bàvwa bàà mapàsà. Nènku pàvwà dipàsà adi. . . Mwànà wa kumpàla uvwa ne cyà kulediibwa, mu cilèlè cyà kale cyà beena Yudà, mwànà wa kumpàla ngudi ne bwanààbutè, mwànà wa kumpàla ku dipàtuka awu. Nènku yèyè awu, vùlukàayi ne, ki uvwa mwanèndè wa kumpàla. Nànsha umwe wa ku bakwàbò bânà bàà balùme abu kàvwaku mulelè bânà ne mukàji awu to. Kacya yèyè kàvwaku mwanji kulela mwànà to too ne pa diine dibà adi.

⁷⁰⁴ Kàdi pàakapàtukà mwanèndè wa kumpàlâ awu, cívwa ànu cyanza. Ki mukàji muleleshi kukùswikayè mukùsù mukùnze, bwalu mukùsù mukùnze wùvwa wàmba bwà bupikudi bìvwa mwànà wa balùme wa kumpàla wa virgò Màriyâ mwà kwikala. . . kwikala ne mukùsù mukùnze wà bupikudi.

⁷⁰⁵ Kàdi pàakakòkàye cyanza ne kucìpingaja munda, mukwabò awu kupàtukayè yèyè kumpàla. Nènku pàakenzàye nànu, muleleshi kwambayè ne: “Wenji nùnku bwà cinyi? Mukwàbò awu’s ngudi ne bwanààbutè.”

⁷⁰⁶ Nènku aci ki cìdì Genèsè 38 ùmvwija, nudi numòna’s. Mbwenà kwamba ne mwànà wa kumpàla ùvwa ùshààla too ne ku dilwa dyà Mukalenge Yesu Kilistò. Mbwenà kwamba ne wa kumpàla awu ùvwa mwinshì mwà mukenji wà bupikudi.

707 Nudi bamanyè ne ntu mwambè...kampundu kakesè aku, nudi bamanyè's, kängämbi aku ne, müvwà twisù twakù... ne bikwàbò byònsò, tuumaci twakù tùvwà tunyekàmija, kàdi, piikalàbi ne nkalediibwe ne bwanààbutè, mwànà wa mùkòòkò udi kàyi mwenzè bwalu ne mupwàngàne awu, ùvwà ùfwa pa mwaba wàkù. Ki cyòci aci.

708 Pa nàнку aci cìvwà mbwà bwanààbutè. Mwànà wa kumpàla wàkapàtuka munda mwà maamù awu, nènku bàakamòna cyanza aci (ki kumanyabò ne cìvwà cìfwànyìne kwalukila cyàkàbìdi). Nènku pàakatùmàye cyanza bwà kuleeja ne yèyè nguvwa naabù, yèyè nguvwa wa kumpàla, muleshi wàkaswikakù mwonjì mukùnze awu kàdi yèyè kukòka cyanza e kucyàluja. Nwamònu anyì? Kàdi, kakùyì mpatà to, yèyè nguvwa wa kumpàla. Ki cìvwà mwonjì mukùnze ncyòci aci, mwonjì mukùnze wùdi ne... mu Bible mujimà, cìvwà cyùmvwija bupikudi; ciikàle cìfùnkuna kumpàla ku mwànà wa kumpàla uvwa ulwa awu.

709 Kabalù kàà kumpàla kàvwà kàlediibwà, ngombe wa kumpàla ùvwà ùlediibwa, cyònsò cìvwàku aci, cintu cyònsò cìvwà cilediibwa cyà kumpàla aci (cìvwà cìlwa kumpàla aci) cìvwà mwinshì mwà bupikudi, bìvwà bikèngela cìpikudiibwè; bìvwà bikèngela bwà cintu cyònsò cìpikudiibwè! Àlèluuyàh! Kaa, aci's cidi cìntùpisha ne disànkà be. Nudi nucyùmvwà anyì? Bìvwà bikèngela bwà *wa kumpàla* àpikudiibwè. Cìvwà mmukenji. Dìnà dyà Mukalenge dibeneshiibwè!

710 Nènku pàakalediibwà Yesù Kilistò, Yèyè wàkapikula buloba bujimà. Cyà bushùwà, ncyàkenzàYe. Yèyè ùvwà Mupikudi wa cìfùkiibwà cyònsò cikaadìku cìfùkiibwe pa buloba. Yèyè nguvwa Mupikudi. Nènku ku... bupikudi bwònsò bùdi bùsanganyìibwa mu Yèyè, kakwènakù mùshindù mukwàbò wùdìbukù mwà kulwila ku byenzedi bìmpè, ku diya kashàala wa mu èkèleeziyà, ànyì nì ncinì cyònsò to; wèwè udi ne cyà kulwila ku mwonjì mukùnze awu, Mupikudi awu, Cilongo cìpikudi aci.

Èyo, mpindyewu lùdì lùlondà lùdi ne:

71. Mpenyi pàdi màtàpishì...Mmàtàpishì kaayi àdi àkèngela kutùma pa lufù lwà bantèmù bàbìdì bàà mu Bwàkabuulwibwà 11 abu?

Kaa, Mwanèètù Palmer, pawìkalàku kùyì mwà kwela nkonko kampàndà's wè!

711 Mpindyewu, bupikudi, myonjì eyi kaaba aka, mwonjì mukùnze ewu, tudi tumòna ne wùvwà wùmvwija bupikudi.

712 Mpindyewu lukonko lùdì lùlondà ndwòlù elu:

Mmàtàpishì kaayi mu Bwàkabuulwibwà 11?

713 Kùlwalwa cikondo...Mpindyewu apa nekwìkalè dyandamuna ku lukonko lùvwà lwandàmùnyìibwe dilòòlò adi,

lùvwa mulundà wanyì muiyishi mufunde pa bìdi bitàngilà beena Yuda, mùvwàbi mwà kwikala.

714 Mpindyewu beena Yuda aba bàdi ne bidimu bisàtù ne citùpà bibàlaya. Mbanganyi bàdi bamanyè nànkù? Mbingu makùmi mwandamutekète nyàakalayiibwà. Bambè ne: “Maasiyà nealwe ne neùmushiibwè munkàcinkaci amu.” Bidimu bisàtù ne citùpà ki byàkayiishà Kilistò, wàkashebeyiibwa menemene ànu mu bidimu bisàtù ne citùpà, bidimu bisàtù ne ngondo yisambòmbò mbyàkayiishàYe.

715 Ne pashiishe cinyangu cidì cifila kabùtù, mùské wà—wà baamùzùlùmanyì wà Omar wàkaashiibwa pa Buloba bwà Cijila; mwàkambà Nzambì, bidimu binunu bìbìdì ne nkàmà yitaanu kumpàla kwà kwenzekaci ne, necimanè mu mwaba awu. Mupròfetà wàkacimòna, ne pàakacimònàye, wàkamba ne: “Bàvwa mwà... Bàà Bisàmbà byà bèndè bàvwa mwà kubwàngata bu bwàbò bôbò too ne mùvwà cipungu cyà bàà Bisàmbà byà bèndè mwà kujika.”

716 Mpindyewu kucidi bidimu bisàtù ne citùpà bilaya. Nwènù bamòne, bantèmù bàà mu Bwàkabuulwibwà 11 aba bàdi bàmba cipròfetà, munda mwà matùkù cinunu ne nkàmà yìbìdì ne makùmi àsambòmbò; ànu bidimu bisàtù ne citùpà menemene. Mpindyewu...ne bàvwa bavwàle mifuku. Mpindyewu, tàngilàayi nùmimu mudimu wàbò wà bwambi awu, cidìbo. Mpindyewu, bantèmù bàbìdì aba mbashiipbwe.

717 Mpindyewu, kùdì...Bààkaalukila kùdì beena Yuda paanyimà pàà Dyambwibwa dyà Èkèleeziyà wa bàà Bisàmbà byà bèndè. Èkèleeziyà wa bàà Bisàmbà byà bèndè ùdi wàlukila Kumbèlu bwà Didya dyà Dibanji, ne ànu mwàkabwejiibwà Leebèkà mu nzùbù wa Abraham pàmwe ne Izàkà ne kusèlanganabò. Nènku Leebèkà ne Izàkà bààkapàtuka biikàle beena byònsò bìvwà Abraham naabi, byònsò byàkaya kùdì Izàkà. Kakùyì mpatà to! Ne kabìvwa mwà kulwa kùdì Izàkà pàvwà Izàkà kàyì mwanji kusèlangana dyàmbedi to. Kaa Àlèluuyàh! Ki bwalu mbwòbù abu's.

718 Ne Kilistò ùdi ushàala... Nzambì ùdi usòmbela mu mubidi mupwàngàne, wàkanyangukà awu mu kaabujimà kashidi ne Cyendèlèlè. Pààsèlanganà Mwànà wa mùkòòkò ne Mukàji-musèla mu Dyulu, ùdi ùpàtuka mwikàle mwena bintu byònsò. Kakùyì mpatà to! Izàkà ne Leebèkà bààkapàtuka biikàle beena bintu byònsò.

719 Ne pàcidi mushingà ewu wènzeka mu Dyulu apu, wà Mukàji-musèla awu, Mukàji-musèla wa bàà Bisàmbà byà bèndè biikàle bàsèlangana ne Mfùmù (Mwànà wa Nzambì), mu Butumbi; pàcidìbo bàsèlangana apu, kùdì bidimu bisàtù ne citùpà bìdi byènzekà pàdì... Mòsà ne Eliyà... .

720 Byòbì biine, kí nnè Mòsà kacya ùvwakù kàyipù to... to, mubidi wèndè bààkawàmbula e kuya naawù. Banjèlò

bàakamwangata, yèyè kàakateketangana to, kàakabola to. Yèyè ùwva cìfwànyikijilu cipwàngànè cyà Kilistò. Wàkafwà ne Banjèlò bàakamwambula e kuya nendè, ne nànsha dyabùlù kí mmumanyè mene kwàkajiikiibwàye to, ne wàkateeta bwà kukòkangana ne Mikàèlè Mwàrkanjèlò awu bwà dijiikiibwa dyèndè. Aci ncìdì Bible mwambè. Nzambì wàkamubàndisha mu Dyambwibwa.

⁷²¹ Ne Eliyà, pàwàye wènda wènda mwaba awu, mupròfetà wa Nzambì, kupwekayè ku Yadènè, kukòpolayè cinkutu cyèndè ne kucìtuutayè pa màyi, ne màyi àkakòsololoka ku dyàbalùmè ne ku dyàbakàjì. Yèyè kubànda ku mukùnà. Elishà kwambayè. . . Wàkamba ne: “Udi wenda undonda bwà cinyi?”

⁷²² Yèyè ne: “Ndi muswè bitùpà bibidì byà Nyumà webe.”

⁷²³ Yèyè ne: “Walòmbu cintu cikolè, kàdi wèwè mummòne pàndì nya apu.” Kushààlayè kacya ànu wàmutwìshila mèsù.

⁷²⁴ Ki paanyimà pàà katanci, mu Dyulu kufùmamù dikalù dyà mvità dyà kapyà ne Banjèlò bàà kapyà, tubalù twà kapyà, ki Eliyà kutùpikilayèmu e kubwelayè mu Butumbi. Kààkalabulaku lufù to, wàkatentemunyiibwa, bikèngela afwè!

⁷²⁵ Nènku bu nwénù mwà kutàngila bapròfetà bàbidì bàà mu Bwàkabuulwibwà 11 aba, bàdi bènza cintu ànu cyòci cìmwècìmwè cyàkenzà Mòsà ne Eliyà aci. Wèwè udi wamba ne: “Mwanèètù Branham, udi muswè kungambila ne Eliyà ne Mòsà bàcìdi ne mwoyi anyi?” Kakùyi mpatà to!

⁷²⁶ Mòna’s, kumpàlà kwà Mukùnà wà Dishintuluka dyà mpàla. . . Pa Mukùnà wa Dishintuluka dyà mpàla, kumpàlà kwà Yesù kuyaYè ku Kàlvariyo, s’ ki Mòsà ne Eliyà bònso bàbidì bàvwa biimàne mwaba awu bàyiikilangana Nendè abu. Cyà bushùwà, bàvwa mbòbò, kí mbafwè to. Ne bòbò kacya kabààkafwàku to; mbàà cìfwàkà, bikèngela bàfwe. Pa nànkù bàdi ànu mu mùshindù wà mutùmbishìibwe bindile cikondo aci.

⁷²⁷ Ne pashiishe pààpinganàbo ne kuyiishabò munda ànu mwà bidimu bisàtù ne citùpà menemene mu dilaabiibwa dyà Dibàtiiza dyà Nyumà Mwimpè, piikalà mabènesha muumùshìibwe ku bàà Bisàmbà byà bendè (ne Èkèleeziyà mwambwìbwe); ne èkèleeziyà wa mukwàte mashika, wa maalu a kwisùkwisù ùkaadi wa bènda bàkèbangana nendè bu mbwa, kùdì ba-communists ne kasumbù kàà cidiidi kàà beena Loomò, ne piikalàbo bènda bàkèbangana naabò ne bàshipiibwa. Bòbò—bòbò nebàshipiibwè díbà adi; bapròfetà aba bàdi bàyiisha munda mwà bidimu bisàtù ne citùpà, ne Bible mmwambè ne bààkashipiibwa mu munène. . . mu mùsèsù, wùdìbo bàbiikila mu nyumà ne, Sodomà ne Èjiipitù, mùvwà Mukalenge wetù mupoopèdiibwe pa nkùrusè amu. Amu mùvwà mmu Yelusàlèmà; nwamònu’s, mu Yelusàlèmà mwàmwa, mùdimu mùbiikidiibwa mu nyumà.

728 Ki bôbò kushààlabò balààle mu mùsèèsù munda mwà matùkù àsàtù a muunya ne a bufùku. Ki pashiishe ku ndekeelu kwà matùkù àsàtù ne citùpà awu, nyumà wa mwoyi wàkabwela munda mwàbò ne bàakabiika ku lufù. Bivwa bikèngela bwà kufwàbo bu bakwàbò bàà cifwàkà, bivwa bikèngela bwà kufwàbo. Nènku pàakashebeyàbo bayiishi bàbìdì aba . . .

729 Bàvwa bàyiisha bàlwishangana ne bubì, ne bàakapàtula kapyà mu dyulu. Wàkenzakù aci nganyi? Nwamònu anyi? Bàakapàtula bipùpù mu dyulu, ne bàakatuuta naabi buloba ne lùkàsà lwónsò . . . ne dìbà kanà dyónsò òvwàbo bôbò baswè adi. Ne bàakapàtula kapyà mu dyulu. Ne bàakiimanyika mvùla bwà kayìlòku to, ntàntà yónsò uvwàbò bôbò baswè awu. Abu bàvwa mbanganyi? Ànu Mòsà ne Eliyà menemene's. Ne s'ki bôbò bantèmù babìdì abu.

730 Ne pàakakèngeshàbo èkèleeziyà, anyi bàà pa buloba, ku diyiisha dyàbò adi; ne dipetulula dyà beena Yudà, ne dibààluja ku kanyinganyinga, bàbààluja ku kwitabuuja . . . Pàamònbò Yesù ùlwila Mukàjì-musèla, nebàmbè ne: "Mònaayi, ewu's ki Nzambì wetù Utùvwà bindile awu. N'Yèyè awu!" Kàdì Yèyè kèna ùbàlwila bôbò to; Yèyè mmulwilè Mukàj'Èndè-musèla. Ne Mukàj'Èndè-musèla . . .

731 Pàakabwelà Yòzefù mu Èjipitù, kàakangata bàna bààbò kuya naabò to, kàdì wàkapeta mukàj'èndè-musèla muntwamu. Kakùyi mpatà to! Kàdì pàakadimanyishàye kùdì bàna bààbò, kapàvwa muntu nànsha umwe mwaba awu to. Aci ncyà bushùwà menemene. Ne pàaDìmanyishàYe kùdì beena Yudà aba, kakwàkwikala muntu nànsha umwe to ànu beena Yudà. Ki bôbò abu bàakashebeyà Yòzefù, biimàne mwaba awu; ne yèyè kwamba ne: "Èè, mmèmè Yòzefù, mwanènù awu." Ki kwasayè mwadi.

732 Ki bôbò ne: "Mpindyewu tudi bamanyè ne twàbwelàkànyì, bwalu twètù mbàakamushebeyà."

733 Cintu cimwècimwè aci's, beena Yudà nebiikalè ne cikondo cyà lutàtù aci ànu pawwìpì menemene ne dilwa mpindyewu, dyà dikèngeshiibwa dyàbàsàkà ne kubààluja mu buloba bwàbò adi. Cìdì cibìipata ksh ksh byenzè mùdì cisùmbù cyà mìkòòkò yàlukila ku Mukùnà wà Kaamèlè kwàka.

734 Pààlwà Mukalenge Yesù bwà Mukàj'Èndè-musèla, ne bôbò bàMumòna, nebàmbè ne: "Ki Yèyè utùvwà bindile wàwa, n'Yèyè wàwa!" Yèyè neàjuukè ne dyondopa mu mapwàpwà Èndè. Ncyà bushùwà.

735 Ne èkèleeziyà, bàshààdilè bàà beena Yudà abu, ndekeelu wa byónsò pàashebeyàbo baprófeta bàbìdì aba, ne pàashààlábò balààle mu mùsèèsù wùdì wùbìikidiibwà mu nyumà ne n'Sodomà ne Èjiipitù, mwàkapòòpelàbo Mukalenge wetù pa nkùrusè amu, bàdì bàtùminangana màtàpishì muntu ne mukwèndè (bàà pa buloba bènza nànkus').

⁷³⁶ Mpindyewu, Mwanèètù Palmer, s'ki bwalu mbwòbù ebu. Alùjaayi mèsù mu bwalu-bulonda bwà Loomò nènku nenùsanganè ne kùdi ditùngà ànu òm̀wèpelè pa buloba bujimà dikaadiku ditùminàngàne màtàpishì paanyimà pàà mvità, m'Bukalenge bwalàbàlè bwà Loomò.

⁷³⁷ Ki bwà cinyi ndi ngamba ne mufwilakanyi ne Kilstò ùdi ùpàtukila mu Loomò. Nyama wa lwonji ùdi ùpàtukila mu Loomò, kèna mwà kupàtukila mu Moscou to. Ùdi ùfùmina ku Loomò, dragon mukunze uvwa mwimàne kumpàlà kwà mukàji bwà kudyàye Mwanèndè pàdiYe ànu ne wàlediibù apu awu. Démon awu, démon awu ùvwa penyì? Ùvwa nganyi? César Auguste wàkatùma bantu bwà kushebeyabò bàna bònso kuumukila ku bidimu bibidi too ne kwinshi awu. Dragon mukunze awu, dragon awu, *nyama* ùdi ùm̀vwija ne “bukolè.” Bukòòkeshi bwà Loomò mbwàkakèngeshanganà ne kuteeta bwà kupeta Mwànà Kilstò awu.

⁷³⁸ Nènku cintu cìmwècìmwè aci's! Musangu wònso wùvwà beena Loomò, beena Loomò wa cimpàngaanù awu ne ciibidilu cyà kupeta bucìmunyi bunène, bàvwa bàtùminangana mabwe matòòke munkaci mwàbò, bu màtàpishì mùshindù awu, bu bivùlukilu. Pa nànkù mabwe awu àvwà... Cìvwàwu, tùvwa ntuumàtàpishì tutùminangana munkaci mwà èkèleeziyà wa cyena Loomò. Kakùyi mpatà to! Menemene. Bìdi ne cyà kwikala nànkù.

⁷³⁹ Ngàkiimana ànu mwaba awu mene mu Cimenga cyà Vatican mwàmwa ne kucikenketa ne Bible. Paapà muvwàle cifulu cyà butùmbi cyà ntòndo yisàtù, *Vicarius Filii Dei*, bintu byònso bìnkaavwà muumvùumvwe abi ne bikwàbò, s'mbulelèlà ànu bwà kabùyi dyela mpatà ebu; cisùmbù cyà ntèndeelèlu cidi cìlombolà ditùngà ne ditùngà dyònso didi mwinshi mwà Dyulu, ne neyòcì cidi cìlombolà. Ki bwalu mbwòbù abu's, ki mùdìbi.

⁷⁴⁰ Ncyèna cilumbù ne beena Kàtòlikè to (bwàlà's, mukalenge), bóbò mbìmpè ànu mùdi muntu mukwàbò kanà yònso ewu amu, kàdi ntèndeelèlu wabò ngudi wa mashimi bilondèshile Bible ewu. Pìikalàbi ne Bible ewu mmubingè, bóbò mbàdi bapìile. Bóbò bàdi bàmba ne kabèèna... “Cidi Bible wàmba nànsha ciikàle cinyi, ànu cidi èkèleeziyà wàmba aci.” Twètù tudi twitabuuja ne Bible ngudi wakula ne bukòòkeshi bùdi kumutù kwà byònso! Kakùyi mpatà to, n'Dìyì dyà Nzambi.

⁷⁴¹ Nènku nudi numòna mwaba awu, mabwe àvwà matùminangana musangu awu awu, a mu Bwàkabuulwibwà emu awu, mma—mmabwe àvwà màtàpishì àvwà matùminangana munkaci mwàbò. Ncidi ànu cìleeja... Bible mmwambè, mu Bwàkabuulwibwà mwaba ewu, mmwambè ne: “Ewu udi ne lungènyi ènzè makùmì a nombà wa nyama wa lwonji. Ewu udi ne lungènyi ènzè *cikampànda*. Ewu udi

ne nyumà wa mapà kampànda awu ènzè *cikampànda*.” Nudi numòna mùdi èkèleeziyà mupangile anyi?

⁷⁴² Nsongàalùmè kampànda mmungeelè lukonko mu dindà emu pa bidì bitàngilà mapà a Nyumà, pa bidì bitàngilà dyakula dyà mu myakulu. Nsongàalùmè wa citende’s, wa meeji matòòkè a dikèma, ngeela meeji ne ùdi ne cyà kwikala mwambi òmwè dyà ku matùkù àdi panshì aa. Nènku pa bidì bitàngilà èkèleeziyà, mèmè kwamba ne: “Kùdi byàbúngì bidì ànu byà musunya. Twètù katwèna baswè abi to, kàdi tudi tukèba cintu cilelèlà. Ki citùdi tujinga.”

⁷⁴³ Kwèna mwà kudìtwa mu dicìlongesha mu èkèleeziyà to; mu katanci, udi upeta, umwe ùdi ne mwakulu, umwe ùdi ne musambu, pashìshe cikaadi mvità bwà kubyùmusha. Kadi pàdi Nzambi mufle dipà mu budìshikaminyi, nedìdimwènèshè dyòdi nkààyaadi. Ncyà bushùwà. Nwamònu’s, ki mapà a Nzambi ngòwò awu, ki àdiYe ùtùmina Èkèleeziyà bwà bucìmunyi.

⁷⁴⁴ Mpindyewu, mufwilakanyi ne Kilistò ùtu ne cintu kampànda cyenzè bu byà wìtaba ne byà ùbènga, ùdi ne—ne—ne mùshindù munyangakaja wà kucyènza. Nènku abu mbukalenge bwalàbàlè bwà Loomò bùdi bùtuminanganà màpà munkaci mwàbò, màpà a mu mubidi. Nzambi ùtu ùtùmina bacìmunyi mapà a Nyumà; beena Loomò bàdi bàtùminangana mapà a mu mubidi.

⁷⁴⁵ Tudi twitabuuja ne Nyumà Mwímpè n’Nyumà, tudi tuMupeta ku dibàtiiza dìdi difùminà ku Dyulu.

⁷⁴⁶ Èkèleeziyà wa Kàtòlikè ùdi ùlongesha ne: “Ukàristiyà munsantu ùdi mmubidi wà Kilistò; mu mùshindù wà ne paùdi wangata dyàmpa edi ne kòsher ewu, *didi* Spiritù Munsantu, Nyumà Mwímpè, ukàristiyà munsantu.” Nwamònu anyi?

⁷⁴⁷ Twètù tudi twitabuuja ne nkapese kàà dyàmpà, katwèna twitabuuja ne mmubidi wà Kilistò to, (tudi tudìlongolola bwà kucyàngata mu tusunsa tukesè emu). Tudi twitabuuja ne kàdi kàleeja mubidi wa Kilistò. Kadi kakèena. . .

⁷⁴⁸ Ki dishìilangana dìdi pankaci pàà dilongesha dyà Kàtòlikè ne dyà Mishòònyì ndyòdi adi. Nwamònu anyi? Èkèleeziyà wa Kàtòlikè ùdi wamba ne: “Mubidi awu ùdi. . . Dyàmpà adi *didi* mmubidi mwena diinà. Èkèleeziyà ùdi ne bukòlè bwà kushintulula cyòci eci.” Nukààdikù bamòne mwena Kàtòlikè pàdiye ùpìcila ku èkèleeziyà, winamija mutù, ùfùnda nkùrusè apu anyi? Nènku mbwalu kaabukènkè kakesè aku kàdi kàteema mu èkèleeziyà amu mwinshì mwà kaatàbèrnaclè kakesè aku. Kàdi ne kaabukènkè kakesè mundà amu, ne kaadyàmpà kàà kòsher aku kàdi kàsanganyibwa mwómù amu. “Nènku aci mmubidi wà Kilistò. Ne paùdi wangata aci, kakùyì mpatà to udi munkaci mwà kwangata mubidi mwena diinà wà Kilistò dìbà dyà kòmunyò webè wa kumpàla ne kòmfeesiyo webè adi ne bikwàbò. Udi munkaci mwà kwangata, mu bushùwà, mubidi wà Kilistò.”

⁷⁴⁹ Twètù tudi twamba ne kàdi *kàleeja* mubidi wà Kilistò, nwamònu's, bwà ne kakèènakù cingà cintu to ànu kapese kàa dyàmpà kèètù aka. Ne nànsha bu ne kakàvwa mene kaadyàmpà to, bu ne kàvwa kantu kàa cyanààna, kàvwa ne cyà kuleeja ànu cintu cimwècimwè aci. Ànu—ànu menemene. Nànsha byôbi ne bàdi. . .

⁷⁵⁰ Mùdì bantu aba bàdi bàmba ne: “Mémè ncyèna muswè kubàtìijibwa mu ciinà cya màyi to, ndi muswè kubatìijibbwa mu musùlù.”

⁷⁵¹ Mbishìilàngàne ku cinyi's, pàdibi ne udi mubàtìijibwe? Byôbi ne mmu ciinà cyà màyi, ne. . . Mòna's, Filipò wàkabàtìijibwa mu ciinà. . . pàakabàtìijibwà mutungu awu apu. Pàakabàtìizà Filipò mutungu awu mu ciinà cya màyi apu, Nyumà Mwîmpè's wàkamwambula mu mùshindù wà ne Wàkangata Filipò kuya nendè, kabàyikù mwà kumumòna to mu ntàntà wa kilòmèetà nkàmà yisàtù ne makùmi àbìdì. KuMwambula mu Nyumà, kumupèèsha di—dikalù dyà mvità difùmìne buludì mu Dyulu bwà ntàntà wa kilòmèetà nkàmà yisàtù ne makùmi àbìdì. Amen. Bilenga be!

Mpindyewu:

Bansantu nebìikalè penyì paanyimà pàa bukalenge bwà bidimu cinunu? Ne mmubidì wà mùshindù kaayi wikalàbo naawù? Nèngàalukilè ku alu nàнку mu katanci emu. [Mwanèètù Branham ùdi wàndamuna ku lukonko elu kubangila ku kasaka kàa 820, bu lukonko lwà 74—Muf.] Nebìikalè ne Yesù.

⁷⁵² Èyo, lukonko lwà—lwà mwandamutekète:

72. Mmunyì mutwàlumbulwishà banjèlo?

⁷⁵³ Aci cidi cisanganyibwa mu. . . Mmunyì mutwàlumbulwishà banjèlo? Mu diikala bânà bàà balùme ne bàà bakàji bàà Nzambi. Banjèlo mbasadidi; twètù tudi bânà bàà balùme ne bàà bakàji bàà Nzambi. Ne Bible mmwambè ne twètù netùlumbulwishè banjèlo. Ncyà bushùwà. Mpindyewu, mpindyewu bu nwènu mwà. . .

Lukonko lwà 8:

73. Bwà cinyì nsukì bwà bwalu bwà banjèlo yà mu Kolintò wa Kumpàlà?

⁷⁵⁴ Mpindyewu muntu àmpetèlèku Kolintò wa Kumpàla, nshapità wa—wa 11, nènku netùmonè mwômò amu, bwà nwènu kujandula ne—ne. . . Mu Kolintò wa Kumpàla, ku—ku wa 11, tudi tusangana ne Pòlò ngudi wakula. Ngǎnji nyekù bwà katanci kakesè cyanààna, nènku pashiishe netùcibalè lùkàsàlùkàsà ne pashiishe netù—netùcyàngatè.

⁷⁵⁵ Ndi ne cintu cyà kwamba pa mvensà mukwàbò ewu kaaba aka, cindì ntèkemena ne Mukalenge neàtùpèèshèci mùshindù wùdì wùkèngela bwà twètù kwikala naaci. Muntu yèye

mumupetè. . . Ngeela meeji ne nnshapitá wa 11, èyowá's, èyo. Mpindyewu tèelejàayi ne ntèmà, ne ntèmà yónsò mpindyewu, bwà nwènù kuumvwa. Mpindyewu angàtà kondò kèèbè kàà mwoyi ùkèlè mu mpaayà wa kàzakù kèèbè amu too ne pàngaàbalá cyòci eci, udi umòna's, kwelaPù nseke. Tèelejàayi ne ntèmà yà yónsò, eci ng'EMU MMÛDÌ MUKALENGE WAMBÁ:

Ikálaayi bandondi bàanyi, ànu mûndi mêmè. . . wa Kilistò amu. (Pòlò mmwambè ne: “Nùndondaayi mêmè, ànu mûndi mêmè ndonda Kilistò amu.”)

Mpindyewu ndi nnùtumbisha, bàna bèètù, munùdi nwènù numvùluka mu maalu ónsò, ne nulama mikenji, mûntù mêmè muyifile. . . kunùdi nwènù.

Kàdi ndi muswè bwà nùmanyè ne, mutù wà mulùme yónsò n'Kilistò; ne mutù wà mukàji mmulùme; ne mutù wa Kilistò n'Nzambì.

⁷⁵⁶ Nudi numòna mùdìbi amu anyi? Nzambì, Kilistò, mulùme, mukàji. Mpindyewu:

Mulùme yónsò udi usambila anyi wàmba cipròfetà, mwikàle ne mutù mubwikila, ùdi ùfwisha Kilistò bundù.

Kàdi mukàji yónsò udi usambila anyi wàmba cipròfetà mwikàle ne mutù kawùyi mubwikila ùdi ùfwisha mutù wèndè bundù: . . .

⁷⁵⁷ Mpindyewu tudi twangata ànu katancì kakesè cyanààna, bwà kunùleeja ne nsukì bwà mukàji ki cibwikilu cyèndè:

. . . bwà cyòci aci. . . mbyenzè ànu bu ne ùvwa mukungula. (Aci cìdi cyùmvwija ne bu—bu yéyè mwà kujinga kukòsa nsukì yèndè, dîbà adi àyikungulè yónsò.)

Bwalu mukàji yéyè kàyi mubwikila to, àdikòsèshè kàbìdì nsukì yónsò: (mudikòsèshe nsukì yónsò mbwena kwamba ne mudikungwishe nsukì, nwamònu's) . . . *kàdi byòbì byènza bundù bwà mukàji kudikòseshayè nsukì yónsò anyi kudikungwishayè nsukì, ikalè mubwikila.*

⁷⁵⁸ Mpindyewu tudi tupweka buludì ku lukonko lùdi wela elu. Nwamònu anyi? Èyo, mpindyewu mbibì bwà—bwà inàbànzà kukòsayè nsukì yèndè, bilondèshìle Bible. Mpindyewu tèelejàayi mwab'ewu mene bwà nùmonè Bible ní kèna ùpèèsha mulùme bukenji bilondèshìle mikenji bwà kwipata mukàjèndè yéyè mukòse nsukì yèndè, nùmonàayi eci ní ncyà bushùwà anyi ní ncyà mafi.

Bu mulùme. . . Bwalu cyà bushùwà kabìvwa bìkèngela bwà mulùme kubwikilayè mutù wèndè nànsha (mbwena kwamba ne, kwikala ne nsukì mile), *bwalu bu mudiyè mu cimfwànyi ne mu butumbi bwà Nzambì: kàdi mukàji*

yéyè ùdi mu butùmbì bwà mulùme. (Nukààvwakù beelè meeji ku ciinè aci anyi?)

759 Mpindyewu ndi muswè kwimana kaaba aka, bwalu ndi muswè bwà eci cibwelè bîmpè menemene, nwamònu's. Nènku mpindyewu vùlukàayi ne, nkààdikù mumòne binunu makumi byà bakàji balenga kwìsù (bàndì mumanyè mpindyewu mene, ne bààbùngì bàà kùdìbo mbasòmbe mu èkèleeziyà emu) bàdì ne nsukì mípì, biikàle beena Kilistò. Kàdi bàndì ngòomekela bujitu ebu kî nwnènu to, mmùshindù wunùdì balongèshibwe. Nwamònu anyi? Kì cyòci aci. Muiyishi wenù ngutu kàyiku munwàmbile cyòci eci kacya to. Kàdi bònsò bàà ku bakàji bàà mu nyungulukilu wa tabernacle bòbò biikàle mùshindù awu, díbà adi mbapiile. Nwamònu's, bwalu ncyà bushùwà ne tutu tubàmbilaci.

760 Mpindyewu, mpindyewu tàngilàayaaku eci:

...mulùme...Bwalu... (mvensà wa 7)...Bwalu mulùme...

761 Mpindyewu, udi wakula apa ewu nganyi? Mpindyewu, misangu mikwàbò inàbànzà kampàndà ùdi mwà kwamba ne: "Kaa, Pòlò's ùvwa mukinyi wa bânà bakàji kwònsò eku."

762 Èè, mpindyewu patùcidì pa cyòci aci apa, tùbuululàayi ànu mu Ngalàtiyà 1.8 emu, bwà tùmonè cidì Pòlò wàmba bwà cyòci eci, nwamònu's, mu Ngalàtiyà 1.8. Nenùsanganè ne Pòlò mmwambè mu Ngalàtiyà 1.8 emu ne:

...nànsha twètù, anyi mwanjèlo wa mu dyulu, muiyishè èvànjeeliyò mukwàbò nànsha bàmba ne ngwa bishì mushiilàngàne ne unùkaadi bumvwè ewu, èdiibwè mulawu.

763 Mpindyewu kanùndyulùku mèmè to, nùMudyulàayi Yèyè, nwamònu's.

Bwalu cyà bushùwà kabìvwa bikèngela bwà mulùme kubwikilayè mutù wèndè nànsha, bwalu bu mudìye mu cimfwànyi ne mu butùmbì bwà Nzambì: kàdi mukàji yéyè udi mu butùmbì ne cimfwànyi cyà mulùme.

764 Mpindyewu tàngilàayi mvensà udi ulonda awu:

Bwalu mulùme kî mmufùme ku mukàji to; kàdi mukàji ngudi mufùme ku mulùme.

Anyi mulùme kàakafùkiibwa bwà mukàji to, kàdi mukàji ngwàkafùkiibwa bwà mulùme.

765 Mpindyewu, ndi muswè kwamba eci mpindyewu ne dinanga dilelèlè ne kalolo, ne ndi ntèkemena ne nudi nucyùmva mu mùshindù wùmfwèwùmfwè wùndì ngamba cyòci eci ewu. Kàdi Àmèrikè...Mèmè bu mwenji wa ngendu yà buloba bujimà, Àmèrikè ùdi ne bîmwè byà ku bilèlè byà bitàmbe kwikala byà ciipanshì, bipwekè milongo bwà bakàji bààbò ku byà ditunga

kanà dyònsò dyà pa buloba. Paris mu France, mmufwànyine kwikala nzùbu wa kàntùmbw'a dyùlù ku luseke lwà Àmèrikè mu mùshindù wùdìye ùlekela bakàji bààbò bènza. S'mbundù's!

⁷⁶⁶ Nukààdikù bamanyè ne nzambì wa Àmèrikè mmukàji anyi? Mémè ndi mwà kunùjaadikila aci ku Bible ewu. Ncyà bushùwà. Nudikù nufika ku dyumvwa ne bìdì bikèngela bìlwe mùshindù awu bwà èkèleeziyà wa Kàtòlikè àbwejè dilongesha dyàbò dyà virgò Màriyà adi anyi?

⁷⁶⁷ Mpindyewu, bu ne mukàji kààkenjiibwa bwà mulùme, kabìyi. . . Pìikalàbi ne mulùme kààkenjiibwa bwà mukàji, kàdi mukàji ngwàkenjiibwa bwà mulùme, díbà adi mmunyi munwikalà mwà kukuukwila mukàji's? Nwamònu anyi? Mpindyewu, cìdì cicyènzè, ncibangile mu Paris kàdi kwobeka mu Hollywood. Mpindyewu bikaadi bikèngela bwà Paris kulwabò mu Hollywood bwà kupetabò myòdelè yàbò ne bikwàbò byònsò, s'ndipwekesha dyà milongo dyà bakàji bèètù bàà beena Àmèrikè adi.

⁷⁶⁸ Ncinyi aci? Dyètù ditùnga ndilwè dikesèè mu mùshindù wà ne bányèngi mene ne bantu balùme midimu yà dikwàta, kàdi batèèke bakàji mu yòyi myaba eyi, mu mùshindù wà ne makùmi citèèmà a bakàji pa lukàmà, pabwìpì ne cyòci aci, mbandumbà. Kàdi nwamba mùdì balùme kwàbò kujikè, bushùwà, s'mbwalu mbangàte bakàji kàdi kubàtèèka mu myaba ayi mu midimu yà balùme. Ne mbalwè kushààla bàà ciipanshì mu mùshindù wà ne mbatèèke bakàji bu bampùlùshi mu mùsèèsù. Aci's mbundù's bwà ditùnga kanà dyònsò! Eyowà's, mukalenge. Ciwènzà pèèbè ncinyi pa bwalu abu?

⁷⁶⁹ “Udi wèwè wenza cinyi pa bwalu abu, Mwanètù Branham?” S'bikèngela ncineemèkè, mémè's ndi mwena-mwàbò wa Àmèrikè, s'ndi ngenza cìdì mfùmù munène wàmba bwà kwenza aci. Bu ne mvwakù. . . Dìkù dyòdì—dyòdì ànu didìdinge dijìmjìje kaneemu kààdì bwà dìkù adi (bànà bajìmjìje kaneemu bwà muledi), adi dìkù's ndipandùlùke ànu tupese tupese. Èkèleeziyà yèyè—yèyè ànu mudìdinge mujìmjìje kaneemu bwà mpaasàtà wèndè, mòna's, awu èkèleeziyà mbwèndè's mbutùùke. Ne ditùnga dyòdì ànu didìdinge dijìmjìje kaneemu kààbò bwà tubàdì tutùmbùke ne bwà dipàngadika dyàtù, adi ditùnga ndipandùlùke tupese-tupese. Aci ncyà bushùwà menemene. Bìdì bikèngela bwà twètù kuneemeka bintu abi bwalu bòbò ki bàdì mfùmù munène, nwamònu's. Kàdi kabyèna bimpè to twamb'eku twamb'eku. Kakùyi mpatà to!

⁷⁷⁰ Nuvwakù bamanyè ne mulùme mu Bible. . . wa mu Genèsè, nshapità 1 awu, pàakafukà Nzambì mukàji ne—ne mulùme apu, ne kwenza mulùme ne bakàji, ne Nzambì kwambila Evà ne “bàyeebè neàkukòòkèshè, neikalè mukòòkeshi webè” apu anyi? Ùdìdingè ànu wàmbè aci mu Àmèrikè kàdi ùmonè kuwàya kafika! Balùmyàna, kí ng'aci to, mukàji's ngudi ukòòkesha

mulùme; bikèngela bènzè nànkú's, myaba yà pambèlu apa mmilongolola. . .

771 Ndi mufwànyine kulwa ne bakàji, bu ne bìvwa bikèngela, bàà ku bàvwà mu cibambalu cyànyì mwàmwa, makùmi, a bakàji bàà kaneemu. . . Ncyèna ngamba ne bìvwa bikèngela bwà bakàji bônso kabènji mudimu to; pàmwàpa ùdi ne bàyendè ùsaama anyi cintu kampànda, nènku bikèngela ènze mudimu. Kàdi byòbì kabiyi bikèngela bwà kwenzabò to, kabivwa bikèngela bwà kwenzabò to. Mwaba wàbò nkumbèlu, kaashàtò kààbò kakesè aku, ki mwaba wùvwà wùkèngelà kwikalabò ngwòwò awu menemene.

772 Ne bakàji bèètù bàà beena Àmèrikè bàkaadi ne kadyòmbò kàà kuyabò kadikèbela. Nànsha mene mu nyama yònsò ne bikwàbò, pàdi ànu cintu aci ne bwenzeji, cidi cyàngata kaaba ne cìpwekesha cisà cijimà milongo.

773 Kùdi kanyuunyi kakesè mu Àfrikè mwàmwa, nkanyuunyi kakesè kàà cikòtākòtā.

774 Mpindyewu, pa ciibidilu, kakàji misangu yònsò nkàtù ànu kabi ku twònsò túbidi atu. Kalùme misangu yònsò nkàtù katàmbe bulenga, kashà kalùme, mbudi mulùme, nzòlò wa diitu mulùme, nzòlò wa—wa citààlà, ne misangu yònsò ki udi mutàmbe. . . Bwalu, cikuka aci cìtu nnyuunyi wa díku. Cidi cisòmba mu ciswa, cikolesha twànà twàci. Cikaadi cidyàlùle kàciyi cyà bàmona kùdi kabemba, kùdi nyòka, kùdi mubwàbwà, ne bikwàbò byònsò to, nwamònu's, bwà kukoleshaci twànà twàci atu.

775 Kàdi mu cisà mùdì. . . anyì mu bulùme ne bukàji bùdì—bùdì—bùdì mukàji awu, anyì cikàji, citàmba mu bulenga, cidi misangu yònsò ànu mùshindù wa dipwekeshangana dyà milongo. Mu Afrikè, udi wangata kanyuunyi. . . Kùdi kanyuunyi kakesè kuntwaku, ne kàmwèpelè kàndìku mumanyè mu bipaapu byònsò byà buloba, kàdi kakàji kiikàle kalenga kutàmba kalùme. Ne pàdiku nànkú. . . Kayuunyi aku—aku nkandumbà kàà kashèndèndè. Kàdi kànyeemakana eku ne eku kàpetè kalùme, ne kàpatukè lubilu kàye kwela mushikì wà mayi paanyimà pàà kamanè kupetangana ne kalùme aku, ne kàshiya kalùme aku kalààdile pa mayi awu pàdiku kènda kàkèbangana ne kalùme kakwàbò apu. Ncyà bushùwà menemene. Nwamònu anyi? Nudi bumvwè cìndi muswè kwamba aci anyi?

776 Mu, mpindyewu tàngilàayi, mu Àmèrikè leelù ewu, bwà bakàji bèètù. Nsongàalùme kampànda wa mu Kentucky mmungambile, kùkaadi ndambù wa matùkù ne, kùvwa bakàji nkàmà mwandamukùlù bàkwàta mudimu ku cyapù kampànda mu Kentucky emu. Ki yèyè ne: “Ndi mufwànyine kwamba ncìpa ncìyi ntùpakana to ne nkàmà yìnaayi yà kùdìbo kakùyì mpatà to nndumbà ànu yètù yà mu mìsèèsù eyi, biinè abu bakàji basèla biikàle ne bàna.” Mulùmyànà kampànda kuumushayè

mukàjèndè kuntwaku ne kumupàye mutuutu ne dibaya, ne pashiishe kwambayè kumushebeya. Ne mukwàbò yêyè wàkaya too ne ku dyasa dyà muntu mulùme cingoma. Ne mukwàbò kutàpangana keelè ne kulwangana mvità. Kabìvwa bikèngela kwikalabi nàнку to. Abi kí mbìmpè to.

⁷⁷⁷ Alùjaayi mukàjì mu cikukù mùdì mumukùmbànyine, dìbà adi byònsò nebyèndè bìmpè. Kàdi panùdì nukamutèeka mu midimu yà bantu bònsò, bwèndè's mbutùùke. Kakùyi mpat- . . . Ncyèna ngamba ne . . .

⁷⁷⁸ Bakàjì bàà beena Àmèrikè bàdi bàtádika dyùlù muulu bàmba ne: “Aci kaCyèna ne bwà nsongo to.” Kàbìdì ne: “Ndeejányi.” Cyà bushùwà, bìdi bikèngela ànu nùcyènzè, bwalu Bible mmudyànjile kwamba ne nuvwa mwà kucyènzà. Bìdi bikèngela nùcyènzè.

⁷⁷⁹ Ne mwaba ewu pàvwà . . . Kale wàwa, kùkaadi ntàntà mule, mu èkèleeziyà wa ba-Méthodistes, muntu mukàjì yêyè mukòse nsukì yèndè, ùvwa wìpaciibwa mu èkèleeziyà. Cyà bushùwà's, mmùvwàbò bàcyènzà. Èyowà's, bushùwà. Ba-Nazaréens, ba-Pèlerins de la Sainteté, beena Mpenta, bònsò abu bàvwa ne ciibidilu cyà kucyènzà. Cidì cyènzèke ncinyi?

⁷⁸⁰ Nudi bamanyè ne mbwà cinyi? Nukàadi ne bilùmaabikàjì mu cyambilu. Ncyà bushùwà menemene. Muntu kampànda ùciina ne nkwèpì kwàlwà kwèndè kùdiye ùdiila . . . ùciina ne nudi bafwànyine kumwipata, kumwipata mu èkèleeziyà. Kabàvwa ne dikima diinè dyà kwimana, kwimana pa Díyi dyà Nzambì nànsha Dyòdì ditàpa anyi kaDíyi ditàpa to. Ncyà bushùwà menemene.

⁷⁸¹ Wèwè tèelejè kùneeku, mulùme ngudi mukòòkeshi. Kwèdikù meeji ne wèwè ngwakòòkesha nzùbu nànsha. Wèwè kí ngudi mukòòkeshi wa nzùbu to. Kakùyi mpatà to wèwè udi . . . Kwèna mupika to nànsha nàнку, kàdi udi mukwàcishi. Nèнку Adàmà . . . Mulùme ngudi ne bukòòkeshi pa mukàjèndè, ne yêyè ngumwèpelè udi ne bujitu bwà mukàjèndè. Nzambi ùdi ùlumbulwisha mulùme bwà mukàjèndè. Mpindyewu, balàayi nùmonè ní ncyòci aci cidì Nzambì wàmba mpindyewu.

Bwalu cyà bushùwà kabìvwa bikèngela bwà mulùme kubwikilayè mutù wèndè nànsha, bwalu bu mudiyè mu cimfwànyì ne mu butùmbi bwà Nzambi: . . .

⁷⁸² Nzambi kí mmuntu mukàjì to, Nzambi m'Muntu mulùme. Nudi bamanyè ne pàdìbo bàvwija virgò Màriyà ne byònsò abi, ne wàkwilangan- . . . anyi dyakwilangana ne bikwàbò byònsò mùshindù awu, ne bàtùma masambila kùdì virgò Màriyà, nudi bamanyè cidìci cimvùlwija anyi? Nzambi-mukàjì munène Dianà awu, uvwa Pòlò mutàndishe ne mwipàte awu. Ncyà bushùwà's. Yêyè ne: “Mona's, Nzambi kí mmuntu mukàjì to!”

⁷⁸³ Dìbwe dívwa dimacile mu budimi, kí kwambabò ne nzambì-mukàjì awu ngúvwa mutùme cimfwànyì cyèndè, kí bwà cinyi

mukàjì mu Kolintò, ne too ne mwónsò amu, ba...bàvwà bàkuukwilà Dianà abu, bàvwa baswè kulwa bayiishi.

⁷⁸⁴ Bamba ne: “Mona’s, nyumà mmutwāmbile ne tudi bafwānyine kuyiisha.”

⁷⁸⁵ Yèyè ne: “Cinyi? Dìyì dyà Nzambì ndipātùkile kunùdi nwènù anyì, ne ndifùmìne ànu kunùdi nwènù nkààyeenù? Muntu nànsha yèyè nganyì wèla meeji mùdiye yèyè mwinè wa nyumà anyì mupròfeta, àjingululè ne cìndì mèmè ngamba mmèyì matùma a Mukalenge: mukàjì àshaalè mupùwe ne mwinshì mwà bukòokeshi mu èkèleeziyà, kàyi ùyiisha anyì kùkadi ne bukòokeshi kampànda nànsha.” Ncyà bushùwà menemene! Aci ki cidi Mifundu myambè. Nwamònu anyi? Ne Nzambi neikalè mwà kwenza ne musumbà wa bayiishi bàlumbululè bwà cyòci aci ku Ditùkù dyà Cilumbulwidi.

⁷⁸⁶ Èè, tèelejàayi! Wèwè udi wamba ne: “Èè, nyawù nkwabwila’s, s’ki citùbo bandongèshe.” Mpindyewu wèwè’s wāmanyì cidi cimpè! Ncyà bushùwà. Wèwè anyì muntu kampànda ùkèba kunwà bwanga bungi kampànda, kàdi muntu kukwabwila ne mbwanga bwà mulungù mukolè, kàdi wèwè—kàdi wèwè kunwà ànu mwinè nànsha nànkù, aci cilèma’s ncyèbè wèwè mwinè paanyimà pàà cyòci aci. Wamònu anyi?

⁷⁸⁷ Mpindyewu tèelejàayi eci:

Bwalu mulùme kì mmufùme ku mukàjì to; kàdi mukàjì ngudi mufùme ku mulùme.

Bwà bwalu ebu bìvwa bikèngela bwà dìnà mukàjì ikalè ne bukòokeshi ku mutù kwèndè bwà banjèlo.

⁷⁸⁸ Kùdikù muntu wa kunùdi aku udi ucibala anyi? Kolintò wa Kumpàla, nshapità wa 11, ku mvensà wa 10. Nwènù baswè kumòna, “bukòokeshi,” (Bwà cinyi?) “bwà banjèlo,” Kolintò wa Kumpàla, bwalu banjèlo mmuntu mulùme, mùsànjeelà. Tàngilàayi, cidi cyàkàbidi “b” mukese. Mwaba wùdi bwalu bùtàngila Banjèlo, Banjèlò bàà mu Dyulu, cidi “B” munène, “B” munène. Mwaba wùdi “b” mukese, mbanjèlo-bantu.

Nànsha nànkù kakwèna nì mmulùme... anyì mukàjì, ...anyì kakwèna mukàjì kakùyì mulùme—mulùme to, mu Mukalenge.

Bwalu bu mùdi mukàjì mufùmìne ku mulùme, bya mwomùmwe kàbìdi mulùme ku mukàjì; . . . bintu byònsò mbyà kùdi Nzambì.

Anjì lumbùlwishaayi. . .nwènù biinè: mbikùmbàne bwà mukàjì kusambilayè Nzambì (ne nsuki mípi) kàyi mubwikila anyi? (elààyaaku meeji pa bwalu abu mpindyewu)

⁷⁸⁹ Mpindyewu tàngilàayi:

*Nànsha bufùki bwinè, kabwèna bìnùlongeshakù ne,
muntu mulùme yêyè ne nsuki mile, . . .*

⁷⁹⁰ Wêwè udi wamba ne: “Cìvwa cìtàngila cinganyi?” Nsuki. Kwèna umòna cìdì Pòlò wàmba aci anyi? Nsuki, nsuki mile! Bu . . . Bìvwa bikèngela bwà muntu mukàji kwikalayè yêyè ne nsuki mile. Mvensà wa 14 mpindyewu:

*Nànsha bufùki bwinè, kabwèna bìnùlongeshakù ne,
muntu mulùme yêyè ne nsuki mile, bìdi bundù kùdiye
yêyè anyi?*

⁷⁹¹ Nwacyùmvù anyi? Bìdi bundù bwà muntu mulùme kwikalayè ne nsuki mile, kàdi muntu mukàj-. . . awu mwaba ngwà muntu mukàji. Nzambì ùtu mwenzè muntu mulùme mushiilàngàne ne muntu mukàji, ku byà bulùme ne bukàji ne ku mmwènekelu, ne ku bintu bikwàbò byònsò. Kabìvwa bikèngela bwà kuvwàlayè civwàlù. . . Bible mmwambè ne “Muntu mukàji yêyè muvwàle mùpanù anyi civwàlù kanà cyònsò cìdì cikùmbànyine muntu mulùme, ncintu ncyà mmwènekelu wa cinyangu ne cyà manyaanù ne cyà bukooyà kumpàlà kwà Nzambì.” Ne Nzambì neenzè ne muntu mukàji awu àyoobè bwà bwalu abu. Uwikalà wêwè mwà kutèeleja nganyi? Kàdi eci’s m’Bible!

⁷⁹² Kàdi wêwè udi unyeemakana eku ne eku wamba ne: “Mòna’s, mèmè ndi ngeela meeji ne mbilenga bwà. . . pàndì mmòna bantu bakàji bavwàle mìpanù.” Kàdi Nzambì’s mmubènzè bashiilàngàne, Yèyè’s mmuswè bwà kwikalabò bàvwàla bishiilàngàne.

⁷⁹³ Ne Bible mmwambè ne: “Muntu mukàji yêyè ànu mene muvwàle civwàlù cìdì cikùmbànyine muntu mulùme, ncinyangu.” Nudi bamanyè ne *cinyangu* ncinganyi anyi? N’“cintu kampàndà cyà bukooyà ku mèsù kwà Nzambì.” Nènku Yèhowàh Munène Udi upwekesha mèsù ùkumòna mwikàle cintu cikooyike awu. . . Ne Bible mmwambè. . .

⁷⁹⁴ Ne bwènù bàdi bàmba. . . Bàmwè bàà kunùdi nwènù bainàbànza mpindyewu, kùdi bânà bèenù balela bàà bakàji batekète bàà bitende, bàà bidimu dikùmi ne mwandamukùlù, makùmi àbìdì abu, nubàlekela bàpàtuka kaaba aka bavwàle mùshindù awu!

⁷⁹⁵ Ne wêwè pèèbè, maman! Nwamònu anyi? Paùdi upàtuka muvwàle mupanù awu apu ne bikwàbò ne mwikàle ne nsòmbelu. . . ne uya mu mùsèsèsù, ne—ne mwikàle ne bilàmbà byà kale bidìbo bènza leelù ewu, ne bikupèèsha mmwènekelu wa cintu cyùdi kùyì abi. Nwamònu anyi? Nènku upàtuka mu mùsèsèsù mwàmwa ne mmwènekelu wa masandi ànu wetù ewu, udi mufwànyine kwikala ànu kùyì mwenzè bubì kumpàlà kwà bàyèbè to ne bikwàbò byònsò, kàdi wêwè upàtuka mu mùsèsèsù ne muntu mulùme ùkutàngila bu mùdì mudizànjike mùshindù awu, wêwè’s ngudi mupìile, ne wêwè ngwàlumbulula ku Dìtùkù

dyà Cilumbulwidi bwà dyenda dyà masandi ne muntu mulùme yònsò uvwa mukùtàngile mùshindù awu awu. Aci ncidi Bible mwambè.

⁷⁹⁶ Bible mmwambè ne: “Ewu yònsò ukàtàngidi muntu mukàji bwà kumwalakana, wàmanyi kwenda nendè masandi munda mwà mwoyi wèndè,” ne wêwè ngudi mupùile ne ngwìkala mwà . . .

⁷⁹⁷ Neùlwe ku cilumbulwidi wămbè ne: “Mukalenge, Wêwè’s udi mumanyè mwoyi wànyì; kacya ncitukù mwendè masandi to, mvwa ne nsòmbelu wa lulamatu kùdì bàyaanyi.”

⁷⁹⁸ Kàdi ki muntu mulùme wapàtuka ewu, ki mukwàbò nyéye ewu, ki mukwàbò ewu, mukwàbò, mukwàbò, dikùmi ne bàtaanu, makùmi àbìdì, makùmi àsàtù, makùmi ànaayi a balùme biimàne mwaba awu bamba ne: “Bapùile bwà dyenda dyà masandi!” Bwà cinyi? Muntu mulùme kampànda wàkakatàngila.

⁷⁹⁹ “Èè, mêmè ncivwa naaci bwalu to.” Èè, cyùvwà mudizànjikile mùshindù awu aci ncinyi? Pààbì Nzambì mukwambile bwà kùbìvwàdi to, ne civwa ncinyangu bwà dibìvwàla, kàdi wêwè uya katèèleja *Nganyi Udi Munangè Susie?* Anyi ncinyi cidi . . .

⁸⁰⁰ Nukààvwakù bajandùle cyàkenzekelà bàyendè wa *Nganyi Udi Munangè Susie?* mwinè awu anyi? S’nuvwa bònsò bamòne cyòci aci kaaba aka mu cibèjibeji àbìdì àdi panshi aa. Patùvwà bapàtùke bayè mu Casper, mu Wyoming apu, ki pàvwàci cipàtùke. Dìnà dyèndè mene nganyi apa? Mulùmýànà awu uvwa . . . mu *Nganyi Udi Munangè Susie* awu, anyi nànsha twamba mwinè—nànsha twamba mwinè civwa ncinyi ciinè aci? Kùdì . . . Kaa, cinùtù nushàadila kumbèlu mu diisàtù dilòdòlò nupùmbisha disangisha dyà milòombo bwà kubandila aci. Ncinyi ciinè aci apa’s? *Tudi Banangè* . . . Dìnà dyàci ncinganyi’s? [Mwanèètù wa bakàji kampànda ùdi wamba ne: “*Ndi Munangè Lucy*.”—Muf.] *Ndi Munangè Lucy*, bàyendè awu’s ngudi mumanya ne . . . ùdyènzeja, mbamukwàte mu Reno, Nevada mwàmwa, ne nsongààkàji wa bafiike, mumubanjije kùkaadi bidimu. Nènku ciinè aci ki cinùdì nushàadila kumbèlù bwà kubandila, pamutù pàà kuya katèèleja Èvànjeeliyò. Mukàji ngudi mucitondè. Kaa, luse wè! Kakwènakù cintu cikezùke pambèlù pàà Yesù Kilistò nànsha!

⁸⁰¹ Bènèshiiwbwà, mwanèètù wa balùme, nè—nènkwabìlè wêwè—wêwè mwabilaayi ewu, bimwè byà ku . . . Wêwè udi wamba ne: “Kaa, ekèlekèle, tàngilàaku ne nkasumbù kaayi aku.” Bimwè byà ku—ku biminyi byà bitambe bubì bitùdì naabi’s, bidyà bibolè, s’bitu nnyuunyi milenga kumòna. Kwèna mwà kulumbulwishila nyuunyi ku masàlà èndè to, nwàmònu’s. Pa nàнку ikàlaayi ànu bavùlùke nàнку. Kaa, ekèlekèle!

⁸⁰² Mpindyewu tàngilàayi:

Nànsha *bufùki bwinè mene kabwèna*... (awu mmvensà wa 14 awu)... *bùnùlongeshakù ne, bìdi bundù bwà muntu mulùme kwikalayè ne nsukù mile anyì? (Ayi mmikùmbànyìne muntu mukàji.)*

Kàdi muntu mukàji yèyè ne nsukù mile, mbutùmbi kùdìye...

⁸⁰³ Mpindyewu yèyè ùdi wàkula bwà cinyì? Ncifulu cinùdi nwènú beena Kàtòlikè nwsa mu èkèleeziyà aci anyì? Nànsha kakesè! Nkabwikilu kakesè lwà ku lusongo lwà mutù, ne citàmbalà anyì? Yèyè ùdi wàkula bwà nsukù yènú ayi!

⁸⁰⁴ Mpindyewu! Ne muntu mukàji yèyè ùkòsa nsukù yèndè, ùdi ùkòsa butùmbi bwèndè, ne kí mmwanyishibwekù bwà kulwa ku cyoshelu bwà kusambila nànsha. Nwamònu's, ànu menemene cìdì cyambiìbwe kaaba aka ne: "Mbikùmbàne bwà muntu mukàji kuyayè kasambila ne mutù wèndè kawùyì mubwikila anyì?" Ùdi wàmba kaaba aka, wàmba ne: "Èè, bikèngela àkosè nsukù yèndè's." Pa nànkù àdikungwishè nsukù àshaalè mutù finufinu díbà adi. "Ne yèyè mudikungwishe nsukù mushààle mutù finufinu," mmwambè ne, "aci mbundù, mbundù bwà muntu mukàji kwenzayè nànkù." Pashiishe mmwambè ne: "Bìvwa bikèngela kwikalayè mubwikila." Mpindyewu, mèmè ndi ànu—ndi ànu mbala cyanààna mukàndà wà Pòlò. Nwènú bònsò, aci ncinùtàngìle, nwamònu's.

Kàdi muntu mukàji yèyè ne nsukù mile, mbutùmbi kùdìye, bwalu nsukù yèndè ayi yàkamupèèbwa bu cibwikilu.

⁸⁰⁵ Mbambè ne yèyè ùvwa mwà kupèèshiibwa cifulu anyì? Nwènú beena Kàtòlikè anyì nwènú beena Mishòònyì, aba anyì aba, bàyaaya mu èkèleeziyà ne baswè kuvwàla cifulu abu, nwamba ne: "Èè, nyààya mu èkèleeziyà, bìvwa bikèngela ngàsè cifulu." To, bìvwa bikèngela bwà nwènú kulekela nsukù yènú yileepa. Ki dishiìlangana ndyòdì adi. Nwamònu anyì?

... bwalu nsukù yèndè yàkamupèèbwa bu cibwikilu. (Ne bìdi bundù kùdìye bwà kulwa mu èkèleeziyà kàyì mubwikila, bwà kuyayè ku cyoshelu bwà kusambila.)

Kàdi muntu mulùme yèyè ùmwèka bu udi—bu udi... (Ncyèna ngeela meeji ne ndi mwà kushìndumuna mwakù awu to, m-u-k-o-k-y-a-n-g-a-n-y-...)... Mukòkyanganyi—mukòkyanganyi (nudi bamanyè cìdì mukòkyanganyi), twètù katùtu ne cìlèlè cyà mùshìndù awu to, nànsha mene Èkèleeziyà wa Nzambì.

⁸⁰⁶ Mpindyewu wèwè muswè kukòkangana pa bwalu abu, kòkanganà ne Aci nànkù's. Èyo, wèwè muswè kwikala mukòkyanganyi pa bwalu abu ne: "Kaa, kabyèna ne cìdìbì bishintulula to. Tùbàlekèlè bàye kumpàla. Mòna's, mèmè ndi ngeela meeji ne kí mbwalu to. Ndi... Nsukù kí nyidì ne bwalu

to, twamb'eku twamb'eku, cidi ne bwalu mmwoyi.” Aci ncilelèlè; mwoyi wówù mu wówù, nsuki neyikalè mu yôyi (Uh-huh).

⁸⁰⁷ Ndà kumpàla, pawikalà muswè kwikala mukòkyanganyi, Pòlò mmwambè ne: “Katùtu ne cilèlè cyà mùshindù awu to, nànsha mene Èkèleeziyà wa Nzambi.” Yèyè ne: “Paùdì muswè kwikala wa ku luseke lwà Kaayinà, èè, tũngunukà ndàaku.” Kàdi eci ncìvwà Pòlò wàmba.

⁸⁰⁸ Kaa, kàdi ncyèna ne meeji a kuseka to, bwalu kî mbwalu bwà tuseku to. Kàdi ndi nkwambila nwènù balundà bàanyi ne, mbundù bwà kumòna mùdì bintu ebi byanyishilbwe bwà kubyènza's. Ndi. . .

⁸⁰⁹ Tèèlejàayi! Bwènù nwènù, bânà bèètù bàà bakàji bananga, ndi muswè bwà nwikalè ne mmwènekèlu wa mutàmbe bulenga ne nwikalè batàmbe bulenga, ki cìvwà cikèngela bwà nwènù kwikala. Ki cìvwà cikèngela bwà nwènù kwikala. Ne bivwa bikèngela bwà wèwè kwikala wa kalolo ne wa mankendà ne bikwàbò byònsò byùdì mwà kwikala abi pàdì bàyeebè ùfika, ànu byà mwomùmwe mùvwàye munanga webè amu. Ne bivwa bikèngela bwà wèwè katwilangana nendè ku ciibi ànu ne—ànu ne dimutwà dyà mishiku ne kalolo kùdiye bu ditùkù diwàkamutwàyi ku cyoshelu bwà kwikalayè bàyeebè adi amu. Ncyà bushùwà. Ncyèna nkudyula bwà dikèba kwikala ne mmwènekèlu wa mutàmbe bulenga ne kwikala mutàmbe bulenga to. Kàdi ndi muswè bwà wèwè kwikala mùshindù awu, Nzambi mmumanyè ne ki cìndì muswè.

⁸¹⁰ Mwaba ewu kwènji cikondo kampànda, mwawa nyiikilangana ne Jack Shuler. Mbanganyi bàkaadiku bumvwè bàmba bwà Jack Shuler? Muiishi wa mutàmbe kwenda luumu ukaadiku ba-Méthodistes bapetè. Kwambayè ne: “Muntu mukàji kampànda mmulwè mwambè. . . nsuki ne manyaanù yònsò, ne ùcyànkunya bàzòkà, ne muvwàle bilàmbà bu udi kàyi muvwàle, kwambayè ne: ‘Udi mumanyè's, bàyaanyi kî mmuswè nànsha bwà kuntwàla kàbidì to.’”

⁸¹¹ Yèyè ne: “Mèmè ncyèna ndyula bàyeebè awu to.”

⁸¹² Ncyà bushùwà. Mpindyewu, kàdi cidi cikèngela bwà wèwè kwenza, bidì bikèngela bwà wikalè mu mùshindù mwimpè. Kwàngacidi citaleela cyèbè ne bulenga bwèbè ku Hollywood to, byàngacilè mu Bible, kumpàla kwà Nzambi. Ikàlà inàbànza, enzà maalu bu inàbànza, vwàla bilàmbà bu inàbànza, ikàlà mukezùke. Enzà maalu bu inàbànza, kùvwàdi bintu abi. . .

⁸¹³ Mulùme yònsò udi ulekela mukàjèndè ùpàtuka muvwàle tuntàkanyi atu kumpàlà kwà bantu balùme, ne tuntàkanyi twà kale atu. . . ùpàtuka mu mashinda ne ùkòsa mashinda, ne bikwàbò byà mùshindù awu, mukalenge, s'ndi nkwambila's, mwanèètù wa balùme! Ncyèna—ncyèna ne meeji a kwikala ne lwonji to, ndi. . . Nzambi mmumanyè ne ki mwoyi wùndì naawù. Kàdi nebikengelè bwà mèmè ku-. . . Bikèngela nshintulukè

bikolè menemene kumpàlà kwà mèmè kulekela wanyì mèmè ùcyènza's. Nèngiikalè sheefù ku lusongo lwà kakùnà kwàka ntàntà yònsò ùndì mwà kwikalapù sheefù awu, nudi numòna's; ne pàndì ncyiyi mwà kwikala nàнку to, nèngùumukèpu. Ncyà bushùwà.

⁸¹⁴ Kaa, mwanèètù wa balùme, aci's mbundù ne dibùlà dyà ngàsà bwà bakàjì kwenza nàнку. Kàdi ncyèna—ncyèna ne awu meeji to, mwanèètù wa bakàjì. . . Ncyèna—ncyèna nkupwekesha milongo to, ndi nteeta ànu bwà kwamba. . . Èkèleeziyà wetù ewu kàtu ne byà buumambàlà abi to, bantu bàdi ànu bàlwa apa cyanàànà. Kàdi ewu nnzùbu wa Nzambì, ne kakùyì mpatà to tutu twambila bantu bwà kabiiyadi bàvwàla bintu abi to. Bwà ne bìdi. . . newikalè mwà kulumbulula bwà bintu abi ku Ditùkù dyà Cilumbulwidi. Mpindyewu tàngilà kùneeku. Ne lekèlà nsukì yèbè yileepè, wamònu's, ne ikàlà inàbànza.

⁸¹⁵ Mpindyewu:

Mpindyewu mu eci cidi. . . Ndi nnwàmbila ne ncyèna nnutùmbisha to, bwalu nudi nudisangisha bwà. . . kabiiyi bwà kutàmba kulengela to, kàdi bwà kutàmba kubùpa.

Bwalu cyà kumpàlampala, panùdi nwènu nudisangisha mu èkèleeziyà, ndi ngumvwa bàmba ne kudi matàpuluka munkaci mwènu; ne bikwàbò, . . . (bìdi biya mpindyewu ku mèèsà a Mukalenge)

⁸¹⁶ Mpindyewu tèelejàayi Aci. Ki bwà cinyi banjèlo. . .

⁸¹⁷ Mpindyewu, Mwanèètù Palmer, ncyèna nkwambidila pa mukàbà wà mèyi ewu bwà wèwè kuyiisha cintu cìmwècìmwè kuntwaku cìndì mèmè nyiisha kaaba aka to. Kàdi wèwè's udi mumanyè ànu bìmpè menemene, ne wèwè bu muyiishi, s'udi mumanyè ne aci m'Bulelèlè, mwanèètù. Èyo.

⁸¹⁸ Pa nàнку *banjèlo* kaaba aka “mbantu.” Wèwè muswè kucimòna, Mwanèètù Palmer, cidi mu kàleeta kakesè ne: “banjèlo.” Kàdi Bible mmutùngùnùke. . . Yèyè ùdi wàkula bwà mulùme ne mukàjèndè, nwamònu's, ki cidi cyena-bwalu ncyòci aci.

⁸¹⁹ Mùshindù awu ki wùdi bantu bapetè cibwejàkàjì mu Bible, bàmba ne: “Èè, Nzambì ùdi wàmba cintu *apa*, ne cikwàbò. . .” To, wèwè—wèwè ngudi upàtuka mu cyena-bwalu. Shààla wèwè ànu pa cyena-bwalu cìmwècìmwè aci, kwàjiki. Yèyè ùdi wàkula bwà mulùme ne mukàjèndè.

⁸²⁰ Mpindyewu cikwàbò cintu cìndì njinga kulenga kumpàlà kwà twètù kujikija, necingàtè tusunsa tutwè ku tubìdi:

74. Bansantu nebiiikalè penyì paanyimà pàà bukòokeshi bwà bidimu cinunu? Ne mmubidi wà mùshindù kaayi wikalàbo naawù?

821 Ndi ngeela meeji ne alu ki lukonko lwà lutàmbe kwikala lwà kalolo, ndi mémè ànu munangè aci. Mpindyewu tütapàâyimù dísù buludi.

822 Ku cibangidilu, Nzambi...Netwàlukilè ku dilongesha dyètù dyà Ebèlù ànu bwà katanci kakesè cyanàànà. Nzambi ùvwa mpokolo munène, munène wa meekala mwandamutekète ewu. Mbanganyì bàdì bamanyè nànkù? Nwamònu anyi? Ne mbanganyì bàdiku bamanyè ne Nzambi ùdi ne Nyumà mwandamutekète? Kakùyì mpatà to, Nyumà mwandamutekète. Ne kùvwa mèsù mwandamutekète mu mwànà wa mùkòòkò, ne bikwàbò, byònsò abi biikàle bidísanga mpindyewu. Nwamònu anyi? Mpindyewu, ki civwà Nzambi ncyòci aci.

823 Mpindyewu Yéyè (Logos awu) pààkapàtukàYe mu Nzambi, civwà ciikàle Nzambi ùmuka ku mpokolo munène umwèpelè ewu ùbwela nu mubidi wà mu mmwènekelu wa—wa muntu; ki kwenzaci Logos awu, citùdi tubiikila ne ntèòfànì aci.

824 Mpindyewu, wèwè wangata tèòfànì paùdi utàngila cyòci aci apu, cidi mmuntu. Mpindyewu utùdi...Mpindyewu, ki kutùvwà nkwòkù aku ku cibangidilu. Mpindyewu, kwèna ucyumvwa mpindyewu to, kàdi mùshindù awu ki wùvwà kwàka ku cibangidilu. Pààkenzà muntu...Pààkenzà Nzambi muntu mu cimfwànyì Cyèndè, Wàkamwenza mwikàle tèòfànì. Ne Wàkamutèeka ànu mu mubidi...Pààkenzà Nzambi muntu mu cimfwànyì Cyèndè, mu difwànangana Nèndè, bàvwa... Mu Genèsè 2, kùvwa...ànyì mu Genèsè 1.28, ngeela meeji ne mmwòmò amu: “Kakùvwa kwanji kwikala muntu bwà kudima buloba to,” kàdi Nzambi ùkaavwa mwenzè mulùme ne mukàji. Ncyà bushùwà : “Kakùvwa muntu bwà kudima buloba to.”

825 Pashiishe Nzambi kuvwijaYe muntu kwinshì ndambù ne kumutèekaYe mu mwoyi wà nyama, mbwena kwamba ne mu mubidi ewu, ànu menemene mùdi nyama amu bwà wàmòna mwà kudima buloba, wàmòna mwà kulenga. Tèòfànì awu kèna ùlenga, kèna ùmòna, ùlabula, ùnunkila, ùmvwa to; byumvwilu bitùdi naabi ebi. Pa nànkù Nzambi kutèekaYe muntu muntwamu bwà—bwà yèyè kulenga ne kuumvwa pàdibo bàmulenga.

826 Nènkù—nènkù pàvwàye wèndakana mu myaba yònsò mu budimi bwà Edènà, dyàmbedi bu tèòfànì (mùdi Nyumà Mwìmpè kaaba aka mpindyewu wèndakana kaaba aka emu), ùvwa ùlombola mwoyi wà bukwànyama. Ùvwa ùkòntonona bintu byònsò, kàdi kàyi mufwànyine kudima buloba to, nwamònu's. Ki Nzambi kumutèekaYe mu mubidi bwà wàmona mwà kudima buloba. KumupèeshaYe byumvwilu byèndè bitaanu abi, bwà kudimayè buloba ne kulongololayè madimi a—a mvinyò ne— ne bikwàbò, kàdi piinè apu muntu ùvwa ùmwèka ànu nkàâyèndè. Kaa, eci's ncimfwànyì cilenga be.

827 Tàngilàayi, bwalu pààkenjiibwàye dyàmbedi, wàkenjiibwa bantu bàbidi pàmwè. Ùvwa mwenjiibwe mwikàle

mulùme ne mukàjì, muntu awu. Bible mmwambè ne ki mwàkenjiibwàye. Nzambi wàkenza muntu mwikàle mulùme ne mukàjì, “mwàkamuMùfùkàYe.” Mònaayi mpindyewu ne, pàakatàpuludiibwà muntu ne tèòfàní awu ne kutèekiibwayè mu musunya, kà—kàvwa ànu menemene mujimà mwaba awu to; citùpà cyà buumuntù bwèndè cìcìvwa anu tèòfàní, pa nàнку kabìvwa bìmwèka bijaalàme to.

828 Ki cilùme ne cikàji byà ngombe biyaaya byàbya, ki kabalù kàyaaya kàka, ne ki ngombe uyàaya wàwa, ne ki bintu byònsò biyaaya byàbya, bibìdi bibìdi. Kàdi Adàmà, yèyè... bivwa... Nwamònu's, kùvwa kupangike cintu kampànda. Dijinga dikolè diinè adi dyàkaleeja ne kùvwa mwena-dyènde mumwindile. Nudi nucyùm vwa anyi? Ne ànu meeji miinè a ne tudi ne cyà kufwà pànwapa aa, a ne tudi ne lutàtù ne tupampakana, ne biikàle tujinga Mwoyi wùdi kawùyì ne lufù awu, ki cidì cileejà ne cyòcì aci ncitwìndile. Nwamònu anyi?

829 Nènku Adàmà wàkadimòna nkàayèndè. Nènku Nzambi, bwà kuleeja ne kabàvwa mwà kutàpuludiibwa to... Mpindyewu nêngàalukilè mbwelè mu cintu cìmwècìmwè eci, ànu bwà katanci kakesè cyanààna.

830 Mònaayi, Yèyè kàakayakù kwangata bulaba ne kwenza Evà to, kàdi Wàkenzela ku bulaba bwà ku cibangidilu abu, Adàmà. Wàkangata lubadi lwà mu luseke lwèndè ne kumwenzela mumukwàcishi, ne yèyè awu ùvwa ng'Evà. Wàkenjiibwa bwà mulùme, ne citùpà cyà mulùme. Ùvwa citùpà cyà ku yèyè ku cibangidilu, mu bufùki, mu tèòfàní. Ùvwa citùpà cyà ku yèyè pànwapa mu bufùki ebu. Mukàjì kàvwa mwà kutàpuludiibwa mu bukwàbò bufùki to, byàkakèngela bwà kuvwijiibwayè mu bufùki bùmwbèbùmwbè abu.

831 Ki bwà cinyi bivwa bikèngela bwà Kilistò ne Nzambi biikalè Mupèsonà ànu umwèpelè, kacìvwakù mwà kwikala cintu kampànda cishiilàngàne nànsha. Bu Yèyè mwikàle muntu mwìmpè anyi mupròfètà, Kàvwa mufwànyine kwikala Mupikudi to; bivwa bikèngela bwà kwikalaYè Mufùki Yèyè mwinè. Kàdi Yèyè ùcìdi ànu tèòfàní mpindyewu, nudi numòna's, nènku mùshindù wùvwàYe musangu awu awu.

832 Mpindyewu muntu kulwayè pànwapa ne yèyè—yèyè ùvwa mulenga wa dikèma; ne Nzambi wàkananga cyòcì aci, kwambaYè ne: “Mbìlenga be, biikalè pa buloba ne biikalèpu ne mwoyi kashidi. Kwàjiki; bwà—bwà Cyèndèlèlèlè, ànu nàнку ànu nàнку ànu nàнку. Bitolokè ànu cyanààna, ne cikùnnyibwà cyònsò cìvulanganè, ne byònsò mùshindù awu. Nènku muntu ikalè ne mwoyi, ne nyàma yikalè ne mwoyi, ne bikwàbò byònsò, kashidi ne kashidi. Abi mbìmpè.” Nwamònu anyi?

833 Ki pashiishe mpèkaatù kubwelayè. Nènku ndi muswè kwamba díyì edi. Mu... Bantu bààbúngì bàtu bènza cilèmà cyà cibi be pa Mufundu wùmwbè ewu, ne ciinè aci mmu Musambu

wà 23. Bātu bàWùbala nùnkù ewu ne: “Èyowà, nànsha mèmè mpìcila mu cibandabanda *cyà mìdimà* cyà mundìdimbì wà lufù.” Mpindyewu, cintu bu nànkù kacitukù to. Bible kèna wàmba ne: “Mundìdimbì wà mìdimà wà cibandabanda. . . cibandabanda cyà mìdimà cyà mindìdimbì yà lufù” to.

⁸³⁴ Ùdi wàmba ne: “Nànsha mèmè mpìcila mu cibandabanda cyà mundìdimbì wà lufù.” Mpindyewu, kumpàlà kwà kwikalaci mundìdimbì, bikèngela cìkàlè ne bukènkè bwà kwenzaci mundìdimbì. Nwamònu’s, bu mùvwà Davidi mupròfetà ne mu dilaabiibwa, kààkenza cilèma to, wàkamba yèyè ànu Bulelèlà ne: “Èyowà, nànsha mèmè. . .” kí nnè, kupicila mu cibandabanda *cyà mìdimà* to, kàdi, “kupicila mu cibandabanda *cyà mindìdimbì* yà lufù.”

⁸³⁵ Dìbà adi bìdi bikèngela wikalè ne byà pa lukàmà búngi kampàndà byà bukènkè bwà kwenza mundìdimbì. Nènkù mùshindù awu ki wùdibi pànwapa. Tudi eku bàà mu bufùki eku batàmbe-mfùkilu. Mubidi ewu wùdi ku bukòokeshi bwà lufù, ne wàkalediibwa kùdì mukàji; kakùyì ku cintu nànsha cimwè to ànu ku. . . Kí nkùdi Nzambi to, wèwè udi divulangana dyà kuumukila ku Adamà ne Evà. Wikalè mufiike, mutòoke, anyi cyònsò cyùdi aci, udi cintu cipàtula, mùtòlokù wà kùdi Adamà ne Evà. Aci cidi cyènza ne mubidi wèbè wikalè “mulela mu mpèkaatù, mufwimba mu bubì, mulwè pa buloba mwikàle wàmba mashimi.” Udi mwela mulawu ne mupiiishiiibwe ku cibangidilu cyà mwoyi wèbè, kùyì nànsha, kùyì ne mpùngà to.

⁸³⁶ Mpindyewu, bwalu nyumà ùdi nendè mmulwè kùdì ku bufùki, ne ku bufùki udi ufùmina ku disangila dyà mulùme ne mukàji, dijinga dyà balùme ne bakàji ndidi ditwàla mwànà wa pa buloba. Nènkù wèwè shiya mwànà awu nkààyendè, kùyì umulongesha kantu kajaalàme nànsha kàmwè to, yèyè’s neànyangukè. Wèwè kùyì umulongesha ní mbwimpè ní mbubi, yèyè neàngatè bubì. Bwalu ngiikàdilù wendè ngwa kwenza nànkù awu.

⁸³⁷ Tàngila mwànà mukesè, kàyì bule bupite *apa* to, ùlwa ànu ne ciiji cyà dikèma; neikalè ànu. . . ùdi—ùdi ùdinyènguvula byanza, ùkùnjjija kwìsù aku, ne ùkwàta mweyelu. Bushùwà’s. Ncinyi aci? Nngiikàdilù wendè awu. Mmumupetèle kùdì papa wendè anyi maman wendè, ewu anyi ewu; mamwèndè ùvwa ne ciiji cyà cidya micì, anyi tatwèndè. Kabàyi bóbò to, nkakwèndè mulùme anyi nkakwèndè mukàji uvwa naaci. Nwamònu’s, mmùtòlokò wàbò.

⁸³⁸ Pa nànkù aci cidi cyènza. . . Wèwè udi mulediibwe pa buloba. Udi mulwilè ku bufùki, ne buumüntù bwèbè bujimà mbuffiike ne bukooyike, ne bupiiishiiibwe, ne bwediibwe mulawu ne bwikàle bùyà mu ifernò. Ncyà bushùwà!

⁸³⁹ Kàdi paùdi ulediibwa cyàkàbidì, dìbà adi Bukènkè bwà Nzambi bùdi bupwekesha nsèsà munda mwà musùukà awu (àlèluuyàh) dìbà adi kacicyèna kàbidì cibandabanda cyà mìdimà

to, kàdi ncibandabanda ciikàle ne mundidimbù mu cyôci. Wêwê udi mwà kwikala mubwikila pànwapa ne mubidi, ne bintu kwisù kwètù kwònsò eku, kàdi kùdi Bukênkè búngì bukùmbàne munda amu. Ne dîngà ditùkù bikèngela bwà Bukênkè abu ne mîdimà bitapulukè! Ne pàdi bukênkè bùkenkesha, mîdimà yidi yinyeema. Kàdi patwàyà bwà kwikala ne Kilistò mu wòwò mubidi awu, mîdimà ne lufù bidi bijìmina, ne tudi túbwayika tubwela mu Bukênkè bupwàngàne. Butùmbì kùdi Nzambi's wè! Kì kwètù abu's; kakùciyi kàbìdi mabèèdi, kakùciyi kàbìdi mîdimà misambakajakù nànsha.

⁸⁴⁰ Mpindyewu mene tudi ne byònsò bìbìdi mabèèdi ne disànka, ne tudi ne bukòlè bwà mubidi ne dikàndà, ne tudi ne mvità *yà mu mikòlò* ne *yà pambèlu*, ne *mabika* ne *mala*, ne disànka ne tunyinganyinga, ne bikwàbò. Èè, s'bidì ànu mundidimbì cyanààna. Tudi ne bukênkè bukùmbàne bwà kumanya ne kùdikù Bukênkè mwaba awu; kàdi tucìdi ànu mu mubidi, mu musunya. Kàdi dîngà ditùkù Ditùkù adi bufùkù nebùcye. Kì piikalà mwanjèlo wa lufù ùkaadi musòmbe ku mikòlò *yà bulààlù*, kì pàmbà ngàngàbukà ne kwàjikì kwònsò; ne cyà mu bufùki eci necitapulukè ne cyà citàmbe-mfùkilu, ne bukênkè nebàlukilè ku Bukênkè, ne mîdimà neyàlukilè ku mîdimà. Pashiisè cyà cifwàkà eci necivwalè dibènga-kufwà. Kì pàvwàlà dibola dibènga-kubola mpòpò apu. Kì pàvwàlà cyà cifwàkà eci dibènga-kufwà, ne tuumuka ku cifùkiibwà cyà cikondo tulwa ku cifùkiibwà cyà Cyendèlèlè. Kwèna mwà kupàtuka pambèlù pààpa piikàle mîdimà *yà menemene* to, bikèngela wikalè ne bukênkè mu mîdimà amu. Kì bwalu mbwòbù abu's. Kì mubidi wùdi upeta ngwòwò awu.

⁸⁴¹ Citùdi twenza ncinyi? Èè, mwanèètù wanyì wa balùme munsantu munanga, mwanèètù wanyì wa bakàjì munsantu munanga, kumpàlà kwà difùkà dyà dyulu ne buloba, pàakakufùkà Nzambi mu cimfwànyì Cyèndè, anyì pàakafùkàYe mu—mulùme mu cimfwànyì Cyèndè, ne kufùka mukàjì mu cimfwànyì cyà mulùme bwà butùmbì bwà mulùme apu, Yèyè wàkakwenza tèofàní. Anù mufwànàngàne ne Yèyè mwinè, pàakambilàYe bifùkiibwà bìvwàYe mufùke abi ne “Twènzààyi” apu, “Twènzààyi muntu mu cimfwànyì Cyètù Twètù, mu difwànàngàna Nèetù, tèofàní.” Nzambi kàvwakù mwanjì kulwa mubidi to, Ùvwa mu tèofàní.

⁸⁴² Ne Mòsà wàkaMumòna. Mòsà kwelayè lubilà ne: “Mukalenge, enzà nKumònèku.”

⁸⁴³ KwambaYe ne: “Ndà kwàka nàka ùsokomenè mu lubwebwe, mu mutanta.” Kì Mòsà kubwelayè mu mutanta awu; ne pàakapicilà Nzambi mwaba awu, mikenyi ne mikungulu. . . Ne pàvwà Nzambi munkaci mwà kupita apu, Ùvwa Yèyè mwelè nyimà *nunku* ewu.

Ki Mòsà kwambayè ne: “Civwa nnyimà wa Muntu.”
Àlèluuyàh!

⁸⁴⁴ Ûvwa Nganyi? Melekisedekè wàkatùùluka awu, Mfùmu wa Salèmà awu, kàyi ne taatù anyi ne maamù, anyi ní ntwàdijilu wa matùkù anyi ndekeelu wa mwoyi. S’ki Yèyè awu! Nènku Ûvwa mutùùlùke. S’ki Yèyè wàkaakula ne Abraham awu; uvwa muDibùngàkàjile kaamubidi kakesè kàà musunya nùnkù ewu ne, “Hyu!” kwelamù mupùuyà, kubwelamù, ne kulwa e kudyà munyìinyi wà kànà kàà ngombe, kunwà mabèèlè a ngombe, ne kudyà màntekà ne dyàmpà dyà bukula bwà nsèke. Ne Banjèlò bàbidì abu.

⁸⁴⁵ Ne pààkapàtukàbo kuntwaku, ne bintu byònsò abi kwenzabì ànu ne, “Hyu!” kujìminabì e kuyabì.

⁸⁴⁶ Kacya ncivwakù mukwélèlè meeji to. Kwènji cikondo kampànda, mvwa nsoma mutèlèngà wà mu cingoma, mvwa ne cingoma cyà .22, ncyà .220 Swift. Ne nwènù bàna bèètù batuuci bàà bingoma mwab’ewu nutu bamanyè. Kaadzajì kakesè aku, ndizajì dyà tundimbà makùmi ànaayi ne mwandamukùlù, dìipacila bule *ebu*, dizajì dyètù dyà cibiidilu dyà .22 edi. Bàtu bàdisoma diikàlè ne bukole bwà bwìpacila .30-06 mu cibambalu amu. Mpindyewu ndi . . . Cyapù citù cibyènza citù cilongòlòle bwà kuyadi too lubilu lwà lwìpacila mètres cinunu ne nkàmà yisàtù ne makùmi àtaanu ku kasùnsukilà kàà kasunsa. Èyo, kàdi udi mwà kwela bìngì bukùmbàne bwà . . . kudìsomenaci nkààyebè, ne mwikàlè mwà kucifikisha too ne ku mètres cinunu ne nkàmà yitaanu ku kasùnsukilà kàà kasunsa. Nènku—nènku mu ngaakwilù mukwàbò, wèwè ucituuta . . . Tuvwa tutuuta, ditùku adi, mu ntàntà wa mètres matwè ku lukàmà ne makùmi mwandamukùlù, dizajì òvwa dikadituuta mu lupwishi, òvwa mwà kuya kumpàlà kwà mwadi wà cingoma kuumvwikawù. Ki lubilu lùyaayadi ndwòlò alu.

⁸⁴⁷ Pashiishe angàtà kaci kàà ku mènù (nudi bamanyè, kaaba kàà kabèètèlèlè kàà kaci kàà kwela ku dìnù aku) ne ùkèlè mu kapyà kèèbè aku amu ne ùjè kantu aku tètè ne kapyà, ànu bu tundimbà tukesè tùnaayi ànyì tùtaanu nànkù awu, ne kàdi ùtùtèkè lwà kumutù aku, kàdi pashiishe wèlè dizajì dyèbè adi muntwamu. Imàna mwaba awu, ne udi ne dizajì mu cyanza amu mu kasùnsukilà kàà kasunsa. Kàdi ùcìtuutè kwàka wasa kankalankala kasòmbe mu ntàntà wa mètres makùmi àsambòbò neebè, kankalankala aku kakaàakunyunga nanshà mene to. Dizajì adi didi dyàlukila ku ngiikàdìlù yadi yà ku cibangidilu, dyàlukila ku gaz. Ki dèzajì ndyòdì edi dyà cyamù cyà mikùba ne plomb bisambakaja, mu kasùnsukilà kàà kasunsa kàmwè, ndyalùkile mu mùshindù wà kùciyikù mwà kudipeta kàbidì to. Ndyalùkile mwàkadidi kùkaadi bidimu mìllyaalà lukàmà, dyalùkile ku gaz. Bikèngela gaz ayi yìdivùngè ne yàlukilè ku cyamù cyà mikùba ne ku plomb, ne bikwàbò, mùshindù awu. Bikèngela bwà gaz ayi yishimatè.

848 Mpindyewu, ki bwalu mbwôbù abu's. Ki mutùdi twétù aba pánwapa nánku, tudi bafùme ku kampànda wa mutàmbe kutùmbuka. Ku cibangidilu tuvwa mu cimfwànyì cyà Nzambì. Cibwikilu ne mîdimà bìdi bitùpangisha bwà kucìmanya mpindyewu. Kàdi Yesù wàkambila bayiidi Bèndè ne Yèyè “ùvwa naabò kumpàlà kwà difùkà dyà dyulu ne buloba.” Nwamònu anyi? Tuvwakù! Kanwèna mwà kucìmanya mpindyewu to, kàdi nuvwakù ku cibangidilu. “Nènku nntètà wa pa buloba ewu yèyè munyangùke, tukàadi ne mukwàbò mwindile!” Alèluuyàh! Nènku dîbà adi tudi tubwela mu tèòfànì ewu, mutùvwàku basòmbèle musangu kampànda, bwà twamònakù mwà kudya ne kulabulangana ku cyanza. Ne misùukà yidì mwinshì mwà cyoshelu yidì yèla lubilà ne: “Too ne dîbà kaayi's, Mukalenge?”

849 Kùdi bibàndilu mwandamutekètè bìdi bìfikisha kùdi Nzambì, bwà Nyumà mwandamutekètè pàdi—pàdiYe ùpweka apu. Eyo, paùdi uya mwinshì mwà cyoshelu cyà Nzambì, yivwa yidila myadi ne: “Mukalenge, too ne dîbà kaayi's? Tudikù mwà kwalukila anyi, kwinshì eku?”

850 Nzambì kwambaYè ne: “Indilaayi cikondo cikesè cyanààna, too ne piikalà bakwènù mwà kukènga cintu cimwècimwè cinùdi nwènù bakènge aci.” Nwamònu anyi?

851 Nènku dîbà adi misùukà yidì yàlukila, ne yishààla cyàkàbìdi balùme ne bakàjì, ne nebìikalè ne mwoyi kashidi piikalà mîdimà ne lufù ne mabèèdi ne tunynganyinga twà mifitù byònsò bijimìne; kakùciyi kàbìdi mundidimbì to, kakùyi mpatà to kwikàle ànu muunyà pa muunyà!

852 Tèelejàayi. Bwalu mbwôbù ebu. Kwikalè mîdimà ànu yètù yà mikolè eyi; kakwèna mwà kulwa mîdimà mipitèpìte búngì dîbà kadiyi divingùtùle kàtùpà ne kàtùpà kònsò kàà mîdimà ayi nànsha. Mîdimà ne bukènkè kabyèna mwà kushààla pàmwè ntàntà mule to. Bwalu . . . Cidì citàmbe bukolè ncinyi? S'mbukènkè. Nènku pàdi bukènkè bùkenkesha, mîdimà yidì yiya mwamwamwa. Amen. Kanwènaayikù ne disànka anyi? Kanwènaayikù ne disànka bwà munùdi bamanyè anyi? Kakùyi mpatà to, kakwènakù kaamundidimbì mwaba nànsha wùmwè to. Kàdi Bukènkè bubènesha bùdi mu myoyi yètù mpindyewu mene ebu, cintu kampànda cyàndamuna cìfila bujaadiki ne: Mwànà wa Nzambì, bukolè bwà Nzambì.

853 Nènku tudi tubwela mwab'ewu, tutàngila bukolè bwà Nyumà Mwîmpè bütùuluka mu disangisha, bwàmbe ne: “Wèwè udi Mándàmù *Kampànda*, ne udi mwenzè cintu *kampànda*, mu mwaba *kampànda*. Udi musaamè cyôci eci kùkaadi ntàntà bule *kampànda*, kàdi EMU MMÛDÌ MUKALENGÈ WÀMBA: ‘Juukilà kuulu, wondòpiibù.’” Ne muntu mucibùkile panshi mwikàle mpofo ùjuuka wimana. Ne muntu mushààle ànu mundidimbì, mudyà kùdi kànsèrè, ùjuuka ùshààla cyàkàbìdi ne mwoyi ne mubidi tumatuma.

854 Kakùyi mpatà to, Yesù wàkamba ne: “Bintu bìndi Mémè ngenza ebi, nenùbyéñzè pèènu.” Ne Yéyè mmwambè ne: “Ncyèna ngenza cintu nànsha címwè pàdi Taatù kàyi muNdeejè to.”

855 Ncinyi aci? M’Bukènkè bùdi bulwè kubwelakanangana mu mîdimà eyi abu, nwamònu’s, bwà kutùpikula. Nuumvù cîndi muswè kwamba aci anyi?

856 Mpindyewu, dîngà ditùku nebyàlukilè kwôkù aku, ne pashîshe pàdi tèòfàní ùlwa cyàkàbìdi mubidi wùdi kawùyi mwà kufwà mùvwàwu ku cibangidilu amu, dîbà adi Yesù ùdi ùlwa, ne Nzambì. . . pààlwà Kilistò umwe. Kilistò neàsòmbè pa Nkwasa wa butùmbi, ne bantu bònsò nebiikalè bantu. Kilistò neikalè pa nkwasà wa butùmbi wa Davìdi, Muntu, Mukalenge Yesù; kàyi mwà kufwàku to. Twètù katwàkufwàku to, katwàkusaamakù to, katwàkwikalakù kàbìdi ne tunynganyinga to, ne netwikalè ne mwoyi munda mwà bidimu byònsò cinunu abi.

857 Ne pààjikà bidimu cinunu abi pa buloba ebu, dîbà adi dyabùlù ùdi ùpàtuka; ne dibìika diibìdi dyà ku bafwè dîlwa, dibìika dyà ku bafwè dyà babi. Bàdi bàkùngwija cilwilu cinène cyenzè bu nsenga yà ku mbù, ne bàlwa bwà kunyungulukila citùdilu cyà bansantu, ne pàdi aci cyènzeka, Nzambì ùdi ùlòkesha kapyà ne soufre bifùmina mu dyulu ne ùbàbùtula.

858 Ne Yone mmwambè ne: “Mémè kumòna dyulu dipyadipyà ne buloba bupyabùpyà, bwalu dyulu dyà kumpàlà ne buloba bwà kumpàlà byàkajìmina, ne kakùciwva kàbìdi mbù to. Nènku mémè, Yone, ngàkamòna Cimenga cyà Cijila, Yelusàlèmà Mupyamùpyà, ùpweka ùfùmina kùdi Nzambì mu Dyulu, mulongolola mùdi mukàji-musèla mulengejila bàyendè.” Ki bwalu mbwòbù abu’s.

859 Mwaba awu yéyè kwamba ne: “Mukàji. . . Mwànà wa mùkòòkò ne Mukàji-musèla nebiikalèmu bwà kashidi.” Nekwikalè buloba bupyabùpyà, miliyò ne millyò yà kilomètrès carrés. Kaa, ekèlekèlè. Cimenga aci, Bible ùdi ùfila bule ne bucyàmà byà Cimenga aci ne cìdi ne cipaapu cyà kilomètrès carrés binunu makùmi àbìdi ne binaayi. Cìdi ne bule bwà kilòmèètà binunu makùmi àbìdi ne binaayi, bucyàmà bwà kilòmèètà binunu makùmi àbìdi ne binaayi, ne kilòmèètà binunu makùmi àbìdi ne binaayi yà butùmbùke. Ki dyumvwija menemene dìdi Bible ùfila bwà Cimenga aci ndyòdi adi. Kabyèna bìkèmesha to bwà pàdiku kakùciyi kàbìdi mbù, kakùvwà mwaba bwà mbù to.

860 Kaa, nekwikalè bulenga bwà èyo! Ne mwómò amu, mùdi mpokolo ànu ku Nkwasa wa butùmbi wa Nzambì aku mene, udi upweka kumpàlà kwà Nkwasa wa butùmbi aku. Kùdi mucì ku luseke ne ku luseke lwònsò lwà mucì. . . lwà musùlù wà Mwoyi. Ne ku mucì ewu kùdi mìshindù dikùmi ne yìbìdi yà bimuma, ne wùdi wùkwàma bimuma byàwù ku ngondo ne ku ngondo.

861 Ki bakùlù makùmi àbìdì ne bànaayi mbòbò abu. Ki Mukàjì-musèla nyawù. Ki binunu makùmi ànaayi ne binaayi mbyabi, batungu bàà ku ntempèlù. Kaa mwanèètù, twètù's tuyààya ku mwaba kampànda! Bintu's mbitwìndile kumpàla eku. Bànaayi. . . Bakùlù makùmi àbìdì ne bànaayi. Batungu binunu lukàmà nè makùmi ànaayi ne binaayi. Mukàjì-musèla musòmbe ne Kilstò. Ekèlekèkè, nwènù bàdì bàmba. . . Cisòmbedi cyànyì, Cisòmbedi cyà kalolo! Amen.

862 Pàndì ngeela meeji ne ndikù ne dyèsè dyà kuyamù, ne wèwè pèèbè ne dyèsè dyà kuyamù. Kàdi bwà cinyì udi usungula bwà kwendela mu mîdimà eyi kùyi umònakù Bukènkè to, ne kufwà ne kuya mu cimvundù cinène kàdi kushààla cintu cyanààna? Bwalu pàdì Bukènkè bwàngata bukòokeshi bwàbù bwà kumutù, kakwèna mwaba bwà mîdimà nànsha. Ndàakubi ùkapetè kùdì mîdimà miyè, pàdì bukènkè bùlwa's. Ki mùdìbi, pàdì bintu byònsò byàlujiibwa kùdì Nzambi. Yìwwa, mîdimà yìwwa ne ntwàdijilu, mîdimà yìdì ne ndekeelu. Kacya Bukènkè kabùvwakù ne ntwàdijilu anyì kabwàdyàkwikalakù ne ndekeelu to. Kacya Nzambi kàvwakù ne ntwàdijilu anyì kàadyàkwikalakù ne ndekeelu to. Nènku, dîngà ditùku, buloba bujimà bwà masandi ebu ne mpèkaatù yàbù yònsò ne bulenga bwàbù abu, mùdìbo bàbyàmba's, ne bifidi byàbù byà masànka ne masansakata, ne dibàlakana dyàbù dyònsò ne byònsò abi nebìjiminè mu cyanààna, ne kabyàkwikalakù kàbìdì to. Kabyàkwikalakù kàbìdì to, kakùciyi kàbìdì meeji a dyelakù to! Mene, mbambè ne: "Kabyàkulwakù kàbìdì mu civùlukilu to."

863 Kàdi babènèshìibwè bàà Mukalenge nebiikalè ànu Nendè misangu yònsò. Netwikalè ne mubidi mufwanàngàne ne mubidi Wèndè Yèyè wà butùmbi awu, ne netwikalè ne mwoyi pàmwè Nendè, ne netùdye Nendè, ne netùsòmbè pàmwè Nendè, ne netùsombelè Nendè kashidi ne kashidi munda mwà mikùngulù mileemile yà bikondò; ne bikondò byà Cyendèlèlèlè nebiikalè ànu byènda bìya pàmwè ne buloba kabiyi ne ndekeelu to.

864 Nènku wèwè udi ne disungula dilòlò edi. Wèwè kùyi mudìlongòlòle bwà kufika mu mwaba awu, nànsha wèwè uya mu èkèleeziyà bìshi, nànsha wèwè mwikàle cidimba cìmpè cyà bìshi, udi mujìmine pàdì Kilstò kàyi mukupèeshe Mwoyi mupyamùpyà mu mîdimà mùdì wendela amu. Udi mwà kwikala mutèndeleeedi. Batèndeleeedi, tèèlejààyi, balundà bàànyì, ntèndeleeelu ngwa mamanya a mu mitù. Nwamònu anyì? Bàna bàà Kaayinà bònsò bàtu misangu yònsò ànu ne ntèndeleeelu. Beena Yudà abu's bàvwa ne ntèndeleeelu pàakalwà Yesù apu, kàdi's bààkabènga lupàndu.

865 Udi mwà kwikala mùtèndeleeedi wa mu ùmwè dilòlò edi. Udi mwà kwikala Presbytèrien, Méthodiste, mwena Mpenta, Nazaréen, Pèlerin de la Sainteté. Udi mwà kwikala ànu bu ntèndeleeelu; uya mu èkèleeziyà wenù ufla bujaadiki, udi mwà kwimba misambu ne kwela mbilà ne kutùmbisha Mukalenge,

udi mwà kutwàla byàdiikùmì byèbè ku èkèleeziyà, udi mwà kusòmbesha mwena mutumba neebè bilenga, aci kacýènakù ne cyà dýenza nànsha címwè ne kwèbè kuwàya kwà Cyendèlèlèlè to. Kaayinà wàkenza kantu ne kantu kàà cyôci aci. Kakùyì mpatà to.

⁸⁶⁶ Bible mmwambè ne “blé ne lupèlà bìdi bikolela pàmwè.” Kààblé kakesè kàà kale aku nkasòmbe, kiikàlè kàfwa nyòòtà yà mvùla, ne—ne nyùnyaacisòngà pèndè. Pàdi mvùla ùlwa, nyùnyaacisòngà ùdi ne disànkà dyà kupeta mvùla ànu mùdi blé amu. “Kàdi, ku mamuma àbò, nkunwàbàmanyinà.”

Mpindyewu túsambilààyaaku panùcìdi nukenketa mamuma ènù apa:

⁸⁶⁷ Mpindyewu, Taatù Nzambi, kùvwa yimwè nkonko mikolè kaaba aka dilòlò edi. Ndi mwà kwikala ncìyi mwenzè cintu cìdi cikèngediibwà to, kàdi ku dyànyì pàànyì dimanya; Wèwè udi mumanyè mwoyi wànyì. Ndi ndòmba, Nzambi, bwà Wèwè ùcyàkidilèku. Nènku mpindyewu, pàmwàpa, mu yimwè yà ku nkonko eyi, mèmè ncìyi muyènzè bîmpè to, díbà adi akùlà Wèwè ne myoyi yà bantu aba, ne Ùyìfikishè ànu menemene mu mùshindù wùvwà wùkèngela kwikalayì. Ndi ndyùmvwà ne Wèwè ngudi mungambile. Kàdi mèmè mufwànyine kwikala mutùpàkàne, díbà adi Wèwè ùmfwilèku luse.

⁸⁶⁸ Nènku ndi ndòmba, Nzambi, bwà yònsò wa ku bòbò aba àngatèku bintu ebi mu mwoyi wèndè, ne swàku bwà èlanganèpu meeji ne èlèku meeji mùshindù ewu: “Èyowà, èkèleeziyà nyèyè ewu, bintu ebi mbyòbì abi. Ki cìdi Bible mwambè.”

⁸⁶⁹ Pàmwàpa bainàbànà, Mukalenge, Wèwè udi mumanyè ne ncìvwa ne meeji a kwamba cintu kampàndà cyà mu mèmè to pa kubyàmba. Kàdi, Nzambi, ndi—ndi munangè bânà bèètù bàà bakàjì, ne Wèwè udi mumanyè nànku, Taatù. Wèwè udi mumanyè meeji àndì mbèèlela. Kàdi bwà kwimana ne kubàmbila cintu kampàndà cyà mafi, s’ndi mufwànyine kwikala mu—museeswishi kùdìbo. Ncyèna njinga kwikala museeswishi kùdi bânà bèètù bàà bakàjì to, ndi muswè kubàmbila Bulelèlè. Nènku, Taatù, ndi mBwàngata buludì mu Dìyì Dyèbè.

⁸⁷⁰ Ne mpindyewu ncyèna mpiìsha bânà bèètù bàà balùme to, kàdi, Mukalenge, ndi ngamba ne mbapiile pàdìbo bàànyishilangana bintu ebi apu. Kàdi byòbì ne inàbànà ùvwa mumanyè cìdi cìmpè kàdi ùya ùkenza nànku, díbà adi mbwalu bwèndè, mpaasàtà kí ngudi mupiile nànsha.

⁸⁷¹ Abba Taatù awu, bintu abi n’Dìyì Dyèbè, ne bòbò m’Bèèbè Wèwè. Mpindyewu Wèwè akùlaaku ne myoyi yà bantu. Ndi mbàlambula bònsò k’Údi. Nèmmònè ciWènji, Taatù; Wèwè ngudi mumanyè. Akùlàku ne mwoyi wònsò. Tudi tulòmba mu Dînà dyà Kilistò.

Nènku ne mitù yètù miinyika:

872 Ndi ndikònkà muntu ní mmufwànyìnekù kwela cianza cyèndè muulu, kwamba ne: “Mwanèètù Branham, wamvùlukakù ànu cyanàànà bwà mèmè kwikala mucìmunyi mu byònsò, ne ku ditùkù dyà ndekeelu ngaavwàlakù civwàlù cyà dibanjì ne ngìkalakù pàmwè ne Kilistò.” Udikù mwà kwela cianza cyèbè muulu, wamba ne: “Nsambìdìlèku” anyi?

873 Bònsò lamàayi mitù yènù miinyika mpindyewu, miikàle ànu miinyika. Nzambì ànùbènèshè, abi’s mbimpè. Kwàka, Nzambì ànùbènèshè, nwènù bânà bèètù bàà bakàjì; ne bânà bèètù bàà balùme kàbìdì, bàdì beelè byanza muulu abu. Abi mbilenga be.

874 Mpindyewu, Taatù, Udi mumòne byanza byàbò. (Ndi mumanyè ne, misangu mikwàbò nudi nudyàm̀bidila ne: “Èè, ànu kaadisambila kakesè cyanàànà m̀shindù awu?”) Nzambì, ndi mvùluka maamù awu, uwwa mwambè makèlèlèlè awu ne: “Ànu kaadisambila kakesè cyanàànà aku mu nzùbù mwèndè ditùkù adi pàvwà mwànà wa balùme awu ùpunga ne lufù apu, mbingu yisàtù bwà kwikalayè ne mwoyi, cyùjà cyà kànsèrè cyà lufù aci mu bwongò, nènku mpindyewu bwà kushintulula maalu.”

875 Ndi mvùluka Hezèkiyà, mutwè mpàla ku cimanu, ùdila mwadi ne: “Mukalenge, ndi nKusèngeleela, ikàlakù naanyi luse. Ntwèku mushinga, bwalu ntu mwèndè kumpàlà Kwèbè ne mwoyi mupwàngàne.” Cyàkashintuluka ku lufù kulwaci mwoyi.

876 Lubilà lukolè lùmwèpelè lwà kùdì Mwànà wa Nzambì ne: “Lazàrò, pàtukà!” ne muntu mufwè kupàtukayè.

877 Éyi Nzambì wa yàaya, Wèwè utu mwambè ne: “Akùlaayi, lòm̀baayi, ne necìfidìibwè. Paùdì wamba cintu nànsha cyà bìshì, itàbùuja ne cyùdì wamba aci cidì cyènzeka, neùpetè cyùdì wamba aci.”

878 Mpindyewu, Taatù, ndi ndòm̀ba bwà muntu yònsò udi mwelè cianza muulu awu àpetè cidiye mwelèle cianza muulu aci. Ne swàku bàbeneshiibwè. Nènku Nzambì, ndi ndòm̀ba bwà Ùkwacishèku bânà bèètù bàà bakàjì, bwà kwikalabò. . . bàaditwàlakù bilenga, bwà Sàtaanà ku télévision ne bikàndàkàndà byà *Bwalu-bulonda Bulelèlè* ne bikwàbò, bìdìbo bakwàte naabì mudimu ne mapeepelela abi, ne ndongamu kayiyi mikenketa, m̀shindù wùdì manyaanù ne maalu a ciipanshi ku télévision ne bikwàbò awu, bivwàku bifwànyine. . . Civwàku cifwànyine kwikala cyamù cyà mudimu bwà kuKupetela miliyò yà misùùkà, kàdì m̀shindù wùdìbì kabìyi bikenketa’s, kàdì kupàtula bintu byònsò byà bukooyà ebi bìdìbo. . . Kaa, byà luse be! Ne pa kumanya ne nyumà wa dyabùlù mmubwelè ne ùkaadi mu nyùngulukilu wa bânà bèètù bàà bakàjì, ne ùteeta kubàfikisha ku dilonda dyà myòdelè ne divwàlè dyà bilàmbà m̀shindù awu.

879 Ne tudi tusangana ne mu. . . ne mu bânà bèètù bàà balùme pààbò, Mukalenge, mùdìbo bàdifwànyikijila ne bàdì mwà kunwà mfwankà ne kunwà maalà, ne kutungunuka m̀shindù awu,

kàdi kwikala ànu beena Kilistò ne bwalu bàdi bàmba ne bàdi “bìitabuuja.” Bàmanyèku ne “dyabùlù ùtu pèndè wìtabuuja.” Kàdi kî mmusùngìdìibwe to, “ùdì wìtabuuja ne ùzakala.”

⁸⁸⁰ Nènku mpindyewu, Taatù, tudi tulòmba bwà Wikalèku neetù bônso luse, ne ùtùfwilè luse ku mpèkaatù yètù, ne pàmwàpa bàmwè kabàvwa beelè byanza muulu to, Éyi Nzambì, ikàlàku ne luse. Swàku bwà mpùngà udi ulonda udibò bàpeta, swàku bwà belè byanza byàbò muulu.

⁸⁸¹ Nyewù tukàadi tudìlongolola bwà kudya mèèsà a Mukalenge, Mukalenge. Tùfwilèku luse ku matomboka ètù ne byà kale byà dibènga kupetangana ku mèyi mu nsòmbelu abi. Nènku swàku bwà twàkidilè dibènesha Dyèbè, bwalu tudi tulòmba nùku mu Dìnà dyà Kilistò. Amen.

⁸⁸² Mukalenge ànùbènèshè. Nwamfwilaayikù luse bwà dinùlama dyà mùshindù ewu. Ndi ànu ndikonka, kumpàla kwà mèèsà a Mukalenge, kwòkò muntu mulwè bwà bàmusambidilè, muswè bwà bàmusambidilè, èè, tudi bafwànyine kwikala ne disànkà dyà kwenza cyòci aci ànu pa dībà edi mene, kwòkò muntu wa kusambidila.

⁸⁸³ Èyo, mwanèètù, lwàku nendè buludì kùneeku, nebiikalè bìmpè. Kàdi indilà ànu kakesè cyanàànà, nènku pashìishe ne—netùtangalakè. Ne pashìishe patwàtangalajanganà, dībà adi aba bàdi baswè kushààla bwà mèèsà a Mukalenge abu, bàdi mwà kushààla. Kàdi bwà mpindyewu netwènzè disambila bwà babèèdì. Bible mmwambè cinyi?

⁸⁸⁴ Mwanèètù wa balùme awu yèyè kàyì mwà kujuuka kuulu to. . . Bidi ànu bìmpè, àshaalè ànu musòmbe mwab’awu, netùlwe kùdiye aku. Bidi ànu bìmpè, àshaalè ànu musòmbe mwab’awu. Nènku twètù netùlwe bwà kumusambidila. Abi mbìmpè. Èyo, mukalenge, àshaalè—àshaalè ànu musòmbe mwab’awu. Byòbì bimukolèlè bwà kwimana kaaba aka, mòna’s, twètù netwìkalè ne disànkà dyà kulwa buludì kùdiye aku.

⁸⁸⁵ Mpindyewu ndi muswè bwà ngàmbèku kaacintu kakesè kàmwèpelè aka, wèwè mulundà wanyi munanga. Nwamònu’s, ndi—ndi mumanyè ne Mukalenge ùkaadi mujaadike cyòci eci misangu ne misangu. Nwamònu anyi? Mèmè ncyèna ànu muiyishi mwinè to, ncitu ne dilonga dyà kàlaasà ne bikwàbò to. Ndi munangè Mukalenge Yesù, Nzambì mmumanyè ne ntu muMunangè. Kàdi cintu cimwèpelè cìntùku mubiikidìibwe bwà kwenza, nkusambidila babèèdì. Nudi nwìtabuuja nànkù anyi? Nànsha mene kumpàlà kwà mèmè kumanya bwà dipà adi, mwà ne ciibidilu cyà kuya ku lùpitaadi eku; ne ndi mvùluka mùvwà baamìngàngà bakàjì abu bàmba ne: “Mpindyewu neùmvwè bìmpè.” Nwamònu anyi? Nènku ànu cintu kampànda, ncyà ne Nzambì mmudìleejè wa ngàsà bwà kutwà masambila àanyi mushinga bwà bantu.

⁸⁸⁶ Ndi ncinka, dilòlò edi ne, bu dibùikila difwànyine kwenjiibwa, ànu bu dikùbàkùbà dituuta myaba yònsò buloba bujimà. Bamba ne, bantu bònsò bàtù Mwanèètù Branham musambidile, bàlwe kaaba aka, ndi muswè bwà nwènù nwafila dyandamuna kùdì bukalenge bwà États-Unis, mu mukànda mubàfùndila. Ne ciinè aci citwànyine kwikala díyì dyà ku tudyòmbà dyà buloba bujimà. Ngeela meeji ne, pàmwàpa bantu miliyò yinaayi anyì yitaanu mbafwànyine kwandamuna ku dibùikila adi dyòdì dimanyike. Nwamònu anyì?

⁸⁸⁷ Nènku bantu abu, anyì bàmwè bàà kùdìbo bàkaavwa bamanè kufwà, balekelela kwàka kùdì ngàngàbukà, ne—ne mulongolodi wa bitàlù. Bàmwè bàà kùdìbo bashipiibwe mu njiwù; bàmwè bàà kùdìbo bafwè lufù lwètù lwà ciibidilu elu. Bàmwè bàà kùdìbo mbampofu, bilèmèndà, balèmà, bakònyangàle bidimba, beena ntàtù, beena katombòtombò. . . mu mpitaadi, kabàyi nànsha bamanyè ne tuvwa mu lùpitaadi bwà kubàsambidila to. Bàbwela naabò, bikèngela nùbàngàtè. Bàvwa bafwànyine kudìkùma eku ne eku ne kuditàpa mbidi mujimà, kabàyi nànsha bàmanya ne bàdi penyi to. Mu tusunsa tùtaanu, bàshàala mwàbò ne kale, ne kalolo, bantu bàà dinanga, ne meeji mu òwò matùkù ònsò a mwoyi wàbò. Nwamònu anyì?

⁸⁸⁸ Cidi. . . Ncinyì aci? Kì m'Mwanèètù Branham to. N'Yesù Kilistò, Yèyè ngudi muntùme bwà kusambidila babèèdì. Mpindyewu bwalu bùdi nunku. Kacitikù citàmbe kutuuta dyàkalenga mu Jeffersonville to, bwalu, kabingilà nkòkò aka. Mpindyewu, ndi muswè bwà nwènù kumanya ne ndi ne bàmwè bàà ku balundà bàanyi bàà pa mwoyi bàà fyèfyèfyè bàdi kaaba aka mene mu cimenga emu. Nànsha mùdìbi ne cimenga cyòci ciinè, mùshindu wà cimenga, mèmè ncìtu mucìswè nànsha. Ncìtu munangè nsòmbelu ewu to, ne kacya ncìtukù mumunangè to; pàncìvwa mwànà mutekète, musòmbe, mbala mikàndà yànyì yà maalu-malonda, ngamba ne: "Dìngà ditùkù nèngùumukè mùneemu emu." Nwamònu anyì?

⁸⁸⁹ Mèmè ncìtu munangè Jeffersonville to, ncisènsè, ncibandabanda. Cidi anu cisènsè cyètù cyà bushùwà eci, ne—ne ncìbì be. Bàndabì kumutù kwà Spickert Knobs eku anyì mu mwaba kampànda, kàdi ùtangidile pa bule lwà mu New Albany ne mu Jeffersonville, pawikalà muswè kumòna. Tàngilàayi kùneeku, bangàngàbukà bàdi mene bamba mpindyewu, ne: "Bantu bàà mu cibandabanda eci bàdi bènda bàjimija mashi bwà nsòmbelu ewu."

⁸⁹⁰ Inàbànza mutekète mwaba ewu, Màndàmù Morgan, wàkondopiibwa ku kànsèrè, kwangatayè mbwa wendè e kuyayè nendè ku lùpitaadi eku, wèla meeji ne mbwa awu ùvwa ne cikupi. Nudi bamanyè ne cìvwa ncinyì? Bishàadilà byà ku cyapù cyà Colgates ne bikwàbò pa bisoosà bibi mwàkapìcilàye. Mmwaba wà mutàmbe kwikala wà wùtácisha mbidi wà dikèma.

891 Mwabilaayi kampàndà ùywa mu Cilwilu, kupwekayè muneemu emu ne kupetayè. . . Ùywa ne disaamà dyà mfwènke. Kupwekayè mu Floride emu ne mèsù èndè kulwawù mafìke fitùtù, ki kuyayè kùdì ngàngàbukà, e kwambayè ne: “Ngàngàbukà. . .”

892 Ngàngàbukà kwambayè ne: “Mpindyewu, wèwè ùvwakù mukalwè mvità, kí mmwômò anyì?”

893 Yèyè ne: “To, mukalenge, ncìvwakù mukalwè mvità to.”

894 Nwènu baswè kumanya ne ùvwa nganyì, dyèndè ng’Herby. Mpindyewu, bu mèmè ànu mwà kuvùluka. . . Mmu—mmu Union National Bank, mu New Albany, yèyè mmuucyanganyì. Ndàayi ànu kuntwaku nùmonanganè ne udi ubiikidiibwa ne “Herby” awu, nùmukonkè.

895 Nènku kwambayè. . . Kuyayè, kwambayè ne: “Ngàngàbukà,” yèyè ne, “ndi nsàama mutù wà kapàla.”

896 Kumuteetayè, kwambayè ne: “Mmwômò.” Yèyè ne: “Mèmè mvwa ngeela meeji ne uvwakù mu mvità kampànda.” Yèyè ne: “Mulùmýana, utu musòmbèle penyì?”

897 Yèyè ne: “Udi mufwànyine kwikala kùyi mumanyè mwaba awu to,” yèyè ne, “Ntu musòmbèle mu kaacimenga kakesè katàngilàngàne ne Louisville, mu Kentucky, kàbiikidiibwa ne New Albany, mu Indiana.”

898 Yèyè ne: “Udi uswa kungambila ne udi mupetèle disaamà dyà mutu wà kapàla edi nku màyi a mukèlè a mu Miami emu aa, mu dilwa dyèbè amu anyì?” Yèyè ne: “Wèwè mufwànyine kwikalakù musòmbèle mu Jeffersonville, mu Indiana, anyì mu New Albany, mu Indiana, udi mwà kusòmbela mwaba kanà wònsò pa buloba wùdì cilwilu cyà États-Unis cìfwànyine kukutùma awu.” Ki cyònsò cìdiku. Nwamònu anyì?

899 Ki mwaba wùdì mutàmbe kwikala wà ùtácisha mubidi wùdìku pa buloba, wùndìku mumanyè, pa kuumusha cyòcì cìfwànyine kwikala cisènsè cyà cìfila màlèyalèya. Nwamònu anyì? Nènku ndi—ndi—ndi—ndi ne balundà muneemu emu.

900 Tangilàayi kùneeku, ndi ànu mwà kubàtèèla mùshindù ewu. Tàngilàayi Ngàngàbukà Sam Adair, mulundà wanyì awu. Èyo, kùdì Mike Egan, udi musòmbèle pàapa wàwa. Kaa, ekelekele, búngi bwinè bündiku mufwànyine kutèèla mu mènà’s wè! Ànu nkàmà yà balundà balenga bàà dikèma, bannyaànaanyì bàà kale, bânkaadiku mwendènde naabò. . . Nànsha mèmè mupetè balundà bapyabàpyà búngi kaayi, kakwènakù cyàngatà kaaba kàà mulundà wa kale to. Aci kaayi nudi bamanyè.

901 Ki mààmù wanyì mukùlàkàjì udi musòmbè paanyimà pàapa wàwa, kàciyi kàbìdì ne matùkù àbúngi pa buloba to, ùkaadi ne bidimu makùmi àsambòmbò ne byà mu njila patùdì twakulangana apa. Ki màmwènàànyì wàwa, ne bidimu makùmi mwandamutekètè, mutàngile ku makùmi mwandamutekètè

ne címwè; mmusòmbe paanyimà apa mu mwaba kampànda, ngeela meeji, dilòlò edi. Nènku mwaba awu, kumushiya. Papa wanyì mmujiikìibwe lwà kuntweku; mukàjàànyì mmujiikìibwe kuntweku mu nkità yà Walnut Ridge; mwanàànyì wa mu dibòko mmulaadika muntwamu. Nudi numòna cìndì njinga kwamba aci anyì?

902 Nci—nci—ncìtu muswè. . . Nci—nci—nci—ncìtu muswè kushààla muneemu to, ne ndi ngeela meeji ne àbidì àdì panshì aa, ncìyì nnènga to, nebikengelè bwà ngùumukè. Nwamònu's, bwalu bitu ànu bìmvwila mu meeji, ndi ngambidila cyôci eci mu cyambilu, ne Bible wanyì, misangu ne misangu.

903 Pàngààkambilà mukàjàànyì, pààkatùpèèshàbo mfrangà yà kwibaka naayì nzùbu wa mpaasàta úndì mupèeshe èkéleziyà ewu awu. . . Èkéleziyà ewu ki mwena nzùbu wa mpaasàta awu; ndàayì mwab'awu, nùsanganèbi ní kí nnànkú awu. Nwamònu's, ncìvwa muswè kumwangata bu ne ngwanyì mèmè nànsha.

904 Mpindyewu, pàmvwà ne cyà kwibaka mwaba awu, Meda kwambayè ne: “Ndi muswè kushààla apa bwà mààmù wanyì.”

905 Mèmè ne: “Munanga wanyì, mbulelèlè ne twètù ànu benzè nànkú, netùsunè tudyàmbikè bwà bwalu abu. Wamònu's, kabyàkukùmbanakù to. Nzambi mmwambè ne: ‘Tàpulukà,’ bìkèngela ncyènzè.”

906 Kì yèyè ne: “Èè, kàdi mààmù wanyì's!”

907 Mèmè ne: “Nànsha wanyì mààmù pèndè's. ‘Kàdi ewu wabènga kushiya bèndè sungasunga, bwà kuNdonda Mèmè awu, kí mmukùmbànyine kubiikidiibwa ne ng'Wanyì to.’ Ne aci's ncilelèlè.”

908 Dìngà ditùkù, àbidì aa, ndi ndyùmvwà ne nebikengelè bwà mèmè kumwangala, mbwena kwamba ne, kuumuka kuya. Kàdi mùshindù ngwòwù ewu, wikalà masangisha kaayì ènda bimpè kaaba aka to. Kaàkwenda mudibi byènzeka myaba mikwàbò yònsò to, ne muntu kanà yònsò ukaatùku mudyatè mu disangisha mmumanyè ne aci ncilelèlè, bwalu apa mene mmu cimenga cyànyì sungasunga. Kì cyôci.

909 Yesù wàkamba cintu címwècimwè aci pààkalwàYe.

910 Bààkamba ne: “Ewu mulùmnyànà ki nganyì's? Kì mmwànà wa mukoonyi wa mabaya wa kuntweku awu anyì? Mmu cìlongelu kaayì mukaadiyekù muyè? Nkwèpi kudiye mukapetèle edi dimanya? Mpindyewu ngǎnji nkumònèbi wenza. . . S'wambi mùdì mwenzè bishimà kuntweku, ngǎnji nkumònèbi wenza byà mwomùmwe muneemu emu. Byùdì mwenzè mu Kaapènumà abi, ngǎnji nkumònèbi ubyènza muneemu.”

911 Yesù wàkamba. . . “Wàkakèma bwà bupidyà bwàbò.” Yèyè wàkakùdimuka e kwamba ne: “Bulelèlè, bulelèlè, Ndi nnwàmbila ne: mupròfeta kàtu ùpànga difutu to ànu yèyè

munkaci mwà bàà kwàbò sungasunga mu ditùngà dyàbò sungasunga.” Mmwômò anyi?

912 Ne tudi bamanyè...tàngilàayi...Angàtaayi Finney, angàtaayi Sankey, Moody; angàtaayi John Wesley, kàvwakù mwà kwangula mpasu to, nwamònu’s, too ne mwàkuumukayè mwàbò. Tàngilàayi kùdì—tàngilàayi kùdì—kùdì—kùdì Moody. Moody, mulongolodi wa bisàbaatà wa mu Boston awu, pàvwàye kàyi mwà kwangulakù mpasu to nànsha kakesè, wàkalwa mu Chicago kumpàlà kwà kumanyikayè. Nwamònu anyi? Byàkakèngela bwà kushiyanganayè ne bàà kwàbò sungasunga. Nebikukèngèlè misangu yònsò bwà wèwè kucyèenza.

913 Kàdi mpindyewu, mwab’ewu, Nzambi neàndamunè ku disambila bu nwènù mwà kupwà mwoyi ne ng’William Branham (Nwamònu anyi?), bu nwènù mwà kupwà mwoyi ne William Branham ùdi ne cyà dyenzamù, ùdi ànu kampànda wa wimana bwà kunusambidila cyanàana. Yesù Kilistò ngudi mumanè kwenza cyàdì mulòmbe bwà kwenza aci, bu wèwè ànu mwà kucitabuuja. Nwamònu anyi? Ki ncintu cyà dyenza nànsha cimwè... Mèmè ncyèna ne cyà dyenzamù to, ànu kufila bujaadiki. Kàdi mbimwènèke ànu bu ne mündi mukòlèle neenù muneemu, ne nwènù bamanyè butekètè bwònsò bündi naabù, ne cilèma cyònsò cìndi naaci... Ne nwènù bamanyè bìdì Nzambi mwenzè, mu cimenga eci mene.

914 Cimenga eci, ku ditùkù dyà cilumbulwidi, necyàmbulè bujitu bunène dīngà ditùkù, bwalu nkwenzèke nkàmà ne nkàmà yà dyondopa dyà pabwàdì mwab’ewu mene (Ncyà bushùwà.), mwab’ewu mene. Bimanyinu ne maalu a kukèma, ne dimwènèka dyà Mwanjèlo kuntu kwàka, ne bibèjibeji bìkòbola ne bikwàbò byònsò, kàdi bantu kabàyi ànu... Bwà cinyi nànkù?

915 Mpindyewu dīngà ditùkù, nēngūumukè mwab’ewu. Ndi ndikonka ne: “Ndekeelu wanyì neikalè cinyi? Kukaadi kujikè anyi? Kùkaadi pa kujika anyi? Nkàadi ne bidimu makùmi ànaayi ne mwandamukùlù. Kùkaadi pa kujika anyi?” Cyòci edi ki cìndi ndikònkà. Piikalàbi nànkù... .

916 Tàngilàayi, bwà cinyi bàà pa buloba kabàvwakù bajingùlùle fòtò awu kuntu kwàka? Kabàakacyùmvwakù lùkàsà bwà cinyi? Bwà cinyi kabèèna bùmvwakù bikwàbò bintu ebi? Bwà cinyi kabèèna bùmvwakù bipròfètà ebi ne bikwàbò? Nudi bamanyè’s, kabèèna mwà kubyùmvwakù mpindyewu to, kàdi dīngà ditùkù nēngūumukè pa buloba, ne pāngiikalà muumùke, dībà adi nebàCijingùlùle. Bāmwe bàà kunùdì nwènù bansongàalùme nenùjingululè cyòci aci paanyimà pàà mèmè mumanè kuya. Nwamònu anyi? Kàdi Nzambi kí mmufwànyìne kwanyisha bwà cyènjiibwè mpindyewu to. Nudi bamòne cìdì... nudi bumvwè cìndi muswè kwamba aci anyi? [Katùpà kàà mukàbà wà mèyi munda mutupù—Muf.]

917 . . . Ànu kaacikànù kakesè kàà ku dibòkò kàà mwànà wa bakàjì. Muntu kanà yònsò ewu udi mwà kukànga ta. Ne ndi ngeela meeji ne Mwanèètù Sothmann wàmbi ne ùvwa mushiye Bible kaaba aka musangu mushààlè wùvwàyepù, ngeela meeji. Kùdikù muntu musangàne Bible, Bible mu—mushààle mu mpùkàpùukà kaaba aka anyi? Wèwè mumupetè, ngwa Mwanèètù Fred Sothmann wa ku Canada. Mpindyewu túsambilàayaaku.

918 Mukalenge, ikàlàku ne luse, pàdì mùjikì ne cyà kwikala wimba mu luvwengavwenga ne Mwanèètù Neville ne cyà kulaabangana maanyi apa, Mèmè ndi nya bwà katentekela babèèdi byanza mu Dìna dya Yesù. Enzàku nàнку, Mukalenge, bwà dyondopiibwa dyàbò. Amen.

919 Bantu bònsò sambilaayi, mpindyewu, muntu ne muntu. Èyo.

Mukalenge, mwànà mukesè ewu, pàdì kakwèndè mulùme mumwimànyine kaaba aka apa. Ùdi ne mubidi wùbèngangana ne mabèèle, dìnà mabèèle. Kàdi Wèwè ngudi ne Bukolè bwònsò ne mwànà mukesè awu kèna mwà kwikala ne diitabuuja bwèndè yèyè mwinè to. Nènku dìbà adi, Mukalenge, nyewu mèmè ne diitabuuja bwèndè yèyè, pàmwè ne baledi ne baakakwèndè tudi twamba, mu Dìna dya Yesù ne, mwànà awu neikalè mwà kunwà mabèèle ne kwikala ne mwoyi bwà butùmbi bwà Nzambi. Amen. Nebiikalè mùshindù awu.

Kaa, Nzambi, yèyè's udi ùsambidila tatwèndè. Ndi ndòmba pàmwè nendè bwà Wèwè kwondopa tatwèndè ne kumupèèsha cidiye naaci dijinga, mu Dìna dya Kìlistò. Amen.

920 Mpindyewu, bipepèle kì mmwòmò anyi? Bantu munkaci mwà kusambila, kàdi aci ncìdi bantu. . . Badi bàkèba cintu cinène kàdi bàcikòdyakaja. Nzambi ùdi ùcìvwija cipepèle. Nwènù nudi nucikòdyakaja nènku nucìpangila. Nwamònu anyi? Kucìvwija ànu. . . Cilekèlaayi cipepèle mùdi Nzambi mwambè ne: “Bimanyinu ebi nebifilè bàdi bìitabuujà; bôbò batentèkèle babèèdi byanza, babèèdi nebàsangalè,” mùdi Nzambi mwambè.

921 Nyewù tutentekela mukàjì ewu byanza, Mukalenge, mwanèètù wa bakàjì udi mwimàne apa ewu, nènku swàku bwà òndopiibwè patùdi tucilòmba apa, mu Dìna dya Yesù Kìlistò. Amen.

922 Taatù, patùdi tutentekela mwanèètù wa bakàjì byanza apa, mu Dìna dya Yesù Kìlistò, bu civùlukilu cyà Bible ne dilongesha dya Mukalenge, swàku bwà yèyè òndopiibwè.

Taatù, mu Dìna dya Kìlistò, tudi tulòmba dyondopiibwa dya mwanèètù wa bakàjì, ne ndi ndòmba bwà Ùmwondòpèku patùdi tutùmikila Dìyi Dyèbè apa, nciyi ne mpatà nànsha yà kànà mu meeji àanyi to ànu bwà ne mmufwànyineku kwikala. . . ? . . . Amen.

923 Taatù, nyewù tutentekela mwanèètù wa bakàjì byanza, ne tulòmba nùnkù, mu Dìná dyà Mukalenge Yesù, bwà wèwè kumwondopa ne kumusàngaja. Amen.

Mu Dìná dyà Mukalenge Yesù, tudi tutentekela mwanèètù wa balùme byanza ne tulòmba bwà Wèwè kumwondopakù bwà butùmbi bwà Nzambì.

Taatù, mu Dìná dyà Mukalenge Yesù, tudi tulaaba mwanèètù wa bakàjì maanyì, ne tumutentekela byanza ne tulòmba dyondopiibwa dyèndè mu Dìná dyà Yesù.

Taatù Nzambì, nyewu tutentekela mwanèètù wa balùme byanza, tulòmba ne, mu Dìná dyà Yesù Kilstò, patùdi tumulaaba maanyì apa Wèwè ùmwondòpèku.

Taatù, mwab'ewu, mukàjèndè munanga...?...tumulaaba maanyì ne tumutentekela byanza, tucìlòmba, mu Dìná dyà Yesù Kilstò.

924 Mukalenge Nzambì, nyewu tulaaba Edith mwànà maanyì, tumutentekela byanza, ne tulòmba mu Dìná dyà Mukalenge Yesù Kilstò bwà Wèwè kumupèeshakù dilòmbà dyèndè.

Taatù, kùdi mamwèndè, tudi kàbìdì tumulaaba maanyì ne tumutentekela byanza ne tulòmba dyondopiibwa dyèndè, mu Dìná dyà Mukalenge Yesù Kilstò, swàku bwà yèyè àsangalè.

925 Taatù, nyewu tulaaba maanyì kaacilengà kakesè kàà mushinga mukolè kàà díkù edi aka, kàà pa mwoyi wàbò, mu Dìná dyà Mukalenge Yesù, dîngà ditùkù kalàmbùdìibwe kùdiYe, ne ndi ndòmba bwà Wèwè kukòndopa...?...

926 Kaa Nzambì, Wèwè udi mumanyè dilòmbà dyà mwanèètù wa bakàjì ne tudi tuKwela twasàkidila bwà diitabuuja dyèndè dyà bukìtu adi. Mpindyewu, swàku bwà bintu bìdiye mulòmbè abi, bìdì...?...bìvwàye unàya naabi pàcìvwàye mwànà apu abi, nènku Nzambì, swàku bwà mulwishì àlekelelèku mukàjì awu ne àpinganèku kumbèlu ne mubidi tumatuma, Mukalenge. Tudi kàbìdì tulòmba bwà muntu mulùme awu, udiyè mufidile dilòmba awu, Wèwè utu mulayè ne: "Nwènu balòmbè cintu kanà cyònsò mu Dìná Dyànyì, Mémè nèncyènzè." Ndi ndòmba bwà Úfilèku dilòmba edi, mu Dìná dyà Yesù. Amen. Nzambì àkubènèshè.

927 Mukalenge, pàdì kajilujilu aka kènda kàfwa mu mpàla wa mwanèètù wa balùme apa, tudi tulòmba bwà mwoyi wùbwayikè, patùdi tumutentekela byanza ne tucìlòmba apa, mu Dìná dyà Yesù, bwà kajilujilu aku kàlongolokè.

Taatù Nzambì, nyewù tutentekela mwanèètù wa bakàjì byanza paanyimà pàà bamanè kumulaaba maanyì, mu Dìná dyà Mukalenge Yesù Kilstò, tudi tulòmba dyondopiibwa dyèndè. Amen.

928 Taatù wa mu Dyulu, bu mùdì mwanèètù wa bakàjì mwimàne bwà dicìmunà dinène misangu ne misangu d'Údì

mumupèeshe, mmwimàne bwà umwe wa ku basadidi Bèèbè, mwambi kampànda, mubindùlùke bikolè; mwoyi wètù wà dyabanyangana nèndè makènga wùdi wùzànyika mashì bwèndè yéyè bu mutùdi bamanyè bìdiye ùpicila. Ndi ndòmba, Nzambi, bwà Ùlaabèku mwanèètù wa bakàji maanyi bwà diimana dyèndè kaaba aka bwà mwambi awu ne ùmulaabèku bwà dyondopiibwa dyèndè. Ndi ndòmba, mu Dîna dya Kilistò. Amen...?... Mukalenge mmumanyè...?...

⁹²⁹ Bîmpè. Ndi ne disànkà dyàbùngì be. Adi ndilaabiibwa dya menemene dya Mukalenge. Mukalenge Nzambi, paanyimà pàa mukàji ewu mufwànyine kwikala musùlùdiibwe kùdi démon ùvwayè mulwangànelwàngane nendè munda mwà bidimu, dîngà ditùkù Wèwè wàkamuvwija kumbèlù kwàka ne dîbà adi Nyumà kutùluka ne: “EMU MMÙDÌ MUKALENGE WÀMBA,” paanyimà pàa yéyè mwelè mbilà, mulàale panshi ku cyoshelu, mwenzè byònsò bìvwàyekù pèndè mwà kwenza abi, kadi byàkakèngela EMU MMÙDÌ MUKALENGE WÀMBA. Mpindyewu, nyewù ùlwa bwà mwànà wa mu dibòkò wa mwanàabò wa bakàji udi ulùka; kàyi mwà kwenda to, ùkaadi mpucìshe ne cidimu cijimà. Ndi ndòmba, Mukalenge, bwà Ùmupèeshèku mabènesha a Nzambi mu Dîna dya Yesù Kilistò. Ndi ne disànkà dyàbùngì bwà bwalu abu, mwanèètù wa bakàji, mwikàle kàbidi ne mmwènekèlu mushiilàngane. Ne wèwè udi kule menemene ne difwà patùdi twakulangana apa, kî mmwòmò anyi?

Taatù Nzambi, tudi tulòmba bwà Ùbeneshèku mwanèètù wa bakàji patùdi tumulaaba maanyi ne tumutentekela byanza ne tulòmba cintu ciWàkambà eci ne: “Bimanyinu ebi nebifilè aba bàdi bìtabuuja. Nebàtentekelè babèedi byanza, babèedi nebàsangalè.” Tudi tujìkula ne tudi beena kwitabuuja, Mukalenge, pa nàнку tudi tulòmba bwà Wènzèku cintu kampànda, mu Dîna dya Yesù...?...

⁹³⁰ Taatù Nzambi, mumanyè mwoyi wà mukàji mutekète ewu, bu mùdiye muwùpòngòlòle, tudi tulòmba bwà Wikalèku nendè luse ne ùfilèku dilòmba didiye mulòmbe adi. Éyi Taatù Nzambi, bwà fàmiyè wendè, bwà bânà bèndè, mwanèndè wa balùme, nangànangà, Nzambi, ndi ndòmba mpindyewu ne, Wènzèku bintu ebi...?... ne mwoyi wànyì wònsò, ndi ncilòmba, mu Dîna dya Yesù. Amen.


Taatù Nzambi, patùdi tulaaba mukàji ewu maanyi, ne tumusambidila mu Dîna dya Mukalenge Yesù apa, bwà Wèwè kumwondopa ne kumusàngaja bwà butumbi bwà Nzambi.

⁹³¹ Dîna dyèbè kî ndifwànyine kwikala West to, mmwòmò anyi?

Taatù, tudi tulòmba bwà inàbànza mutekète ewu. Ùdi ùlomba bwà tatwèndè. Mpindyewu, ndi ndòmba bwà Ùmupèeshèku tatwèndè awu, ùbiikidilè pa mwoyi wèndè, Mukalenge. Mmuswè bwà tatwèndè àsungidiibwè. Kî mmuswè

bwà kwikalayè mu maalu a pa buloba mùdiye amu to, yêyè ewu, mwanèndè sungasunga, mùtòlokù wèndè. Ndi ndòmba, Taatù, bwà Wìkalèku nendè luse, mu Dîna dyà Kilistò.

⁹³² Àkubènèshèku, mwanàanyi wa bakàji, Nzambi àkupèèshèku, cintu cyûdi mulòmbe aci.

Nzambi munanga, tudi tulòmbe luse bwèndè yêyè, ne tudi tulòmbe bwà Wìkalèku nendè luse, patùdi tumulaaba maanyi apa...?... 

57-1006 Nkonko Nè Mandamuna Pa Ebèlù Citùpà III
Branham Tabernacle
Jeffersonville, Indiana États-Unis

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org